

Suno Boronaree by Shubodh Ghosh

suman_ahm@yahoo.com



ছোটো এক টুকরো কাঠের উপর বাংলা হরফে লেখা একটা নাম—ডাক্তার হিমাজি শেখর দত্ত (হোমিও)। গিরিডির লোহাপুলের পূর্বদিকের সরু রাস্তাটার ধারে কোনো বাড়ির দরজার পাশে দেওয়ালের গায়ে ঐ নামটা আজও আঁটা আছে কিনা জানি না। থাকলেও, এতদিনে নামটা নিশ্চয় পচা কাঠের ছাতা লেগে পচে গিয়েছে, কিংবা পুরানো কাঠের ঘুণের কামড়ে ঝিরঝিরে হয়ে গিয়েছে। যাই হোক, আজ থেকে দশ বছর আগে ঐ নামের ফলক স্মরণ করিয়ে দিত যে, ঐ নামের আড়ালে একটা মানুষ আছে। কে না চেনে তাকে?

নামটা শব্দের ভারে বেশ ভারি ক্বি বটে, কিন্তু মানুষটা একেবারে হাল্কা। লোকেও এত বড়ো একটা নাম উচ্চারণ করবার কষ্ট স্বীকার করে না। লোকের মুখে নামটাও কাটছাঁট হয়ে বেশ হাল্কা হয়ে গিয়েছে। লোকে বলে, হিমু দত্ত হোমিও। কেউ কেউ আরও সংক্ষেপে সেরে দেয়, হোমিও হিমু। প্রবীণেরা অবশ্য শুধু হিমু বলেই ডাকেন। কারণ, হোমিও হিমুর বয়সটাও হাল্কা। প্রবীণদের কলেজে-পড়া ছেলেদের চেয়ে বয়সে বড়ো জোর পাঁচ বছর বেশী হতে পারে হিমু। তার বেশি কখনই নয়। কম বয়সের ছেলেরা আর মেয়েরা নিজেদের মধ্যে আলাপের সময় হোমিও হিমু বললেও হিমাজি শেখর দত্তকে কোনো কথা বলবার সময় হিমুদা বলেই ডাক দেয়।

সব শহরের মতো এই গিরিডিতেও লোকের ঘরে বিশেষ এক ধরনের সমস্যা দেখা দেয়। অমুকের অমুক জ্বরগা যাবার দরকার হয়েছে। তাকে পৌঁছে দিয়ে আসতে হবে, কারণ তার পক্ষে একা যাওয়া সম্ভব নয়। কিন্তু পৌঁছে দেবে কে? সঙ্গে যাবে কে?

এ ধরনের সমস্যার সমাধানে সহায় হতে হিমু দত্তের মনে কোনো আপত্তি নেই! আপত্তি দূরে থাকুক, বরং অদ্ভুত একটা আগ্রহের বাড়াবাড়ি আছে বলতে হবে। যে কোনো পরিবারের এ ধরনের কাজের

দরকারে হিমুকে একবার ডাক দিলেই হয়, আর অনুরোধটা একবার করে ফেললেই হয়। তখনি রাজি হয়ে যায় হিমু দত্ত।

গত বছরে পৌষ-সংক্রান্তির সময় সমস্তায় পড়েছিলেন পরেশবাবু। পিসিমা গঙ্গাসাগর যাবার জন্ত প্রতিজ্ঞা করে বসে আছেন। খুড়খুড়ে বুড়ো মানুষ, এই পিসিমাকে নিরাপদে গঙ্গাসাগর নিয়ে যাওয়া আর নিরাপদে ঘরে ফিরিয়ে নিয়ে আসা কি সহজ কাজ? যে-সে মানুষের পক্ষে একাজ সাধ্যই নয়। চারটিখানি দায়িত্বের কথাও নয়। পরেশবাবুর নিজেই সাহস হয় না, এমন কি এমন হট্টাকট্টা ভাগ্নে বাবাজী বড়ো-খোকনের উপরেও এমন কাজে নির্ভর করবার সাহস হয় না। খায় দায় ও কসরৎ করে, আর যখন তখন নাক ডাকিয়ে ঘুমোয়; এরকম আয়েসী কুঁড়ে আর ঘুমকাতুরে ছেলে বড়ো-খোকন কি পিসিমাকে গঙ্গাসাগর দেখিয়ে আনবার বুঁকি নিতে পারে, না শুকে বুঁকি নিতে দেওয়া যায়?

তবে পিসিমাকে নিয়ে যাবে কে? এ-পাড়া আর ও-পাড়ার অনেক ছেলের কথাই মনে পড়ে, বাদের জীবনে কোনো কাজের তাড়াই নেই। তাস খেলে, খিয়েটার করে আর খবরের কাগজের খেলার রিপোর্ট পড়ে সকাল-সন্ধ্যা তর্ক করে। এহেন কোনো ছেলের হাতে পিসিমাকে গঙ্গাসাগর দেখিয়ে আনবার দায় সঁপে দিতে সাহস হয় না। প্রথম কারণ, এদের কেউ রাজিই হবে না। দ্বিতীয় কারণ, এদের বুদ্ধিমুগ্ধিকে ভরসা করাও যায় না। কে জানে, হয়তো পিসিমাকে কলকাতার কোনো হোটলে কেলে রেখে দিয়ে ময়দানের দিকে কিংবা সিনেমা হাউসের দিকে দৌড় দেবে। অভয়, ভুলু, নীহার বা রমেশ, কাউকেই বিশ্বাস করা যায় না। অগত্যা হিমু দত্তকেই ডাকতে হয়েছিল। এবং হিমু দত্তও পিসিমাকে নিরাপদে গঙ্গাসাগরে নিয়ে গিয়ে নিজে হাতে ধরে স্নান করিয়ে, এমনকি পিসিমাকে নিয়ে কপিলমুনির পূজো পর্বস্তু করিয়ে, গিরিভিতে ফিরিয়ে নিয়ে এসেছিল। পিসিমার খুড়খুড়ে শরীরটা একটুও হাঁপায়নি, একটুও ক্লান্ত হয়নি। পিসিমা নিজেই একগাল হেসে বলে কেললেন, আহা! হিমুর মতো এমন ভাল ছেলে আমি জীবনে দেখিনি পরেশ। আমাকে

কোলে ক'রে গাড়িতে তুলেছে, গাড়ি থেকে নামিয়েছে। আমার গায়ে
একটা আঁচড় লাগেনি পরেশ।

শুধু তাই নয়! গঙ্গাসাগর যাওয়া আর আমার খরচের যে হিসাব
দিল হিমু দত্ত, সে হিসাব দেখে পরেশবাবুও আশ্চর্য হয়ে গেলেন। ছি—
ছি, তুমি একি কাণ্ড করেছ হিমু? তোমাকে এতটা কষ্ট সহ্য করতে
আমি বলিনি।

অনুযোগ করলেন পরেশবাবু। কারণ পাই-পয়সা পর্যন্ত মিল ক'রে
পথের খরচের যে হিসাব দিল হিমু দত্ত, তাতে দেখা গেল যে, সাতদিনের
মধ্যে হিমু দত্তের নিজের খাওয়া বাবদ মাত্র তিন টাকা খরচ হয়েছে।

হিমু দত্ত নিজেও এক গাল হেসে বলতে থাকে।—আমি হেলথ
সম্পর্কে খুব সাবধান থাকি বড়দা। কলকাতা থেকে ছ'সের চিনি আর
তিন সের চিঁড়ে কিনে নিয়ে গিয়েছিলাম। বাস, তাতেই আমার
খোরাক হয়ে গিয়েছে! আমি মেলার কোনো খাবারই ছুঁইনি। পিসিমা
বরং দই-টই খেয়েছেন। আমার বেশ ভয়ই হয়েছিল বড়দা, দই-এর
লোভে পিসিমা শেষে একটা কাণ্ড না করে বসেন। ভাগিয়া ভাল, দইটা
ভাল ছিল, পিসিমার শরীরে ময়ে গিয়েছিল।

পরেশবাবুর পিসিমাকে গঙ্গাসাগর দেখিয়ে আনবার পর হিমু দত্তকে
যেন নতুন ক'রে চিনতে পারলেন পরেশবাবু। শুধু পরেশবাবু কেন,
অনেকেই; তারপর প্রায় সবাই।

একেবারে মাটির মানুষ, অভ্যস্ত সং প্রকৃতির ছেলে হিমু দত্ত।
পরেশবাবু একদিন ক্লাবে বসে ননীবাবুর সঙ্গে গল্প করতে করতে বলেই
ফেললেন—হিমুর মতো গুড-নেচার্ড ছেলের হাতে যে-কোনো দায়িত্ব
অনায়াসে ছেড়ে দিতে পারা যায়। ওর হাতে ক্যাশবাল্লের চাবিও
ছেড়ে দেওয়া যায়। পাই-পয়সার এদিক-ওদিক হবে না।

ননীবাবু বলেন—তাহলে হিমুকেই ডেকে কাজের ভারটা চাপিয়ে
দিই, কি বলেন, না?

—নিশ্চয় নিশ্চয়! মাথা নেড়ে প্রস্তাবটা সমর্থন করেন পরেশবাবু।
এবং আর ছুদিন পরেই দেখা গেল, ননীবাবুর মেয়ের বিয়ের জন্ত

জিনিস কিনতে কলকাতায় চলে গেল হিমু দত্ত। বাসনপত্র, অলঙ্কার, কাপড়-চোপড় আর শয্যাভব্য, সবশুদ্ধ প্রায় তিন হাজার টাকার বাজার করবার দায়িত্ব অনায়াসে হিমু দত্তের উপর ছেড়ে দিলেন ননীবাবু। সব সামগ্রী নিয়ে ছুদিন পরে যখন ফিরে এল হিমু দত্ত, তখন সবচেয়ে আগে খুশি হয়ে আর আশ্চর্য হয়ে চেষ্টা করে উঠলেন ননীবাবুর স্ত্রী—হিমুর পছন্দ আছে বলতে হবে! কী সুন্দর ডিজাইনের গয়না! তোমার চোখ আছে, রুচি আছে হিমু! আমি নিজে কলকাতা গেলেও এরকম পছন্দ করে সুন্দর জিনিস কিনতে পারতাম না।

পাই পয়সা মিলিয়ে হিসাবও দিয়ে দিল হিমু। ননীবাবু আশ্চর্য হয়ে বলেন—একি হিমু, তোমার খাওয়া দাওয়ার কোনো খরচ নেই কেন?

হিমু হাসে—খরচ হয়নি। আমার ছেলেবেলার বন্ধু কানাই—এর সঙ্গে ট্রেনে দেখা হয়ে গেল। কলকাতাতে কানাইদের বাড়িতেই ছিলাম। কাজেই...

ননীবাবু বলেন—যাই হোক, তোমার হাতখরচ বাবদ যদি দশটা টাকা তুমি রাখতে, তাহলে ভালই হতো হিমু।

হিমু আরও লজ্জিত হয়ে হাসে—কি যে বলেন মেশোমশাই!

ননীবাবুর স্ত্রী এবার ননীবাবুরই মুখের দিকে তাকিয়ে চেষ্টা করে ওঠেন—ছি, ছি। তুমি হিমুকে কি পেয়েছ; কি বলছ তুমি?

ননীবাবু—কেন? অথায় কিছু বলছি কি?

ননীবাবুর স্ত্রী বলেন—হিমু কি তোমার মতো ইনস্পেক্টর যে টুরে বের হয়ে ব্রাঞ্চ অফিসের বাবুদের বাড়িতেই ছবেলা চব্য-চোষ্য গিলবে, আর কোম্পানির কাছে খোরাকী বাবদ বিশটাকা বিল দাখিল করবে?

ননীবাবু অকুটি করেন—তুমি আবার হঠাৎ এসব আবোল তাবোল কথা তুলে...

হিমু দত্তই এইবার ননীবাবুর স্ত্রীর মুখের দিকে উদ্ভিন্ন চোখে তাকিয়ে অনুযোগ করে—ছিঃ, আপনি এসব কি বলছেন মাসিমা।

শহর থেকে দূরে যাবার কাজ পড়লেই, একদিন বা ছুদিনের জন্য বাইরে যাবার দরকার পড়লেই হিমু দত্তের কথা সবারই মনে পড়ে।

ননীবাবুর এই মেয়ের বিয়েতে জামালপুরে গিয়ে বরের বাড়িতে অধিবাসের তত্ত্ব পৌঁছে দেবার দায়িত্ব হিমু দত্তকেই বহন করতে হয়েছিল। অধিবাসের জিনিস দেখে বরের বাড়িতে মেয়েরা নাক কুঁচকেছিল, অনেক কটু কথাও শুনিয়েছিল। সব শুনেছিল হিমু দত্ত, কিন্তু এই সামান্য কথাটাও বলতে পারেনি যে, আমাকে এসব কথা শুনিয়ে লাভ কি? আমি মেয়ের বাড়ির কেউ নই।

এই অপমান সহ্য করবার দায়িত্বটাও অনায়াসে পালন করতে পেরেছিল হিমু দত্ত। বরের বাড়ির মন্তব্যগুলিকে তুচ্ছ করতে পারেনি হিমু দত্ত। ননীবাবুর অপমানকে পরের অপমান বলেও মনে করতে পারেনি। অদ্ভুত এই হিমু দত্তের মন; বরং সেই অপমানকে যেন ভালো করে গায়ে মেখে, যেন ননীবাবুর মেয়ের দাদাটির মতো ভীকু হয়ে কাঁচুমাচু মুখ নিয়ে বরের মায়ের কাছে হাতজোড় করে দাঁড়িয়ে ক্ষমা চেয়েছিল হিমু দত্ত—ক্রটি হয়েছে স্বীকার করছি, নিজগুণে মার্জনা করুন।

ননীবাবুর মেয়ের বিয়ে হয়ে যাবার পর, অনেকদিন পরে এই ঘটনার কথা জানতে পেরেছিলেন ননীবাবু ও তাঁর স্ত্রী। হিমু দত্ত বলেনি। বরং বরের বাড়ির চাল-চলন আচার-ব্যবহারের অনেক প্রশংসা করে ছিল হিমু—চমৎকার ভদ্রলোক ওঁরা।

ননীবাবুর মেয়ে নিজেই যেদিন শঙ্করবাড়ি থেকে প্রথম বাপের বাড়ি এল, সেদিন মেয়ের মুখ থেকেই ঘটনার কথা জানতে পেরেছিলেন ননীবাবু ও তাঁর স্ত্রী। খুব বেশি আশ্চর্য হয়েছিলেন ছুজনেই, হিমু দত্তের মনটা কি মানুষের মন? মানুষ এত ভালও হয়? পরের জন্ম মানুষ এতটা সহ্যও করে!

হিমুকে ডেকে ননীবাবু হিমুর উপর বেশ রাগ করে বলেছিলেন—ওসব কথা সহ্য করা তোমার খুবই ভুল হয়েছে হিমু, ওদের মুখের উপর শক্ত করে ছ'চারটে কথা, তোমারও বলে দেওয়া উচিত ছিল। তাতে যদি বিয়ে ভেঙে যেত, তবে যেত। আমি কোনো পরোয়া করতাম না।

চোখের ছানি অপারেশন করবার জন্ম পাটনা যাবার কথা ভেবে যেদিন ছুশ্চিন্তা করেছিলেন অনাধবাবু, সেদিন অনাধবাবুর ছেলে মণ্টুই অনাধবাবুকে মনে পড়িয়ে দিল—ভাবছো কেন বাবা?

অনাধবাবু—ভাবতে হচ্ছে রে মন্টু। আসানসোলে হারুক লিখেছিলাম ; কিন্তু হারু জানিয়েছে, এখন ছুটি পাবে না। আসতেই পারবে না। হারুর এখন ডিপোর্টমেন্টাল পরীক্ষা।

মন্টু বলে—হিমুদাকে একবার বললেই তো...

—হ্যাঁ, হ্যাঁ! মন্টুর মা'ও খুশি হয়ে চৌঁচয়ে ওঠেন।—হিমু থাকতে ভাবনা করছো কেন?

অনাধবাবুরও মনে পড়ে যায়, ঐ হিমুই যে গত মাসে নিত্যানন্দবাবুর ছেলেটার কার্বস্কল অপারেশন করাবার জন্তু ছেলেটাকে কলকাতায় নিয়ে গিয়েছিল। নিত্যানন্দবাবু নিজে বাতের ব্যাথায় অনড় হয়ে ঘরে পড়ে আছেন। বাড়িতে দ্বিতীয় একটা মানুষ নেই যে ছেলেটাকে কলকাতায় নিয়ে যেতে পারে। একটা কার্বস্কল রুগীকে ভালভাবে নিয়ে যাওয়াও তো যা-তা কাজ নয়। তা ছাড়া অনেক কারণ আছে, যে-জন্তু নিত্যানন্দবাবুর মেজ শ্যালক মশাই এত কাছে, ঐ জগদীশপুরে থাকতেও এই দায়িত্বটা নিতে রাজি হলেন না। নিজের শরীরের অস্থির ছুতো ক'রে কাজের দায় এড়িয়ে গেলেন। কে জানে, অপারেশনের পর কি হবে পরিণাম? ছেলেটা যদি মরে যায়? যদি নিয়ে যাবার পথেই ছেলেটার মরণ-টরণ হয়ে যায়, তবে? তবে ছেলের বাপ-মা'র সন্দেহ অভিষাপ আর খোঁটা যে সারা জীবন ধরে সহ্য করতে হবে। এ ধরনের ভয়ানক ঝঞ্জাটের মধ্যে না যাওয়াই ভাল।

নিত্যানন্দবাবুর কাছেই শুনেছিলেন অনাধবাবু—হিমু না থাকলে আমার ছেলেটা মরেই যেত অনাধবাবু। আমি তো প্রথমে বিশ্বাসই করতে পারিনি যে, হিমু এই ভয়ানক দায়িত্ব নিতে রাজি হবে। কিন্তু, কি আশ্চর্য, একবার অনুরোধ করা মাত্র হিমু রাজি হয়ে গেল। আরও কি কাণ্ড করেছিল হিমু, জানেন?

—কি কাণ্ড?

—অদ্ভুত রেসপন্সিবিলাটি বোধ! হাসপাতালের ডাক্তারদের ধরাধরি করে স্পেশাল পারমিশন নিয়ে দশটা দিন হাসপাতালেরই ওয়ার্ডের বারান্দায় কয়ল পেতে একটা ঠাই করে নিয়েছিল হিমু!

ছেলেটার কাছ থেকে একঘণ্টার জন্তোও দূরে সরে থাকতে পারেনি।

অনাথবাবুর আহ্বান, একটা অন্ধ মানুষকে পাটনা পর্যন্ত নিয়ে যাবার আহ্বান! তার মানে সব সময় অনাথবাবুকে হাত ধরে ওঠাতে বসাতে আর চলাতে হবে। মন্টুর মা কেঁদেই ফেলেছিলেন।—তুমি পারবে তো হিমু?

হিমু বলে—পারি কিনা দেখতেই পাবেন।

মন্টুর মা-ও সঙ্গে ছিলেন, এবং গিরিডি থেকে পাটনা পর্যন্ত সারাটা পথ যেতে যেতে স্বচক্ষেই দেখতে পেয়েছিলেন, হিমু নামে এই ছেলেটা পরের জন্তু, অকারণ এবং কোনো উপকার আশা না করে, একটা পয়সা না ছুঁয়েও কি করতে পারে।

ঘন ঘন সিগারেট খাওয়ার অভ্যাস আছে অনাথবাবুর। মন্টুর মা নিজেই দেখলেন, যতবার সিগারেট খেলেন অনাথবাবু, ততবার হিমুই দেশলাই জ্বলে সিগারেট ধরাতে সাহায্য করলো। হিমুই অনাথবাবুকে সাবধান করে দেয়—খবরদার জেঠামশাই, নিজে দেশলাই জ্বলে সিগারেট ধরাতে চেষ্টা করবেন না। মুখে ছেঁকা লেগে যাবে। যখনই দরকার হবে, আমাকে বলবেন।

হিমু দত্তেরই-বা এত সময় হয় কি করে? ওর জীবনটা কি একটা অফুরান অবসরের, কিংবা খাওয়া-পরার ভাবনা থেকে মুক্ত একটা নিরুদ্দিগ্ন কর্মহীন জীবন? দরজার পাশে দেওয়ালের গায়ে ছোটো কাঠের ফলকে ওর একটা কাজের পরিচয়ও যে লেখা আছে। ডাক্তার, ডাক্তার হিমাঙ্গিশেখর দত্ত। কিন্তু ডাক্তারী করে কখন? কেউ কি আজ পর্যন্ত হিমু দত্তকে কোনোদিন ডাক্তারী করতে দেখেছে? হিমু দত্তের ঘরের ভিতর একটা তক্তাপোষের উপর হোমিওপ্যাথি ওষুধের একটা বাস্তু অবশ্য আছে, চিকিৎসার একটা বইও আছে। এই দুই জিনিস অনেকেরই চোখে পড়েছে। কিন্তু রোগী দেখছে হিমু দত্ত কিংবা রোগীকে ওষুধ দিচ্ছে হিমু দত্ত, এমন দৃশ্য আজ পর্যন্ত কারও চোখে পড়েনি।

কে না জানে, চার বাড়িতে ছেলে পড়ায় হিমু দত্ত। সকাল বেলা

ছ'বাড়ি, সন্ধ্যাবেলা ছ'বাড়ি। হিমু দত্তের বিছের জোর কত আর কেমন, এ প্রশ্নও কেউ করেনি। হিমু দত্ত যাদের পাড়ায়, তাদের বয়স চার-পাঁচ বছরের বেশি নয়, বিছো নামে কোনো বস্তুই যাদের মনে মাথায় বা চোখের চাহনিতে নেই। ছেলে-মেয়েদের বয়স যখন সাত-আট হয়, এবং ছেলে-মেয়েদের বিছো শেখাবার জন্য বাপ-মায়েরা যখন সত্যিই সিরিয়াম হন, তখন শুধু হিমু দত্তকে ছাড়িয়ে দিয়ে একটু ভাল শিক্ষিত মাস্টার রাখবার কথা মনে পড়ে। হিমু দত্তকে ছাড়িয়ে দেওয়া হয়। কিন্তু সেজন্য হিমু দত্তের মনে কোনো দুঃখ নেই। কারণ, সেইদিনই অল্প এক বাড়িতে একেবারে বিছাশূন্য এবং শুধু হাতে খড়িতে অভিজ্ঞ চার-পাঁচ বছর বয়সের ছেলে-মেয়েকে পড়াবার নতুন একটা কাজ পেয়ে যায় হিমু দত্ত।

তাছাড়া, হিমু দত্ত সত্যিই পড়ায় কিনা, সেটুকু খোঁজ রাখার দরকার যেন কোনো বাপ-মা অনুভব করেন না। ছেলে-মেয়ে কটা নতুন বানান শিখলো, এবং ছ-এর ঘর নামতাটুকু আয়ত্ত করলো কিনা, মাস্টার হিমু দত্তের কাছে এই সামান্যতম দাবীর প্রশ্নও যে কারও নেই। ছেলে-মেয়েগুলো ছোটো ঘণ্টা হিমু দত্ত নামে মাস্টারের কাছে চুপ করে বসে থাকে, তাই যথেষ্ট। পড়ার অভ্যাসটা গড়ে উঠছে, এখন এর চেয়ে বেশি আর দরকারই বা কি?

কাঠের ফলকে ডাক্তার কথাটা এত স্পষ্ট করে লেখা থাকলেও হিমুকে কোনোদিন ডাক্তার বলে ভাবতেই পারেনি শহরের মানুষ, বিশেষ করে ভদ্রলোকেরা। বরং হিমু মাস্টার বললে সকলেই বুঝতে পারে, ঐ সেই ছেলেটি, দেখতে মন্দ নয়, স্বভাবটি বড়ো শান্ত, বড়ো কর্মঠ, আর কেমন একটু, অর্থাৎ ঠিক বোকা নয়, একটু বোকা-বোকা। অর্থাৎ খুব বেশি ভালমানুষ হলে যা হয়, তাই।

হিমু দত্তের ডাক্তারীটা কি সত্যিই একেবারে অস্তিত্বহীন একটা কথা মাত্র? ভদ্রলোকেরা জানেন না, কিন্তু বস্তির কেউ-কেউ মুচি পাড়ায় অনেকেই এবং শহর থেকে বেশ দূরে কয়েকটা গাঁয়ের তুরী আর দোসাদদের মধ্যে কেউ কেউ জানে, একটা টাকা হাতে তুলে দিলে

কোনো আপত্তি না করে হিমাদারি বাবু ডাগদারি করে চলে যাবে।
হেঁটেই চলে আসবে; টাঙ্গা ভাড়া চাইবে না। ওষুধ দিলে বড়ো জোর
হয় আনা দাম চাইবে, তার বেশি নয়।

কিন্তু হোমিও হিমু কোনো রোগীকে সত্যিই ওষুধ খাওয়াবার সুযোগ
পেয়েছে কিনা সন্দেহ। যারা ডাগদারির নামে ভয় পায়, ডাগদারিকে
ভয়ানক সন্দেহ করে, যাদের ডাগদারিতে কোনো বিশ্বাস নেই, তারাই শুধু
হোমিও হিমুকে ডাক দেয়। ভুগে ভুগে মরণদশার শেষ অধ্যায় পৌঁছে
রোগী যখন ধেমে ধেমে শ্বাস টানে, তখন ডাক পড়ে হোমিও হিমুর।
আর, হিমু দত্ত একেবারে তৈরি হয়েই রওনা হয়। পকেটে ওষুধের
শিশি থাক বা না থাক, একটি লুঙ্গি আর একটি গামছা সঙ্গে নিয়ে যেতে
কখনও ভুলে যায় না হিমু দত্ত। জানে হিমু দত্ত, রোগীর মরা মুখ
দেখতে হবে, মৃতের শ্মশানযাত্রা এবং দাহকার্যে একটু আধটু সাহায্য
করে এবং একেবারে স্নান সেরে আসতে হবে।

এক বছর আগেও এই গিরিডির কোনো পাড়াতে হিমু দত্তকে ঘুরে
বেড়াতে কেউ দেখেনি! কবে হিমু দত্ত এখানে এল, আর লোহার
পুলের পূর্বদিকের ঐ সরু রাস্তার ধারে একটা করে ঠাই নিল, তাও কেউ
মনে করতে পারে না। কোথা থেকে এসেছে হিমু দত্ত তাও কেউ জানে
না।

হিমু দত্ত একটা হঠাৎ আবির্ভাব। দরজার পাশে ঐ প্রকাণ্ড নামের
কলক দেখে প্রথম প্রথম যারা আশ্চর্য হয়ে খোঁজ নিয়েছিল, তারাও
আজকাল আর আশ্চর্য হয় না। মানুষটা নামেই প্রকাণ্ড, কিন্তু জীবনে
একেবারে সামান্য। ডাকপিয়নও আশ্চর্য হয়ে যায়। পাড়ার সব মানুষের
নামে মাসে অন্তত একটা না একটা চিঠি আসে, কিন্তু হোমিও হিমুর
নামে একটাও না। আপনজন বলতে পৃথিবীতে ওর কি কেউ নেই?

আরও আশ্চর্যের কথা, এক বছরের মধ্যে শহরের এতগুলি মানুষের
ঘরোয়া জীবনের সঙ্গে এত পরিচিত হয়ে উঠলেও হিমু যেন একটা এক-
ঘরে প্রাণীর মতো পড়ে আছে। কেউ একবার জানতেও চেষ্টা করেনি,
একটা প্রশ্নও করেনি, তুমি এর আগে কোথায় ছিলে হে হিমু? তোমার

দেশ কোথায়? বাপ-মা কোথায় আছেন? সত্যিই আছেন কি? না, বিগত হয়েছেন? ছোটো ভাই-বোন আছে কি? বিয়ে-টিয়ে করে ফেলেছ কি?

কেউ না; এই এক বছরের মধ্যে হিমু দত্ত কোনো মানুষের কাছ থেকে এতটুকু কৌতুহলও আকর্ষণ করতে পারেনি। হিমু দত্ত শুধু হিমু দত্ত। ভাড়া ঘরে থাকে, আপন ঘর নেই। কিন্তু এপাড়া আর ওপাড়ার সব ঘরই যেন ওর ঘর। কেউ একবার ডেকে একটা কথা বললেই হিমুর মুখের ভাষার সেই ব্যক্তি সেই মুহূর্তে একটা না একটা আপনজন গোছের মানুষ হয়ে যায়। হয় কাকাবাবু, মেশোমশাই, জেঠামশাই আর পিসেমশাই, কিংবা মামাবাবু। নয় বড়দা মেজদা সেজদা ও ছোড়দা। ঠাকুমা ও দিদিমা পাতিয়ে ফেলতেও একটুও দেরি হয় না হিমু দত্তের।

ওভারসিয়ার বাবুর মা হিমু দত্তকে চিনতেন না। পথে দেখা হতে তিনিই একদিন ভুল করে ডাক দিয়ে বলেছিলেন—তুমি তো আমাদের টুনকির ভাসুরপো?

সেই মুহূর্তে উত্তর দিয়েছিল হিমু দত্ত—না দিদিমা, আমি হিমাজি।

—তুমি বারগুয়ায় থাক?

—না। আমি ওদিকের ঐ লোহার পুলের দিকে থাকি।

—বলি, তুমি কি গিরিডির ছেলে?

—হ্যাঁ, এখন তো তাই।

—কি আশ্চর্য, হিমাজি টিমাজি নাম তো কখনো শুনিনি।

হিমু দত্ত হাসে—আমি হিমু।

চোখ বড়ো করে হেসে ওঠেন দিদিমা—তাই বল। তুমিই হিমু?

—হ্যাঁ দিদিমা।

—তা হলে আমার একটু কাজ করে দে না ভাই।

—বলুন।

আজ সন্ধ্যায় একবারটি এসে আমাকে মকতপুরে সান্ত্বালদের বাড়িতে কীর্তন শুনিয়ে নিয়ে আসবি? রাত্রিবেলা আমি চোখে বড়ো ঝাপসা দেখি রে ভাই, একা পথ চিনে বাড়ি ফিরতে পারি না।

—বেশ, কিন্তু আপনি কোথায় থাকেন দিদিমা ?

—ওরে আমি যে হাবুল ওভারসিয়ারের মা ।

—ঠিক আছে ।

হ্যাঁ, ঠিক যেমন স্পষ্ট করে কথা দিয়েছিল হিমু, তেমন একেবারে ঠিক সময়ে এসে প্রতিশ্রুতি পালন করে চলে গিয়েছিল ।

মকতপুরে সান্যালদের বাড়ি থেকে কীর্তন শুনে বাড়ি ফেরবার পথে দিদিমা অনেক গল্প করলেন ।—হাবুলের বাবা বেঁচে থাকলে আজ আর আমাকে হেঁটে চলতে হতো না ভাই । তিনি ছিলেন বুঝি রাজ এন্স্টেটের ম্যানেজার । কত টাকা রোজগার করলেন, আর দান ক'রে ক'রে ক্ষতুর হলেন । মোটর গাড়িটাকে পর্যন্ত বেচে দিয়ে বাংলাদেশের বস্তার চাঁদা পাঠিয়ে দিলেন । হ্যাঁ, তবে, এমন কিছু ছুংখের মধ্যে রেখে বাননি । মেয়েদের বড়ো বড়ো ঘরে বিয়ে দিয়েছেন । মেয়েরা আমাকে সাহায্য করে । সুসমা আছে কলকাতায়, ধীরা কানপুরে আর অনিলা এখন পোয়াতি ; এদিকে জামাই-এর বদলির অর্ডার হয়েছে । বলো দেখি, কি বিপত্তি !

দিদিমা তাঁর ঘরোয়া জীবনের কাহিনী শেষ করলেন, যখন ঘরের দরজার কাছে পৌঁছালেন । কিন্তু জিজ্ঞাসা করতে ভুলেই গেলেন, হিমু নামে এই মানুষটার ঘরোয়া সুখ ছুংখের কোনো সংবাদ, কোনো পরিচয় । মনেই পড়ে না কারও, হিমু দত্তেরও কোনো ছুংখ থাকতে পারে, কিংবা হিমু দত্তেরও জীবনের হয়তো একটা সুখের ইতিহাস আছে । আশ্চর্যের ব্যাপার, হিমু দত্তকে কি সত্যিই একেবারে সুখ-ছুংখের অতীত একটা স্বয়ম্ভু সত্তা বলে মনে করে সবাই ?

শহরের জীবনে সারা বছরের মধ্যে অনেক উৎসবও দেখা দেয় । পারিবারিক উৎসব । অমুকের মেয়ের বিয়ে । অমুকের ছেলের বৌ-ভাত কিংবা অমুকের বাবার শ্রাদ্ধানুষ্ঠান উপলক্ষ্যে ভোজের নিমন্ত্রণ । কিন্তু হিমু দত্ত সবারই এত পরিচিত হয়েও কি সব উৎসবে নিমন্ত্রণ পায় ? না । ননীবাবুর মেয়ের বিয়েতে অবশ্যই নিমন্ত্রিত হয়েছিল হিমু দত্ত । এবং মর্কটুর পৈতের সময় অনাথবাবু নিজে হিমু দত্তের ঘরে এসে নিমন্ত্রণ

করে গিয়েছিলেন। যাদের কাজের দরকারে হিমু দত্ত খেটেছে, তাদের কোনো উৎসবের দিনে তারা হিমু দত্তকে স্মরণ করতে ভুলে যায় না। কিন্তু তা ছাড়া আর কেউ না। এই তো গত ফাল্গুন মাসে মাইকা মার্চেন্ট রামসদয়বাবু তাঁর মা-এর শ্রাদ্ধের ঘটা দেখাতে গিয়ে গর্ভ করেই বলেছিলেন, গিরিডির একটি বাঙ্গালীও নিমন্ত্রণে বাদ পড়বে না। আর এক প্রকাণ্ড লিস্ট ক'রে রামসদয়বাবুর চার ছেলে গিরিডির সব পাড়া ঘুরে প্রত্যেক বাঙ্গালীকে, বাড়িমুদ্র সবাইকে নিমন্ত্রণ ক'রে এসেছিল। এমন কি ডাক বাংলাতে, ধর্মশালাতে আর হোটেলগুলিতেও খোঁজ নেওয়া হয়েছিল, কোনো বাঙ্গালী সেখানে আছে কিনা। যারা ছিল, তারা সবাই নিমন্ত্রিত হয়েছিল। পোষ্টমাষ্টার নাগেশ্বরবাবু, যিনি বিহারী কায়স্থ, কিন্তু গৃহিণী হলেন বাঙ্গালী মহিলা, তিনিও নিমন্ত্রিত হলেন। অথচ লোহাপুলের পূর্বদিকে সরু সড়কের ধারে একটি ক্ষুদ্র ঘরের দরজার পাশে দেওয়ালের গায়ে কাঠের ফলকের উপর লেখা এত বড়ো একটা বাঙ্গালী নাম কারও চোখেই পড়লো না। বাদ পড়লো শুধু হোমিও হিমু।

রাগ করেনি হিমু দত্ত। এর জন্ত কোনো ক্ষোভ আর কোনো অভিমানে বিচলিত হয়নি হিমু দত্তর মন। সন্দেহ হতে পারে, হিমু দত্ত নিজেকে বাঙ্গালী বলে মনে করে কিনা।

যাই মনে করুক হিমু, কিন্তু হিমু দত্তের স্বভাব আর আচরণ যে বাঙ্গালী অবাঙ্গালী প্রভেদটুকুর ধার ধারে না, তার প্রমাণও একদিন পাওয়া গেল।

নবলকিশোরবাবু ওকালতি করেন। গোঁড়া সনাতনী মানুষ। অনেকদিন আগে সরদা আইনের বিরুদ্ধে সত্যগ্রহ করবেন বলে তৈরি হয়েছিলেন। এ হেন মানুষও এমন এক সমস্যায় পড়লেন, যে সমস্যার সমাধানে তিনি শেষ পর্যন্ত হিমু দত্তকেই স্মরণ করতে বাধ্য হলেন।

নবলকিশোরবাবুর মেয়ে কৃষ্ণা। কৃষ্ণাকে বার বছর বয়সেই বিয়ে দেবার জন্ত উঠে পড়ে লেগেছিলেন নবলকিশোরবাবু, কিন্তু কৃষ্ণার মার কঠোর আপত্তিতে শেষ পর্যন্ত উৎসাহ হারিয়েছিলেন। শুধু তাই নয়,

কৃষ্ণার লেখাপড়া শেখার চেষ্টাকেও বাধা দিতে পারেননি কৃষ্ণার মার জেদের জন্মই। কৃষ্ণার মার এই পরিকল্পনার বিরুদ্ধে বিদ্রোহ করে শেষে শাস্ত হয়ে গেলেন নবলকিশোরবাবু।

কৃষ্ণার বয়স সত্তর-আঠার, দেখতে বেশ বড়ো-সড়ো, এবং সেটা ভাল স্বাস্থ্যের জন্মই। এই মেয়েকে শাস্তিনিকেতনে পৌঁছে দিয়ে আসতে হবে। কিন্তু দিয়ে আসবে কে ?

নবলকিশোরবাবু নিজে যেতে পারবেন না। ট্রেনে চড়লেই তিনি বমি করে ফেলেন। শরীর ভয়ানক অসুস্থ হয়ে যায়। কৃষ্ণার কাকা বা দাদা কেউ গিরিডিতে নেই, নিকটেও নেই। ছ'জনেই আর্মড ফোর্সের সার্ভিসে পুনাতে আছে। অতএব ?

এক্ষেত্রে কৃষ্ণার মার উদারতাটাও ভয়ানক সাবধান। জুনিয়র উকিল আউধবিহারী নিজেই যেচে নবলকিশোরবাবুর কাছে প্রস্তাব করেছিল, যদি দরকার মনে হয়, তবে আমিই কৃষ্ণাকে শাস্তিনিকেতনে পৌঁছে দিয়ে আসতে পারি। কৃষ্ণার মা বললেন—না।

সম্পর্কে আত্মীয় হয়, ত্রিভ্রমোহনবাবুর ছেলে দেবকীহুলালের কথাও মনে পড়েছিল। না, কৃষ্ণার মা বেশ কিছুক্ষণ ভেবে নিয়ে আপত্তি করলেন। এবং কৃষ্ণার মা নিজেই একদিন মন্দির থেকে ফিরে এসে নবলকিশোরবাবুর কাছে বললেন—মর্টুকা মা কহতি হয় কি...

—কি ? কেয়া কহতি হয় ? প্রশ্ন করেন নবলকিশোরবাবু।

কৃষ্ণার মা বলেন—কহতি হয় কি হিমুকো বোলো। বস, অউর কুছ সোচনে কা বাত নেহি।

কৃষ্ণাকে শাস্তিনিকেতনে পৌঁছে দিয়ে আসুক হিমু। হিমুকে ডাকা হোক। হিমু নামে ছেলেটির মতিগতি সম্বন্ধে কৃষ্ণার মার এই অদ্ভুত নির্ভর নির্ভরতা আর বিশ্বাসের রকম দেখে আশ্চর্য হয়ে গেলেন নবলকিশোরবাবু। কিন্তু রাজি হলেন।

কৃষ্ণাকে শাস্তিনিকেতনে পৌঁছে দিয়ে হিমু যেদিন ফিরে এসে নবলকিশোরবাবুর সঙ্গে দেখা করলো আর যাওয়া আসার খরচের হিসাব দাখিল করলো, সেদিন একবারে অবাক হয়ে হিমুর মুখের দিকে কিছুক্ষণ

তাকিয়ে রইলেন নবলকিশোরবাবু। তারপর বললেন—এ বেটা, তু নে কেয়া কিয়া ?

হিমু বলে—কি করেছি চাচাজী ?

হিসাব দেখে আশ্চর্য হয়েছেন নবলকিশোরবাবু। কৃষ্ণা ট্রেনের ডাইনিংকারে গিয়ে ছ'বার খেয়েছে। খরচ পড়েছে ছ'টাকা দশ আনা। আর হিমু যেতে আসতে শুধু চারবার পুরি-তরকারী খেয়েছে, খরচ হয়েছে দেড় টাকা।

নবলকিশোরবাবু—তু বেটা এক পিয়ালি চা ভি নেহি পিয়া ?

—আমি চা খাই না চাচাজী।

শান্তিনিকেতন থেকে কৃষ্ণার প্রথম চিঠি পাওয়ার পর নবলকিশোরবাবুর সনাতনী চোখের শেষ সন্দেহের লেশটুকুও যেন প্রচণ্ড খুশির চমক লেগে নিশ্চিহ্ন হয়ে গেল। কৃষ্ণার মা বললেন—অব্ বোলো, অ্যায়সা লেড়কা দেখা কভি ?

কৃষ্ণা লিখেছে, হিমু ভাইজীকে আমার বহুৎ বহুৎ নরস্কার জানাবে। পথে আমার একটুও কষ্ট হয়নি। হিমু ভাইজী আমাকে একটুও কষ্ট পেতে দেয়নি। যতবার আমার জল তেষ্ঠা পেয়েছে, ততবার নিজে ব্যস্তভাবে ছুটে গিয়ে গার্ডের কামরা থেকে ভালো জল নিয়ে এসেছে, আমাকে পানিপাঁড়ের হাতের ময়লা জল খেতে দেয়নি।

হিমু দত্ত নামে মানুষটার আত্মা আছে ঠিকই, কিন্তু সেটা বোধহয় একটা আত্মা মাত্র। না বাঙ্গালী, না বিহারী, না অগ্র কিছু। নবলকিশোরবাবু না, কৃষ্ণার মাও না, ছ'জনের কেউ মনে করতেই পারেন না যে, হিমু দত্ত বিহারী নয়, বাঙ্গালী।—হিমু তো বিলকূল হিমুই হয়। নবলকিশোরবাবু আশ্চর্য হয়ে যে অর্থহীন কথাটা বলেন, সেটাই বোধহয় হিমুর সবচেয়ে সার্থক পরিচয়।

কৃষ্ণার মার কাছ থেকেই গল্পটা, অর্থাৎ কৃষ্ণার চিঠির কথাগুলি শুনতে পেলেন মন্টুর মা। তারপর আরও অনেকে শুনলেন। হিমুর কাছে বিশ্বাস করে কি না ছেড়ে দেওয়া যায় ? নইলে নবলকিশোরবাবুর মতো গৌড়া মানুষ তাঁর মেয়েকে, কৃষ্ণার মতো একটি সুন্দর আঠার

বছর বয়সের মেয়েকে নিশ্চিত মনে হিমুর কাছে ছেড়ে দিতে পারতেন না।

হিমু দত্তের একটা নতুন সুখ্যাতি অনেকেরই মুখের কথায় গুন-গুন করে। বড়ো ভালো ছেলে। একেবারে নির্দোষ স্বভাব। এবং পূজোর ছুটির পরে হিমুর এই সুখ্যাতির গল্পটা অনেকেই স্মরণ করতে বাধ্য হয়। কারণ, সমস্যা দেখা দিয়েছে। এক বাড়ির সমস্যা নয়, এপাড়া আর ওপাড়া নিয়ে পাঁচ বাড়ির সমস্যা। নিভার বাবা ভাবেন, প্রমীলার মা ভাবেন, সরযুর দাদা ভাবেন, কল্যাণীর মা ভাবেন, এবং অতসীর কাকিম্মা ভাবেন। মেয়েগুলিকে কলকাতায় পৌঁছে দেবার সেই সমস্যাটা আবার কঠিন হয়ে দেখা দিয়েছে।

কলেজের ছুটির আগে এবং পরে, এই সমস্যাটা দেখা দেয়। এবং উপায় চিন্তা করতে করতে হররান হতে হয়। কোনো বাড়ির বাপ-মা বা অভিভাবক, কেউ পছন্দ করেন না যে, মেয়েটা একা-একা যাওয়া-আসা করুক। মেয়েরাও চায় না। ট্রেন যাত্রার হররানিকে ওরা ভয় করে এবং একা একা যাওয়া-আসা করতেও ভয় করে। কে পৌঁছে দিয়ে আসবে? কে নিয়ে আসবে? কার এত সময় আছে? প্রত্যেকবার এই অসুবিধার প্রকোপে পড়ে মেয়েগুলির যাওয়া-আসার তারিখ পিছিয়ে দিতে হয়। ছুটি শেষ হয়, তবু নিভা কলকাতা রওনা হতে পারে না। কখনো বা ছুটি আরম্ভ হয়ে যায়, ছুটির চারটে দিন পার হয়ে যায়, কলকাতার ছাত্রী হোস্টেল থেকে প্রমীলার ছোটো রাগস্তু চিঠি এসেও যায়, তবুও প্রমীলার মা মেয়েকে কলকাতা থেকে আনবার ব্যবস্থা করে উঠতে পারেন না।

কিন্তু এবছর পূজার ছুটি ফুরিয়ে যাবার দিনটাকে কাছে এগিয়ে আসতে দেখেও চিন্তা করতে ভুলে গেলেন সবাই। কারণ, সবারই মনে পড়েছে হিমু আছে। হিমু থাকতে চিন্তা করবার কি আছে?

সব মেয়ে এক কলেজে পড়ে না, এবং সবারই কলেজের ছুটি একই দিনে ফুরোয় না। কাউকে ছুদিন আগে রওনা হতে হয়, কাউকে ছুদিন পরে। সরযু যার সবার শেষে।

এটাও একটা সমস্যা। হিম্মু কি দফার দফায় কলকাতা দৌড়বে আর আসবে? পাঁচটি ছাত্রীই কি একত্র হয়ে হিম্মুর সঙ্গে যেতে পারে না।

ব্যবস্থা হয়, সবাই একই দিনে একই সঙ্গে যাবে। নিভাকে আর প্রমীলাকে সোজা হোস্টেলে তুলে দিয়ে হিম্মু অতসীকে মির্জাপুর স্ট্রীটের মাসিমার বাড়িতে, কল্যাণীকে বালিগঞ্জ বড়দির বাড়িতে, আর সরষুকে আলিপুরে ছোটমামার বাড়িতে পৌঁছে দিয়ে আসবে।

তা তো হলো। কিন্তু হিম্মু কি সেদিনই কলকাতা থেকে গিরিডি ফিরে আসবে?

না। কল্যাণীর মামা বলেন—না! অতসীর কাকিমা বলেন—না! সরষুর দাদা বলেন—না। তোমাকে আরও কয়েকটা দিন কলকাতায় থাকতে হবে হিম্মু। তুমি নিজে মেয়েটাকে একেবারে হোস্টেলে তুলে দিয়ে তারপর গিরিডি রওনা হবে।

মেয়ে পৌঁছবার এই বিচিত্র জটিল দায় এক কথায় স্বীকার করে নিতে একটু আপত্তি করে না হিম্মু।

হিম্মুদা! হিম্মুদা! হিম্মুদা! শহরের পাঁচ মেয়ে কলকাতা রওনা হবার দিন স্টেশনে বিচিত্র কলরবে মদুথর, একটা দৃশ্যও দেখা দিল।— হিম্মুদা আমার ব্যাগটা কোথায়? হিম্মুদা আমার ছাতাটা কোথায়? এক প্যাকেট লঞ্জেস নিতে ভুলবেন না হিম্মুদা।

ডাকটা হিম্মুদা বটে, এবং একটা আপনছের ডাকও বটে; কিন্তু সত্যিই দাদা বলে কেউ কি হিম্মুকে সন্ত্রম করছে? হিম্মুর গায়ে ঠেলা দিয়ে কথা বলতেও প্রমীলার হাতে একটুও বাধে না। পাঁচটি ছাত্রীর কলকাতা যাত্রার উল্লাসের মধ্যে একমনে অবাধ নিষ্ঠার সঙ্গে শুধু ফাই-ফরমাস খাটতে থাকে হিম্মু। কেউ কারও জিনিস-পত্রের দিকে ভুলেও একটা পাহারার দৃষ্টি তুলে তাকায় না। এমন কি বাপ-মা কাকা ঝাঁরা স্টেশনে এসেছেন তাঁরাও না! তাঁরা মেয়ের কানের কাছে উপদেশ বর্ষণ করতেই ব্যস্ত।—পৌঁছেই চিঠি দিবি। সাবধান, শীতটা পড়লেই গরম জলে স্নান করতে যেন ভুল না হয়।

বাক্স গোনো হিম্মু। খাবারের বুড়িগুলিকে গুনে একদিকে সরিয়ে

ব্রাথে হিমু। সরযুর ওভারকোট আর কল্যাণীর মাকলার হিমু দত্তের হাতে ঝুলছে। অতসী তার হাতের ছোটো ব্যাগটাকেও হিমু দত্তের হাতের দিকে এগিয়ে দেয়। ব্যাগ হাতে তুলে নেয় হিমু। অতসীও এইভাবে হাত খালি করে নিয়ে খোঁপাটাকে নাড়াচাড়া ক'রে একটু গুছিয়ে নেয়।

স্টেশনেই, এবং ট্রেন ছাড়বার আগেই পাঁচ মেয়ের দাবীর এই ব্যাপার! বাকি পথে তাহলে কি কাণ্ডই যে হবে অনুমান করতে পারেন বাপ মা আর কাকা মামারা। ভাবতে গিয়ে হেসেও কেলেন। আলোচনাও করেন, সত্যিই এরা হিমুকে পেয়েছে কি! ভালো মানুষ বলে একেবারে ওকে দিয়ে পান পর্যন্ত সাজিয়ে নেবে?

হিমু দত্ত যে একটা পুরুষ মানুষ, হিমু দত্তের জীবনের এই সহজ ও সামান্য সত্যটুকুও কি ওরা মনে রাখতে পারে না? কোনো হিমিদির প্রতি ওদের মনে যেটুকু সমীহ আর ভয় থাকে, তার দশভাগের এক ভাগও যদি হিমুদা নামে এই পুরুষ মানুষটার প্রতি থাকতো! কিন্তু হিমু দত্তের সম্পর্কে কারও চিন্তায় এরকম কোনো প্রশ্নেরই বলাই যেন নেই!

হিমু দত্তের বয়সটাও যে পঁচিশ-ছাব্বিশের বেশি নয়, এই সত্যও যে এতগুলি মেয়ের মধ্যে কোনো মেয়ে মনে রাখতে পারে না। প্রমীলার ওভারকোটের পকেটের মধ্যে একটা রুমাল রয়েছে, সেট মাথানো রুমাল। একটা মুহূর্তের মতোই সাবধান হয়ে ভাবতে পারেনি প্রমীলা, ঐ রুমালের সৌরভ হিমু দত্তের নিশ্বাসের বাতাস স্পর্শ করতে পারে। সরযু তার হাতের যে ছোটো ব্যাগটা হিমু দত্তের হাতে তুলে দিয়েছে, সেই ব্যাগের গায়ে, উপরের খাঁজকাটা খাপের মধ্যে সরযুর মুখের ছোটো একটা স্মৃত্তী কটো বসানো আছে। ভুলেও এক বার ভেবে দেখতে পেরেছে কি সরযু, হিমু দত্তের চোখের উপর ঐ কটোর ছায়া হঠাৎ ঝিক করে ফুটে উঠতে পারে? কি মনে করে ওরা? হিমু দত্তও একটা মেয়ে? কিংবা হিমু দত্ত একটা ব্যক্তি মাত্র, এবং ঐ ব্যক্তির কোনো পৌরুষেরতা নেই?

গিরিডি থেকে কলকাতা পর্যন্ত যেতে ট্রেনের সারাটা পথ হিমুদাকে দিয়ে ওরা কি সব কাণ্ড করিয়েছিল, সে গল্প আর তিন মাস পরেই বাড়ির সকলে শুনতে পেল ; বড়দিনের ছুটিতে হিমু আবার কলকাতায় গিয়ে ওদের যখন নিয়ে এলো ।

হিমুদা কমলালেবু ছুঁলে দিয়েছে, ওরা খেয়েছে । হিমুদা চীনাবাদামের খোসা ভেঙে দিয়েছে, ওরা খেয়েছে । কাণ্ডগুলি করতে ওদের একটুও বাধেনি এবং হিমুরও একটুও আপত্তি হয়নি ।

—হিমুদা বেচারী সত্যিই মাটির মানুষ । কি ভয়ানক উপদ্রবই না আমরা করলাম, কিন্তু হিমুদা শুধু হেসেই সারা হয়ে গেল !

বড়দিনের ছুটিতে বাড়িতে এসে যে-ভাষায় যে-ভাবে হেসে হিমুদার নামে গল্প করে প্রমীলা, প্রায় সেই ভাষাতেই সে-ভাবে হেসে নিজের বাড়িতে গল্প করে সরযু, অতনী, নিভা আর কল্যাণী ।

এ হেন হোমিও হিমুদাই একদিন চমকে উঠলো ; যে নামে তাকে কেউ ডাকে না, সেই নামেই একজন তাকে ডেকে ফেলেছে । হিমাদ্রি-বাবু ! কি আশ্চর্য, হোমিও হিমু নিজেই যে নিজেকে হিমাদ্রিবাবু বলে মনে করতে ভুলে গিয়েছিল । কল্পনাও করতে পারেনি যে, এরকম একটা সম্ভ্রম মিশিয়ে তার নামটাকে ডাকা যায়, এবং কেউ ডাকতে পারে । তা ছাড়া, হিমাদ্রিবাবু বলে ডাকলো যে তার বয়সও যে হোমিও হিমুর বয়সটার তুলনায় খুব কম নয় । হোমিও হিমুর বয়স বড়ো জোর পঁচিশ-ছাব্বিশ । হিমাদ্রিবাবু বলে ডাকলো যে, তার বয়স বড়ো জোর একুশ-বাইশ । হিমুদা নয় ; এমন কি হিমুবাবুও নয়, একেবারে হিমাদ্রিবাবু । একটু বেশি আশ্চর্য হবারই কথা । কারণ, গিরিডিতে এই এক বছরের জীবনে, সব মানুষের সঙ্গে এত মেলামেশা জানাজানি ও চেনাচেনির ইতিহাসে, নিজেকে যে-নামে কোনোদিন শুনতে পায়নি হোমিও হিমু, সেই নাম ধরে ডেকে ফেললো যে, সে একটি মেয়ে । বেশ বড়োলোকের মেয়ে ; বেশ সুন্দরী মেয়ে । বেশ শিক্ষিতা মেয়েও বলতে পারা যায়, কারণ সে এখন কলেজে সায়ের পড়ছে ; সেকেণ্ড ইয়ারে পৌঁছেছে ।

সেই মেয়ের বাবা একটা সমস্যায় পড়েছেন বলেই হোমিও হিম্মুর জীবনে এই নতুন নামে ডাক শোনবার ঘটনাটা দেখা দিয়েছে, নইলে এরকম একটা ডাক বোধহয় জীবনে না-শোনাই থেকে যেত।

উত্তী নদীর কিনারায় একটা ফাঁকা শালবনের কাছাকাছি সুত্তী একটা বাড়ি। চারু ঘোষের বাড়ি—উদাসীন।

বেশ টাকা-পয়সা আছে উকীল চারু ঘোষের, এবং বাড়িটার চেহারাও বেশ রং-চঙে। বাড়িতে যখন তখন গ্রামোফোনের রেকর্ড বাজে, এবং বারান্দার উপর মক্কেলের ভিড়ও লেগে আছে। তাই একটু ভাবতে হয়, এমন বাড়ির নাম উদাসীন রাখা হলো কেন?

চারু ঘোষের জীবনটা মোটেই উদাসীন নয়। অত্যন্ত কর্মব্যস্ত ও চিন্তারত জীবন। চারু ঘোষের বাড়ির ছেলে-মেয়েদের চেহারাও উদাসীন নয়। সব সময়েই হাসছে আর খেলছে, বেশ ছরস্তু খুশির জীবন। তারপর, বড়ো মেয়ে যুথিকা ঘোষের জীবন। ঝকঝক করে চোখ, ঝিকঝিক করে মুখের হাসি আর ঝলমল করে সাজ, যুথিকা ঘোষের জীবনটাকে একটা উচ্ছল আশার জীবন বলেই মনে করতে হয়। উদাসীনতার সামান্য ছায়াও নেই যুথিকা ঘোষের মুখের ভাষায় ও চোখের চাহনিতে।

পৃথিবীতে কারও কাছ থেকে এক পয়সার উপকার নেব না, এবং কাউকে এক পয়সার উপকার দেবও না। এ রকম একটা আদর্শ বাস্তবতার সংসারে সত্যিই সম্ভব কিনা, এ প্রশ্ন আর যারই মনে যত গোলমাল বাধাক না কেন, চারু ঘোষের মনে কোনো গোলমাল বাধাতে পারে না। এ বিষয়ে চারু ঘোষের মনটা একেবারে পরিষ্কার। বিশ্বাস করেন চারু ঘোষ, এই রকম জীবনই হলো আদর্শ জীবন। কারও উপকার নেব না। কারও উপকার করবো না, কারও কাছ থেকে অপকার নিতেও পারবো না। অর্থাৎ সরে থাকবো, যেন কেউ অপকার করবার সুযোগ না পায়। চারু ঘোষকে যারা ভালোমতো জানে, তারা বিশ্বাসও করে। হাঁ, বাস্তবিক, চারু ঘোষ সত্যিই মানুষের উপকার-

অপকারের নাগাল থেকে নিজেকে সরিয়ে নিয়ে গিয়ে অদ্ভুত একটা দার্শনিক অস্তিত্ব সত্য করে তুলতে পেরেছেন।

চারু ঘোষের বাড়িতে কোনো ক্রিয়া-কর্মে, কোনো উৎসবে কারো নিমন্ত্রণ হয় না। চারু ঘোষও কোনো বাড়ির নিমন্ত্রণ রক্ষা করতে যান না। ছেলে-মেয়েদের জন্মদিনে যে উৎসবটা হয়, সে উৎসব নিতান্ত একটা পারিবারিক উৎসব। চিঁড়ের পোলাও রান্না করা হয় এবং বাড়িতেই দুধ ফাটিয়ে ছানা করে আম সন্দেশ তৈরি করেন যুধিকার মা। স্বয়ং চারু ঘোষ, ছুই ছেলে বীরু নীরু, মেয়ে যুধিকা এবং যুধিকার মা; এই পাঁচটি মানুষ ছাড়া বাড়ির আর কোনো মানুষ চিঁড়ের পোলাও ও আম-সন্দেশের স্বাদ গ্রহণ করে না। নিয়মই নেই।

বাড়ির আর মানুষ বলতে শুধু ঠাকুর চাকর বি মালী আর ডাইভার। উদাসীনের উৎসবের দিনেও তারা তাই খায়, যা রোজই খেয়ে আসছে। ডাল ভাত আর একটা তরকারি। চিঁড়ের পোলাও আর আম-সন্দেশ একেবারে স্ট্রিক্টলি শুধু উদাসীনের বাপ-মা আর ছেলে মেয়েদের খাবার টেবিলে পরিবেশন করা হয়।

হ্যাঁ, পরের দাবীর দিকটাও দেখতে ভুল করেন না চারু ঘোষ। সেদিকে তাঁর চোখ অন্ধ নয়, বরং খুবই সজাগ। ডাইভারকে যদি একবার ডাকঘরে পাঠাতে হয়, তবে চারু ঘোষ তাঁর পাণ্টা কর্তব্যও স্বরণ করেন। একটা এক্সট্রা কাজ করেছে ডাইভার, এটা ডাইভারের নিয়মিত কাজের মধ্যে পড়ে না। সুতরাং সেই ডাইভারের এই সামান্য এক্সট্রা কাজের জন্য ডাইভারকে এক পেয়ালা চা ও একটা বিস্কুট খেতে দেন যুধিকার মা। চারু ঘোষ বলেন—পয়সা দিয়ে কাজ নেব; কারও উপকার চাই না। ঠকবো না, কাউকে ঠকাবোও না।

মালী মাসে একদিন বাড়ি যাবার ছুটি পায়। এদিকেও নজর আছে চারু ঘোষের, যেন সত্যিই ছুটিটা অস্বীকার না করে মালী। মাসে একটা দিন ছুটি দেওয়া হবে বলে যখন নিয়ম করা হয়েছে, তখন সে নিয়মের এক চুল এদিক-ওদিক করা চলবে না, ছুটির দিনে মালীকে বাড়ি যেতেই হবে। যদি না যায়, তবে কাজ করতে দেওয়া হবে না।

এবং সারাটা দিন মালীটা উদাসীনের বাগানের এক কোণেই সেই ছোটো টিনের ঘরটার মধ্যে পড়ে থাকলেই বা কি? সেদিন উদাসীনের ভাত ডাল তরকারি খাবার অধিকার থাকবে না মালীর। খায়ও না মালীটা। মালী নিজেই বাজার থেকে নিজের পয়সায় ছাতু কিনে এনে খায়।

যুধিকার মা পাটনা থেকে একটা চিঠি পেয়েছেন, তাইতেই সমস্যাটা দেখা দিয়েছে। যুধিকার পাটনা যাওয়া চাই। আর একটি দিনও দেরি করা চলে না। কিন্তু কে নিয়ে যাবে?

পাটনা থেকে চিঠি দিয়েছেন যুধিকার মামী; জানিয়েছেন, নরেন এখন পাটনায় আছে। আর তিন-চার দিন মাত্র থাকবে। তারপরেই বোম্বাই চলে যাবে নরেন। সুতরাং...বুঝতেই পারছো, এই চিঠি পাওয়া মাত্র যুধিকা যেন পাটনা চলে আসে। তা ছাড়া, যুধিকার কলেজ খুলতেই বা আর কটা দিন বাকি আছে? বোধহয় আর পাঁচ-ছয় দিন হবে। পাটনা তো আসতেই হবে। না হয় পাঁচ-ছয় দিন আগেই এলো।

যুধিকাও এরকম একটা সংবাদ শুনতে পাবে বলে তৈরি ছিল না। পাটনার কলেজ খুলতে আর সাতটা দিন বাকি আছে। যুধিকা জানে, আর ছ'দিন পরে ঠিক সময় মতো মধুপুর থেকে বলাইবাবু চলে আসবেন, এবং যুধিকাকে পাটনা পৌঁছে দিয়ে আসবেন; প্রত্যেকবার কলেজ ছুটির সময় পাটনা থেকে যুধিকাকে নিয়ে আসেন, ছুটি ফুরিয়ে যাবার পর পাটনাতে পৌঁছে দিয়ে আসেন বলাইবাবু। চারুবাবুর মধুপুরের যত বাড়ির ভাড়া আদায়ের সরকার মশাই, সেই বলাইবাবু, যিনি চারুবাবুর বাবার বয়সী, এবং আগে চারুবাবুর বাবার অফিসেই চাকরি করতেন।

এবারও বলাইবাবু সময়মত আসবেন এবং তাঁরই সঙ্গে পাটনা চলে যাবে যুধিকা, এই ব্যবস্থার মধ্যে একটা গুলট-পালট ঘটাবার দরকার হবে, এমন সম্ভাবনা কেউ কল্পনাও করতে পারেনি। চারুবাবু না, যুধিকার মা না, যুধিকাও না। কিন্তু পাটনার মামীর চিঠিটা হঠাৎ চলে আসতেই ফাঁপরে পড়লেন সবাই। সরকার মশাই, অর্থাৎ বলাই-

বাবু তো এখন মধুপুরে নেই। তিনি ধর্মকর্ম করতে পুরী গিয়েছেন, এবং পুরী থেকে ফিরবেন ঠিক সেই দিনের আগের দিনটিতে, যেদিন যুধিকার কলেজ খোলবার কথা। বলাইবাবুর পুরীর ঠিকানাও জানা নেই যে, একটা টেলিগ্রাম করে বলাইবাবুকে অবিলম্বে চলে আসতে বলা যেতে পারে। কিন্তু জানা থাকলে আর টেলিগ্রাম করলেই বা কি? বলাইবাবুর আসতেও তো দুটো দিন সময় লাগবে। তারপর যুধিকাকে নিয়ে পাটনায় পৌঁছতে আর একটা দিন লাগবে। ততদিন নরেন আর পাটনায় থাকবে না। তাহলে...নরেন যদি যুধিকাকে চোখে না দেখেই চলে যায়, তবে কেমন করে জানতে পারা যাবে যে, যুধিকাকে বিয়ে করবার জন্ম এতদিনে সত্যিই তৈরি হয়েছে নরেন? যুধিকার মামী জানেন, যুধিকা আজও নরেনের কাছ থেকে স্পষ্ট করে ওকথাটা শুনতে পায়নি।

নরেনের সঙ্গে যুধিকার বিয়ে হবে বলেই আশা করেন চারুবাবু, যুধিকার মা এবং যুধিকার পাটনার মামী। কিন্তু বিয়ে নাও হতে পারে, এমন আশঙ্কাও আছে। তিন বছর ধরে প্রত্যেক ছুটিতে বোম্বাই থেকে যখন পাটনাতে আসে নরেন, গর্দানিবাগে যুধিকার মামার বাড়িতে নরেনের নিমন্ত্রণ হয়, এবং নরেন নিমন্ত্রণ রক্ষা করতে এসে যাকে দেখতে পাবে বলে আশা করে, সেই যুধিকাকে দেখতেও পায়। কোনো সন্দেহ নেই, যুধিকাকে ভালোবাসে নরেন। কিন্তু ভালোবাসেও আর কতকাল অপেক্ষা করতে চায় নরেন?

করুক না অপেক্ষা, চারুবাবুর কোনো আপত্তি নেই। যুধিকার এই তো সেকেণ্ড ইয়ার চলেছে। যুধিকা ছাত্রী ভালো। যতদিন নরেন অপেক্ষা করবে, ততদিন যুধিকার কলেজের পড়ার জীবনও চলতে থাকবে। সেটাও এক রকমের ভালোই বলতে হবে। বরং এই সময় বিয়ে হয়ে গেলেই যুধিকার পড়া বন্ধ হয়ে যাবার ভয় আছে। যুধিকাকে কি বোম্বাই নিয়ে না গিয়ে আরও কটা বছর পাটনা কলেজের ছাত্রী হয়ে থাকতে দিতে রাজি হবে নরেন!

ঠিক ওসব প্রশ্ন নয়। প্রশ্ন হলো, নরেন আবার অর্থাৎ নরেনের

মনটা আবার যদি উদাস হয়ে যায় ? সত্যিই মাঝে একবার উদাস হয়ে গিয়েছিল। বছরের মধ্যে বার তিনেক পাটনাতে আসে নরেন; যুধিকার সঙ্গে প্রত্যেকবারই দেখা হয়। এবং গুদের ছুজনের মেলা-মেশার আনন্দও বছরে তিনবার উৎসবের মতো উতলা হয়ে উঠে। এই দেখা-শোনা ও মেলামেশার মধ্যে যদি হঠাৎ কোনো ছেদ পড়ে; যদি একবার, কিংবা পর পর কয়েক বার ছুজনের মেলামেশার উৎসব বাদ পড়ে যায়, তবে যে নরেনের মনে অপেক্ষার আগ্রহও উদাসীন হয়ে যেতে পারে। এমন অনর্থ অনেক ভালোবাসার জীবনে ঘটতে দেখা গিয়েছে। শুধু একটানা এক বছরের অদেখাতেই ভালোবাসা ভেঙে গেল। এবং কেউ কারও খোঁজও নিল না, এমন ঘটনা চারুবাবু তাঁর নিজের শ্যালিকা সুমতির জীবনে দেখেছিলেন। তাই একটা ভয় আছে তাঁর মনে। যুধিকার মা এবং মামীর মনেও ভয় আছে। যেন হাতছাড়া না হয় নরেনের মতো ছেলে। ভারত সরকারের টেক্সটাইল উন্নয়নের কাজে এক হাজার টাকা মাইনের একটা পদ এই ত্রিশ বছর বয়সেই দখল করেছে যে ছেলে, সেই যুধিকার মতো একটা সায়েন্স পড়া সেকেণ্ড ইয়ারের মেয়েকে ভালবেসেছে যুধিকার ভাগ্যের জোর আছে। যুধিকা দেখতে সুন্দর বটে কিন্তু ওরকম সুন্দর মেয়ে কতই তো আছে।

যুধিকারও জানতে বাকি নেই, পাটনার মামী চিঠিতে কি লিখেছেন। নরেন এসেছে। যুধিকা ঘোষের পক্ষে মনের চঞ্চলতা নিরোধ করে রেখে উদাস হয়ে থাকা অসম্ভব। নরেন পাটনায় থাকবে, আর যুধিকাকে দেখতে পাবে না, নরেনের চোখের বেদনাকে যেন চোখে দেখতে পায় যুধিকা। ইস, মাত্র আর তিনটি দিন পাটনায় থাকবে নরেন! তার পরেই পাটনার ছেলে হতাশ হয়ে তার বোম্বাই-এর কাজের জীবনে চলে যাবে। এসময় গিরিডিতে পড়ে থাকা যে যুধিকার জীবনের একটা ভয়ঙ্কর অপরাধ। ভুল করবে না নরেন, যদি অভিমানে ক্ষুব্ধ হয়ে যুধিকাকে বিশ্বাসঘাতিকা বলে সন্দেহ করে ফেলে।

একাই পাটনা চলে যেতে পারা যায়না কি? পারা যায়, কিন্তু চারু-বাবুই যেতে দিতে রাজি হবেন না। তা ছাড়া, যুধিকাও মনে মনে

স্বীকার করে, যুধিকার নিঃশ্বাসের আড়ালেও একটা ভয় আছে। একা যেতে আর সাহস হয় না। মনে পড়ে, সেবার বড়োদিনের ছুটির সময় পার্টনা থেকে একাই গিরিডি রওনা হয়েছিল যুধিকা। এবং ট্রেন বদল করবার জন্তু গয়াতে নেমেই দেখতে পেয়েছিল, চামড়ার বড়ো বাক্সটা নেই আর গলার হারটাও নেই।

মেয়ে কামরার ভিতরেই ছিল যুধিকা, এবং ভুলের মধ্যে এই যে, মাত্র পনের-বিশ মিনিট, বড়ো জোর আধ ঘণ্টা হবে, জানালার কাঠের উপর মাথা হেলিয়ে দিয়ে নিশ্চিত মনে একটু ঘুমিয়েছিল। তাইতেই এই কাণ্ড! না, একা একা ট্রেনে যাওয়া-আসা করবার ইচ্ছাটাও আর সাহস পায় না।

আদালত থেকে বাড়ি ফিরে এসে চারুবাবু বললেন—নবলকিশোরবাবু বললেন, হিমু নামে একটা লোক আছে, যার ওপর এরকম একটা কাজের দায় অনায়াসে ছেড়ে দেওয়া যায়। বেশ ডিপেণ্ডেবল্। আর, একটা ডাক দিলেই ছুটে চলে আসে।

বীরু আর নীরু এক সঙ্গে হেসে চোঁচিয়ে ওঠে—হোমিও হিমু, হোমিও হিমু।

চারুবাবু আশ্চর্য হন—তার মানে ?

যুধিকাও হাসে—লোকটার পুরো নাম হিমাদ্রিশেখর দত্ত। লোকটা নাকি হোমিওপ্যাথি ডাক্তারী করে।

চারুবাবু—কই, এ শহরে এরকমের কোনো ডাক্তারের নাম তো কখনও শুনি নি।

যুধিকা—লোকটা সত্যিই ডাক্তারী করে না। মাস্টারী করে। গণেশবাবুর ছেলে-মেয়েদের পড়ায়।

চারুবাবু—লোকটাকে তুই চিনিস নাকি ?

যুধিকা—দেখেছি। ওর নামে মজার মজার অনেক গল্পও শোনা যায়।

চারুবাবু—দেখে কি রকম মনে হয় ? ছাঁচোর-ট্যাচোর নয় তো ?

যুধিকা—না। তবে একটু ইডিয়টিক মনে হয়।

চারুবাবু—তা হলে মন্দ নয়। তাহলে লোকটাকে ডাকতে হয়।
যুদ্ধিকার মা ব্যস্ত হয়ে বলেন—ডাকতে হয় আবার কি? ডেকে
ফেল। আর একটুও দেরি করা উচিত নয়!

ডাকতে দেরি হয়নি। হিমু দত্তকে ডেকে আনবার জ্ঞ ব্যস্তভাবে
চলে গেল ডাইভার, এবং মাত্র আধঘণ্টা পরে ডাইভারের সঙ্গে ব্যস্তভাবে
চলে এলো হিমু দত্ত।

চারুবাবু বলেন—তুমি ডাইভারের কাছ থেকেই সব শুনেছ বোধহয়।
হিমু—হ্যাঁ।

চারুবাবু—আজই, এই সন্ধ্যার ট্রেনেই রওনা হতে হবে।

হিমু—যে আছে।

চারুবাবু—শুনেছি তুমি খুব ডিপেণ্ডেবল্ আর ডিউটি সম্বন্ধে খুব
সজাগ।

হিমু বিনীতভাবে হাসে—আপনাদের সামান্য একটু উপকার করবো,
এর জ্ঞ মিছামিছি কেন এত প্রশংসা করছেন।

চমকে ওঠেন চারুবাবু—উপকার? উপকার করতে বলছে কে
তোমাকে?

হিমু দত্তও অপ্রস্তুত হয়; আর চূপ ক'রে তাকিয়ে থাকে। চারুবাবু
বলেন—আমার ধারণা, তোমার দৈনিক রোজগার ছুটাকার বেশি
হয় না। কি বলো?

হিমু বলে—তা বটে। মাসে ষাট টাকার মতো হলে দিন ছুটাকার
তো দাঁড়ায়।

চারুবাবু—পাটনা যেতে আর ফিরে আসতে তোমার তিনটি দিন
লাগবে।

হিমু—আজ্ঞে হ্যাঁ।

চারুবাবু—সুতরাং, তোমার তিন দিনের কাজের কামাই হিসাব
করে ধরলে, তোমার রোজগারের ছুটা টাকার ক্ষতি হয়।

হিমু হাসে—হিসাব করলে তাই হয়, কিন্তু সত্যি ক্ষতি হয় না।

চারুবাবু—তার মানে ?

হিমু—ছেলে পড়াবার কাজে ছু'তিন দিন কামাই করলে—কেউ আমার মাইনে কাটে না।

চারুবাবু—ওসব কথা বলে আমাকে লাভ নেই। পরে কি করে বা না করে, সে-সব নিয়ে আমি মাথা ঘামাই না। আমার কথা হলো...

দেয়ালের ঘড়ির দিকে একবার তাকিয়ে নিয়ে চারুবাবু বলেন—
এই ছ'টাকা তুমি পাবে। তা ছাড়া তোমার খোরাকী বাবদ দিন আরও ছ'টাকা। অর্থাৎ ছ'টাকা ছ'টাকা বার টাকা।

হিমু বলে—না।

যুধিকার মা বলেন—বেশ তো, না হয় আরও দুটো টাকা পাবে।

হিমু—না।

চারুবাবু তাঁর চশমার ফাঁক দিয়ে কঠোরভাবে হিমু দন্ডের মুখের দিকে তাকিয়ে বলেন—আমার কাজের দরকারটাকে তুমি ব্ল্যাক-মার্কেট মনে করলে না কি হে ?

এতক্ষণ স্থির হয়ে দাঁড়িয়ে চারুবাবুর মুখের দিকে তাকিয়ে কথা বলছিল হিমু। এইবার মুখ ঘুরিয়ে দরজার দিকে তাকায়। এবং তাকিয়ে দেখতে পায়, এই মুহূর্তে পাটনা রঙনা হবার জন্ম ব্যস্ত হয়ে উঠেছে যে মেয়ের জীবন, সেই মেয়েই দরজার কাছে দাঁড়িয়ে দরাদরির ভাষাগুলি শুনছে।

ভুরু কুঁচকে তাকিয়ে আছে যুধিকা ঘোষ। হিমু দন্ডের চতুর অবাধ্যতার উপর বিরক্তি আর ঘৃণার আক্রোশ যেন কোনো মতে চেপে রেখেছে যুধিকা। লোকটা একটুও ইডিয়ট নয়, মানুষের বিপদের উপর দর হেঁকে টাকা আদায়ের কায়দা খুব ভাল করেই রপ্ত করেছে লোকটা।

কিন্তু সত্যিই কি চলে যেতে চাইছে লোকটা ? দরজার দিকে পা বাড়িয়ে দিয়েছে কেন ?

যুধিকা ডাক দেয়—বাবা ?

ডাকটা আর্তনাদের মতো শোনায়। যুধিকা ঘোষের জীবনের

আশার অভিসারকে ব্যর্থ করে দেবার ক্ষমতা পেয়ে গিয়েছে হিমু দত্ত নামে চতুর পয়সালোভী এই লোকটা। ওকে এই মুহূর্তে সন্তুষ্ট না করতে পারলে, ওকে রাজি করাতে না পারলে, যুথিকা ঘোষের জীবনও যে আশার পথে এগিয়ে যেতে পারবে না।

যুথিকা ঘোষের ডাকের অর্থ বুঝতে দেরি করেন না চারুবাবু। হিমু দত্তের দিকে তাকিয়ে ডাক দেন। শোন তবে।

ডাক শুনে মুখ ফেরায় হিমু। এবং শোনবার জঞ্জাই প্রস্তুত হয়।

চারুবাবু বলেন—তোমাকে মোট ত্রিশটা টাকা পারিশ্রমিক দিচ্ছি।

হাঁপ ছেড়ে এবং নিশ্চিত হয়ে হিমু দত্তের দিকে তাকান চারুবাবু। এবং সেই মুহূর্তেই চমকে ওঠেন। কোনো কথা না বলে আস্তে আস্তে হেঁটে দরজার দিকে চলে যাচ্ছে হিমু দত্ত।

চৌঁচিয়ে ওঠেন চারুবাবু—এ কি? তুমি একটা কথাও না বলে...এ কি রকমের অভদ্রতা!

হিমু দত্ত ধমকে দাঁড়ায়; এবং শাস্তভাবে হাসে—আমি টাকা নিই না স্থার।

চারুবাবু—তার মানে...এমনি শুধু...একটা বাতিকের জঞ্জ...

হিমু—লোকের দরকারে আমি এমনিতেই একটু আধটু খেটে উপকার করি স্থার।

চারুবাবুর জীবনের একটা অহঙ্কারের স্তম্ভকেই যেন একটা ভয়ানক ঠাট্টার আঘাতে কাঁপিয়ে আর নাড়িয়ে দিয়েছে হিমু দত্ত।—ছটফট করে বার-বার এদিক-ওদিক তাকাতে থাকেন চারুবাবু। কোথা থেকে পৃথিবীর সবচেয়ে বাজে একটা লোক এসে চারুবাবুর মতো শুদ্ধ অহঙ্কারের গৌরবে গরীয়ান এক মানুষের একটা দরকারের সুযোগ পেয়ে যেন তাঁর চুল ধরে মাথাটাকে টেনে নিচু করে দিচ্ছে। কারও উপকারের পরোয়া করেন না, কারও ধার ধারেন না যে মানুষ, সে মানুষকে আজ হিমু দত্তের মতো একটা ইডিয়টের অহঙ্কারের বাতিকের কাছে হাত পেতে ঋণ চাইতে হবে?

গলার ভিতর যেন ধুলো ঢুকেছে; জোরে একবার কেশে নিয়ে এবং

মাথাটাকে একটু হেঁট করে বিড়বিড় করেন চারুবাবু।—বেশ, তবে তাই হোক, টাকা নিও না।

হোমিও হিমুর জীবনের একটা মূৰ্খ বাতিকেই কাছে মাথা হেঁট করতে বাধ্য হয়েছেন চারুবাবু। কিন্তু চারুবাবুর এই আহ্বানের মধ্যে হৃদয়ের অভিনন্দন নেই। যেন একটা আক্রোশ অনিচ্ছা সত্ত্বেও শুধু দায়ে পড়ে বাধ্য হয়ে হিমু দত্তের উপকার সহ্য করতে রাজি হয়েছে। মানুষকে অপমান করবার আগে অহঙ্কারে মানুষ নিজে পারের জুতোর দিকে তাকাতে গিয়ে ঠিক এইরকম মাথা হেঁট করে।

হিমু দত্ত বলে—যা-হোক, আমার আর কিছু বলবার নেই।

চারুবাবু—তাহলে তৈরি হও, এই সন্ধ্যার ট্রেনেই...

হিমু হাসে—না, আমার পক্ষে সম্ভব নয়।

জীবনে এই প্রথম, অন্তত হিমু দত্তের গিরিডির জীবনে এই প্রথম স্পষ্ট স্বরে 'না' করতে পেরেছে হিমু, 'না' বলবার ইচ্ছে হয়েছে হিমুর। হিমু দত্তের জীবনের মূৰ্খ বাতিকটা হঠাৎ চালাক হয়ে গিয়েছে কিংবা হিমু দত্তের জীবনের গোবেচারা সম্মানটাই হঠাৎ বিদ্রোহী হয়ে উঠেছে।

যদুধিকা ঘোষের ছায়ার পাশ দিয়েই ব্যস্তভাবে হেঁটে চলে গেল হিমু দত্ত। মস্ত বড়ো বারান্দা, তাড়াতাড়ি হেঁটে পার হতেও এক মিনিট লাগে। হন হন করে হেঁটে চলে যেতে থাকে হিমু, এবং ফুলের টবের সারি পার হয়ে সিঁড়ির কাছে এসে দাঁড়াতেই পিছনের ডাক শুনে ধমকে দাঁড়ায়।

—হিমাদ্রিবাবু! পিছন থেকে ডাক দিয়েছে যদুধিকা ঘোষ। ডাকতে ডাকতে একেবারে কাছে এসেছে।

—হিমাদ্রিবাবু? ডাকটা যে একটা কপট স্তুতি। এই ডাকের পিছনে চারু ঘোষের মেয়ে যদুধিকা ঘোষের জীবনের একটা দরকারের তাগিদ মুখ টিপে হাসছে। সত্যিই তাই কি?

যদুধিকা ঘোষের মুখের দিকে তাকিয়ে কিছু বোঝা যায় না। বুঝতে পারে না হিমু। শুধু বোঝা যায়, হিমু দত্তের এই বিদ্রোহকে যেন কোনো

মতে শাস্ত করবার জন্য যুদ্ধিকার উদ্বিগ্ন চোখের মধ্যে একটা চেপ্টা ছটফট করছে।

যুদ্ধিকা বলে—আপনি রাজি না হলে আমার আজ পাটনা রঙনা হবার কোনো উপায় নেই। আর, আজই রঙনা না হতে পারলে ভয়ানক ক্ষতি হয়ে যাবে হিমাদ্রিবাবু।

—বেশ তো। বেশ তো। ঠিক আছে, কিছু ভাববেন না। আপনি তৈরি হয়ে নিন।

বলতে বলতে, এবং বোধহয় মনের মধ্যে একটা নতুন বাতিকের তাড়নায় বিচলিত হয়ে ফুলের টবের কাছে আস্তে আস্তে ঘুরে বেড়াতে থাকে হিমু দত্ত। যুদ্ধিকা ঘোষের মুখে করুণ অনুরোধ, একটা নকল করুণতা নিশ্চয়। কিন্তু তবু তো হিমাদ্রিবাবু বলে ডেকেছে। ইচ্ছে নেই, তবু তো সম্মান দেখিয়েছে।

যুদ্ধিকা ঘোষের তৈরি হতে পাঁচ মিনিট লাগে। ড্রাইভারের গাড়ি বের করতে এক মিনিট লাগে। এবং সন্ধ্যার ট্রেন ধরবার জন্য স্টেশনে পৌঁছে যেতে পাঁচ মিনিট।

জগদীশপুর পার হয়ে গেল ট্রেন। মাঝে মাঝে ফুলের নার্সারি আর রাঙামাটির মাঠের এদিকে-ওদিকে ছোটো ছোটো শালের কুঞ্জ। ট্রেন বসে ফুলের নার্সারি আর শালকুঞ্জের দিকে চোখ পড়লেও যুদ্ধিকা ঘোষের মনের মধ্যে পাটনার ছবি ফুর-ফুর করে। ট্রেনটা ছুটতে ছুটতে ছ'পাশের ফুলের নার্সারির বাতাসকে বুকের ভিতরে টানছে। গোলাপের গন্ধে মাঝে মাঝে ভরে যাচ্ছে ট্রেনের কামরা। কিন্তু যুদ্ধিকা ঘোষের কল্পনাকে নিকটের ঐ গোলাপের গন্ধ বোধহয় স্পর্শ করতে পারে না। হিমু দত্তের মুখের দিকে তাকায়নি যুদ্ধিকা ঘোষ, শালকুঞ্জ-গুলিকে দেখেও দেখতে পায়নি।

মধুপুরে পৌঁছতে ট্রেনটার বেশ দেরি হয়ে যাবে বলে মনে হচ্ছে। পথের মাঝে হঠাৎ থেমে গিয়েছে ট্রেনটা। একজন যাত্রী নেমে গিয়ে খবর নিয়ে ফিরেও আসে এক ভদ্রলোক অ্যালার্ম শিকল টেনেছেন।

ছোটো চোর তাঁর স্ট্রাকেস নিয়ে চলন্ত ট্রেন থেকে লাফিয়ে পালিয়ে গিয়েছে।

—এই জগ্নেই একা একা আর ট্রেনে ঘুরতে সাহস পাই না হিমাদ্রিবাবু।

এতক্ষণে এই প্রথম যুধিকা ঘোষ পাটনার ভাবনা ছেড়ে দিয়ে যেন কাছের জগতের একটা সমস্তার সঙ্গে আলাপ করলো। এতক্ষণ কামরার ভিতরে হিমু দত্ত নামে মানুষটা যুধিকার চোখের খুব কাছে বসে থাকলেও তাকে দেখতেই পায়নি যুধিকা, এবং কোনো কথা বলবার দরকারও বোধ করেনি।

ট্রেন আবার চলতে শুরু করতেই যুধিকা বলে—আমি একাই পাটনা চলে যেতে পারতাম। কিন্তু শুধু ঐ একটি কারণে আপনাকে সঙ্গে নিতে হলো। চোরেরা মেয়েছেলেকে একটুও ভয় করে না। তাই, অন্তত, নামে-মাত্র একটা পুরুষ মানুষ সঙ্গে থাকলেও চোরের উপদ্রব থেকে একটু নিরাপদ থাকা যায়।

হিমাদ্রিবাবু নামে ডাক শুনে যে মেয়ের মুখের দিকে একবার খুবই আশ্চর্য হয়ে তাকিয়েছিল হিমু দত্ত, সেই মেয়েরই মুখের দিকে আর একবার আশ্চর্য হয়ে তাকায়। এটা প্রথম আশ্চর্য ভেঙে যাবার আশ্চর্য। হিমাদ্রিবাবু কথাটার মধ্যে সন্দেহ আছে, কিন্তু যুধিকা ঘোষ যাকে হিমাদ্রিবাবু বলে ডেকেছে, তার মধ্যে কোনো সন্দেহের বস্তু দেখতে পেয়েছে কি? হিমু দত্তকেও কি শুধু নামে-মাত্র একটা পুরুষ বলে মনে করেছে যুধিকা ঘোষ?

বেশিক্ষণ নয়, কয়েকটি মুহূর্ত মাত্র, আর বেশি সময় লাগেনি, এই প্রশ্নেরও একটি পরিষ্কার উত্তর পেয়ে যায় হিমু দত্ত।

যুধিকা তার হাতঘড়ির দিকে তাকিয়ে বলতে থাকে।—তাই আপনাকে সঙ্গে নিতে হলো।

চারু ঘোষের মেয়ের জীবনে একটা কাজের দরকারে, শুধু পাটনা পৌঁছে দেবার জন্তু তার পিছনে একটা নাম মাত্র পুরুষ হয়ে একটি বা দুটি দিনের জন্তু একটা অস্তিত্ব রক্ষা করতে হবে যাকে, তাকেই হিমাদ্রি-

বাবু বলে ডেকেছে যুধিকা। কিন্তু এমন ডাক ডাকবার কি প্রয়োজন ছিল? নিভা আর সরযুদের মতো হিমুদা বলে ডাকাই তো উচিত ছিল। না, হিমুদা ডাকটা যুধিকা ঘোষের মুখে ভাল শোনাবে না। হিমুর চেয়ে যে বয়সে এমন কিছু ছোটো নয় যুধিকা, সেটা যুধিকার চেহারা আর হিমুর চেহারা দেখেই বুঝতে পারা যায়। প্রায় সমবয়সী কোনো অনায়াস পুরুষকে দাদা বলে ডাকতে কোনো মেয়ের ইচ্ছে হয় না বোধহয় এবং ডাকটা মুখেও বেধে যায়। কিন্তু নামেমাত্র পুরুষকে একটা নামে-মাত্র দাদা বলে মনে করে ফেললেই তো হয়। তা যদি না পারে, তবে সোজা হিমু বলে ডেকে ফেললেই বা দোষ কি? একটা নামে-মাত্র পুরুষকে অনায়াসে শুধু নাম ধরে ডাকতে পারবে না কেন কোনো মেয়ে? তা ছাড়া, যুধিকা ঘোষের জীবন ও হিমু দত্তের জীবনের পার্থক্যটাও দেখতেহয়! কোথায় আভিজাত্যে সম্পদে শিক্ষায় কালচারে রুচিতে আর আকাঙ্ক্ষায় এত বড়ো হয়ে গড়ে ওঠা যুধিকা ঘোষ নামে এই মেয়ের জীবন, আর কোথায় হোমিও হিমুর জীবন, যে-জীবন বলতে গেলে কাঠের উপর লেখা একটা নাম মাত্র!

মস্ত বড়ো বাড়ি ঐ উদাসীনের মেয়ে অনায়াসে হিমু দত্তকে হিমু বলেই ডাকতে পারতো। ডাকলে অস্থায় বা অমানান কিছু হতো না। এবং তাহলে হিমু দত্তের মনটাও অকারণে কয়েক ঘণ্টা ধরে একটা মিথ্যা প্রশ্ন দিয়ে মনের ভিতরে কোনো ভাবনার দ্বন্দ্ব বাধাতো না।

হিমু দত্ত কি ভাবছে, যুধিকার কথাগুলি হিমু দত্তের মনের ভিতরে গিয়ে কোনো আঘাত দিল কি না দিল সেটুকু চিন্তা করবার কথাও যুধিকা ঘোষের মনে দেখা দিতে পারে না। হিমু দত্তের মুখের উপর কোনো নতুন ছায়া পড়েছে কি না পড়েছে, সেটা হিমু দত্তের মুখের দিকে তাকালেও বুঝতে পারে না যুধিকা। হিমু দত্তের মুখ তেমনিই শান্ত, তেমনিই একটি জড়পদার্থ। বই-এর রঙিন ছবিকেও একটু নাড়া-চাড়া করলে ছবিটা যেন রং বদলায়। কিন্তু হিমু দত্তের ঐ নিরেট ও নির্বিকার মুখের উপর রং ছিটিয়ে দিলেও বোধহয় মুখটা রঙীন হয়ে উঠবে না।

এবং কালি ছিটিয়ে দিলেও বোধহয় কালো হয়ে যাবে না হিমু দত্তের

শান্ত মুখ । হিমু দত্তের মনের ভিতর থেকে কয়েক ঘণ্টার ছোটো একটা
বিশ্রয় হঠাৎ ভেঙে গেল, বেশ হলো । কিন্তু সেজন্য হিমু দত্তের মুখের
উপর কোনো ভাঙনের বেদনা কালো হয়ে ওঠে না ।

ছোটো হাত ব্যাগটাকে আস্তে আস্তে খোলে যুদ্ধিকা । ব্যাগের
ভিতরে ছোটো একটা আয়না । সেই আয়নার বুকে নিজেরই মুখের
ছবিকে প্রায় আধ-মিনিট ধরে অপলক চোখে দেখতে থাকে । হাত
তুলে কপালের ছ'পাশের চুলের ফুরফুরে দুটি ছোটো স্তবক নেড়ে-চেড়ে
একটু ভেঙে দিয়ে এবং আরও ফুরফুরে ক'রে দিয়ে ব্যাগ বন্ধ করে
যুদ্ধিকা । যুদ্ধিকার চোখের কাছে, সামনের বেঞ্চিতেই প্রায় মুখো-
মুখি বসে আছে যে নামেমাত্র একটা অস্তিত্ব, নেটা আছে বলেও যেন
মনে করতে পারে না যুদ্ধিকা ।

উঠে দাঁড়ায় যুদ্ধিকা । উপরে রাখা ছোটো বাস্কেটকে খুলে একটা
বই বের করে । ঝকঝকে ও রঙীন মলাটের একটা উপন্যাস । মধুপুর
পৌঁছতে আর বেশি দেরি নেই । উপন্যাসের পাতার উপরে চোখ
রেখে মনের সব আগ্রহ জমাট করে নিয়ে চুপ করে বসে থাকে যুদ্ধিকা ।

মধুপুর পৌঁছবার পর একটু বিরক্ত হয়ে এবং বাধ্য হয়ে হিমু দত্তের
সঙ্গে যুদ্ধিকাকে কয়েকটা কথা বলতে হলো । কারণ ট্রেনটা মাত্র
ধেমেছে, সঙ্গে সঙ্গে চৌঁচিয়ে উঠলো হিমু দত্ত—কুলি ! কুলি ।

গিরিডি টু মধুপুর, ট্রেন প্রায় ফাঁকা, নামবার যাত্রীর সংখ্যাও খুব
কম । তা ছাড়া, প্ল্যাটফর্মের উপর গিজগিজ করছে কুলি । লাগেজ
নামাবার জ্ঞান ছড়োছড়ি ক'রে কুলিগুলো তো এখুনি ছুটে আসবে ।
অনর্থক অকারণ কুলি কুলি বলে চৌঁচিয়ে একটা কাজ দেখাবার দরকার
কি ?

যুদ্ধিকা বলে—আঃ, কেন মিছিমিছি হাঁক ডাক করছেন ? কোনো
দরকার নেই ! আপনাকে এত ব্যস্ত হতে হবে না ।

হিমু দত্ত একটু অপ্রস্তুত হয়ে তার পরেই হঠাৎ একমুখ হাসি হেসে
প্রশ্ন করে—আপনি বোধহয় হাঁকডাক চৌঁচামেচি পছন্দ করেন না ?

যুদ্ধিকা শুধু বলে—অবাস্তব প্রশ্ন !

মধুপুরে ট্রেন খামবার পর বেশ কিছুক্ষণ থেকে কামরার ভিতরেই বসে থাকতে হয়, কারণ কুলিগুলো ছুটে আসে না। আসতে দেয়নি করছে। সেই ফাঁকে কিছুক্ষণের জন্য গণেশবাবুর স্ত্রীর কথা, সেই সঙ্গে গণেশবাবুর বাড়ির আরও অনেক কথা ভাবতে হয়। কারণ হিমু দত্তেরই ঐ গায়ে পড়ে প্রশ্ন করবার রকম দেখে যুধিকার মনে পড়ে যায়, ঠিক এই রকমই গায়ে পড়ে কথা বলবার আর প্রশ্ন করবার একটা বিশ্রী অভ্যাস আছে গণেশবাবুর স্ত্রীর, অর্থাৎ রমা মাসিমার।

উদাসীনের মেয়ে কারও উপকার নেয় না, নিতে চায় না। চাকরবাবুর জীবনের সেই দার্শনিক আদর্শটা তাঁর মেয়ের জীবনেও কম সত্য হয়ে ওঠেনি। গায়ে-পড়ে কারও সঙ্গে কথা বলে না যুধিকা; কেউ গায়ে-পড়ে কথা বলতে এলে বিরক্ত হয়। গণেশবাবুর স্ত্রী একদিন এক-রকম গায়ে পড়েই, অর্থাৎ নিজের ম্যালেরিয়ার গল্প বলতে বলতে হঠাৎ যুধিকাকে প্রশ্ন করেছিলেন—তোমার বয়স কত হলো যুধি?

এই প্রশ্নের কোনো উত্তর না দিয়ে যুধিকা প্রশ্ন করেছিল—রোজ দশ গ্রেণ করে কুইনিন খাবার পর কি হলো তাই বলুন। মারলো কি আপনার ম্যালেরিয়া?

উদাসীনের কোনো মানুষ ভুলেও গণেশবাবুর বাড়িতে যায় না। কিন্তু ওরা আসে উদাসীনে; গণেশবাবু, রমা মাসিমা ও লতিকা। এবং এসেই গায়ে পড়ে যত গল্প আর প্রশ্ন করে চলে যাওয়া ওঁদের একটা ধর্ম যেন।

রমা মাসিমার উপর রাগ করতে যুধিকা ঘোষের মনটা আরও একজনের উপর রাগান্বিত হয়ে ওঠে। রমা মাসিমার মেয়ে লতিকার উপর। সত্যিই, কেমন যেন ওরা! যেমন গণেশবাবু, তেমনি রমা মাসিমা, আর তেমনি লতিকা—বাপ মা আর মেয়ে।

গণেশবাবুর বাড়িটা উদাসীন থেকে বেশি দূরে নয়। উস্ত্রী থেকে বেড়িয়ে উদাসীনে ফিরতে হলে পথের উপরেই পড়ে গণেশবাবুর বাড়ি। বাড়িটার ফটকের কাছে প্রকাণ্ড একটা কাঁঠাল গাছ। একটুও রুচি নেই বাড়িটার। শিউলি নয়, করবী নয়, হাঁসলুহানা নয়—কাঁঠাল।

তাছাড়া বাড়িটাও যেন কাঁঠালের কড়া গন্ধে মাখানো । ঝাঁকে ঝাঁকে লোক আসছেই আর আসছেই, আর ভনভন করে চলে যাচ্ছে । কটকটা কখনও বন্ধ থাকে না । একটা গায়ে-পড়া বাড়ি ; পথের লোককে যেন ঘরের ভিতরে ঢোকাতে পারলেই ধন্য হয়ে যায় ।

বারান্দার উপর চেয়ার পেতে আর খবরের কাগজ হাতে নিয়ে সকাল ছুপুর বিকেল সন্ধ্যা সব সময় বসে থাকেন গণেশবাবু । পথ দিয়ে কাউকে যেতে দেখলেই হাঁক দিয়ে একটা কথা না বলে ছাড়েন না ।

—কোথায় চললে হে চিন্তাহরণ ? ছেলের পরীক্ষার ফল কি হলো ? পাশ করেছে ?

—এই মালতী ! তোর জেঠিমাঝে আজ সন্ধ্যায় একবার আসতে বলবি তো । বলবি, কটক থেকে চিঠি এসেছে ।

—কেয়া সর্দারজী, কাইঁ চলৈ ? মামলা ডিসমিস হো গিয়া কেয়া ?

—এই ঝুরিভাজা ? খবরদার যদি এদিকে আবার এসেছ । কলেরা ছড়াবার জায়গা পাওনি ?

—কত দাম পড়লো ক্ষিতীশবাবু ? পেঁপেগুলি পরেশনাথের নাকি ? গণেশবাবুর এইসব প্রশ্ন তবু একরকম পদে আছে । তাঁর গায়ে-পড়া প্রশ্নগুলির মধ্যে কোনো মতলব নেই । কিন্তু রমা মাসিমার গায়ে-পড়া প্রশ্নগুলি যে ভয়ানক একটা মতলবের ব্যাপার ; একটা তদন্ত বলা যায় । নইলে যুদ্ধিকার বয়সের খোঁজ নেবার দরকার কি ? লতিকার চেয়ে যুদ্ধিকার বয়স একটু বেশি কি না, এই তো জানতে চান রমা মাসিমা । কেন জানতে চান, তা'ও জানে যুদ্ধিকা । এবং জানে বলেই মনটা মাঝে মাঝে বড়ো বিস্তীর্ণ অস্থিস্থিতে ভরে ওঠে । তখন রাগ হয় আর একজনের উপর, যার চোখের সামনে দাঁড়াবার জন্ত গিরিডি থেকে পাটনা ছুটে চলেছে যুদ্ধিকা । নরেনও যে লতিকাকে চেনে, এবং লতিকার সঙ্গে কয়েকবার দেখা হয়েছে, আলাপও হয়েছে নরেনের ।

পাটনাতে থাকবার কোনো দরকার হয় না লতিকার । কারণ পড়া ছেড়েই দিয়েছে লতিকা । তবু বছরের মধ্যে প্রায় হ'মাস পাটনাতেই থাকে লতিকা । বছরে প্রায় আট-দশবার পাটনা থেকে গিরিডি আর

গিরিডি থেকে পাটনা করছে। লতিকার বড়দা পাটনাতেই থাকে আর ডালারী করে।

কোনো দরকার নেই তবু বারবার গিরিডি থেকে পাটনা যাওয়া আর পাটনাতে থাকা কেন দরকার হয়েছে লতিকার জীবনে, সন্দেহ করতে আর বুঝতে কি কোনো অশুবিধা আছে যুধিকার? একটুও না। যুধিকার মা বুঝেছেন, চারুবাবুও বুঝেছেন এবং পাটনার মামীও বুঝেছেন।

পাটনার মামীই অনেকবার স্পষ্ট করে যুধিকার মাকে লিখেছেন কোনো সন্দেহ নেই কুসুমদি, আপনাদের পড়শী গণেশবাবু আপনাদের শত্রু হয়ে উঠেছে। গণেশবাবুর স্ত্রীটি আরও সাংঘাতিক বলে মনে হচ্ছে। সে বস্ত্রটি নিজে পাটনাতে এসে গর্দানিবাগে নরেনের বাড়ি গিয়ে নরেনের সঙ্গে আলাপ করে এসেছে। লতিকার সঙ্গে নরেনের বিয়ে দেবার জন্তু ওরা কি ভয়ানক উঠে পড়ে লেগেছে, আপনি ধারণা করতে পারবেন না।

সামি কি লতিকার? সব খবর জেনেও মনে মনে হাসে যুধিকা। যেমন নরেনকে, তেমনি নরেনের মনের ইচ্ছাকেও চেনে যুধিকা। সেখানে ঘেঁষবার সামি কারও নেই। লতিকার ডালার দাদা নরেনকে তোষামোদ করে যত নিমন্ত্রণই করুক না কেন, আর লতিকা যতই স্টাইল করে সেজে নরেনের চোখের সামনে এসে হেসে-হসে কথা বলুক না-কেন।

তবু একটা অস্বস্তি। লতিকা যে এখন পাটনাতেই আছে। নরেনও পাটনাতে আছে। ভাবতে গিয়ে যুধিকা ঘোষের মনের সঙ্গে শরীরটাও যেন ছটকট করে ওঠে।

আঁ্যা, কি ব্যাপার? সামনের পৃথিবীটাকে এতক্ষণে চোখে পড়েছে, তাই প্রশ্ন করতে পেরেছে যুধিকা।

—কি বলছেন? প্রশ্ন করে হিমু।

—কুলি আসেনি এখনো?

—না।

—কেন ?

—কুলিরা আজ ষ্ট্রাইক করেছে।

চমকে ওঠে যুধিকা—তাহলে কি উপায় হবে ?

—আজ্ঞে ?

—জিনিসপত্র নামাবে কে, আর পাটনার গাড়িতে তুলে দেবেই বা কে ? এ তো আচ্ছা বিপদ দেখছি !

স্টেশনের বাতাস একটা আগন্তুক ট্রেনের ইঞ্জিনের তীব্র চিৎকারের শব্দে চমকে ওঠে। যাত্রীর হুড়াহুড়ি শুরু হয়, পাটনা যাবার ট্রেন ইন করেছে।

চৌঁচিয়ে ওঠে যুধিকা।—কি উপায় হবে হিমাদ্রিবাবু ? এই ট্রেনে যদি উঠতে না পারি, তবে পাটনা গিয়ে আর লাভই বা কি।

যুধিকা ঘোষের হতাশার বেদনা ওর উদ্বিগ্ন চোখ ছটোকে বোধহয় এখনি জলে ভরিয়ে দেবে। বড়ো বেশি ছলছল করে চোখ ছটো।

ব্যাক্সের উপর থেকে যুধিকার বেডিং আর ব্যাগটাকে হিড়হিড় করে টেনে কাঁধের উপর তুলে নিয়ে হিমু দত্ত বলে—চলুন।

রাতও হয়েছে, ট্রেনে ভিড়ও খুব। কার্ট ক্লাসের কামরাও যাত্রীর ভিড়ে ঠাসা।

ভিড় একটু কম, এমন কামরা খুঁজতে খুঁজতে সময়ও পার হয়ে গেল। গার্ডের আলোর সঙ্কেত জ্বলে উঠতেই তাড়াতাড়ি একটা ভিড়ে ঠাসা কামরার ভিতরেই উঠবার চেষ্টা করতে হলো।

ছলে উঠেছে ট্রেন। জানালা দিয়ে ব্যাগ আর বেডিং কামরার ভিতরে ছুঁড়ে ফেলে দিল হিমু ; যাত্রীর ধমক খেলো হিমু। দরজার হাতল ধরে কামরার ভিতরে পা এগিয়ে দিয়ে উঠে পড়লো যুধিকা। তারপর পিছন থেকে হিমু দত্ত। সঙ্গে সঙ্গে চমকে ওঠে যুধিকা ঘোষ—সর্বনাশ !

—কি হলো ? শাস্ত হিমু দত্তও যেন চমকে উঠে প্রশ্ন করে।

নিজের একটা পা-এর দিকে তাকিয়ে ফিসফিস করে যুধিকা ঘোষ—একটা স্যাগুেল নিচে পড়ে গেল।

যুধিকা ঘোষের এক পায়ের এক পাটি স্মাণ্ডেলের দিকে তাকায় হিমু দত্ত : সোনালী জরির কাজ করা লাল মখমলের স্মাণ্ডেল। তার পরেই মুখ কিরিয়ে প্ল্যাটফর্মের দিকে তাকায় এবং সঙ্গে সঙ্গে টেঁচিয়ে ওঠে হিমু—ঐ যে !

তারপর হিমু দত্তকে আর দেখতে পায় না যুধিকা। বুক ছুরছুর করে যুধিকার। লোকটা সত্যিই যে জুতোটাকে আনবার জন্যে নেমে পড়েছে, আর ট্রেন যে এখন বেশ গড়গড়িয়ে চলতে শুরু করেছে।

কামরার ভিতরে বসবার জায়গা ছিল না। স্তব্ধ হয়ে, এক ঠায় দাঁড়িয়ে ট্রেনের দোলানির সঙ্গে কাঁপতে থাকে যুধিকা। লোকটা সত্যিই আবার গাড়িতে উঠতে পারবে তো? জুতোটাকে কুড়িয়ে আনবার জন্যে লোকটাকে কোনো হুকুম, কোনো অনুরোধ করেনি, এমন কি চোখের ইঙ্গিতেও কোনো নির্দেশ দেয়নি যুধিকা। আশ্চর্য, একটু ভয়-ভয়ের বোধও নেই লোকটার। যুধিকার একটা খালি পায়ের দিকে তাকালো, তারপরেই একটা লাক দিয়ে নিচে নেমে গেল।

যুধিকা ঘোষের আতঙ্কিত শরীরের কাঁপুনি, আর বুকের ছুরছুর হঠাৎ থেমে যায়। কামরার দরজার বাইরে পা-দানির উপর একটা মূর্তি। আবার লাক দিয়ে গাড়িতে উঠতে পেরেছে লোকটা। দরজা ঠেলে কামরার ভিতরে ঢুকেই যুধিকা ঘোষের পা-এর কাছে জুতোটাকে ফেলে দিয়ে কামরার চারদিকে তাকায় হিমু দত্ত।

সত্যিই ন স্থানং তিলধারণং। হিমু চিন্তিতভাবে কামরার এদিকে আর সেদিকে তাকাতে থাকে। তাই দেখতে পায় না, চারু ঘোষের মেয়ে যুধিকা ঘোষ একটা হাঁপ ছেড়ে কি রকম করে হাসছে, আর হিমু দত্তকেই কি একটা কথা বলতে চেষ্টা করছে।

ধন্যবাদ জানাবার চেষ্টা করছিল যুধিকা। কিন্তু লোকটা যে একবারও মুখের দিকে তাকাচ্ছেই না। ধন্যবাদ জানাবার সুযোগই পায় না যুধিকা, এবং আবার চূপ করে দাঁড়িয়ে ট্রেনের দোলানির সঙ্গে ছলতে থাকে।

ফার্স্ট ক্লাসের কামরার ভিতরে জীবনে কোনোদিন ঢোকেনি হিমু

দত্ত। কাস্ট ক্লাসের মানুষগুলিকে দেখতেও বোধহয় একটু ভয়-ভয় করে।

গাড়ির মধ্যে মহিলা ও শিশুর সংখ্যাই বেশি। শিশু মহিলারা টান হয়ে শুয়ে আছেন, ওদের কাছে গিয়ে কোনো অনুরোধ করবার সাহস পায় না হিমু দত্ত। পুরুষেরা সবাই কামরার মেজের উপর রাখা বাস্র আর বেডিং-এর উপর বসে আছেন। এঁদের অনুরোধ করবার কোনো অর্থ হয় না। শুধু ঐ ট্রাউজার পরা ভদ্রলোক যদি...

অনুরোধ করলে শুনবে কি? একজন মহিলা দাঁড়িয়ে আছেন, এই অবস্থাটা চোখে দেখিয়ে দিয়ে যদি ঐ ভদ্রলোককে একটু ছোটো হয়ে বসতে অনুরোধ করা হয়, তবে ভদ্রলোক একটু ছোট হয়ে বসতে এবং একটু জায়গা ছেড়ে দিতে রাজি হবে কি? ভদ্রলোকের পরনে ট্রাউজার, তাই আরও হতাশ হয়ে যায় হিমু দত্ত।

দেখতে পায় যুধিকা, ট্রাউজার পরা ভদ্রলোকের কাছে গিয়ে কি যেন বলছে হিমু দত্ত। বুঝতে পারে যুধিকা, একটু আরাম করে বসবার জন্তে জায়গা খুঁজছে হিমু দত্ত।

—নো নো, সঙ্গে সঙ্গে খেঁকিয়ে ওঠেন ট্রাউজার পরা ভদ্রলোক।

হিমু বলে—আমি না, আমার জন্ত বলছি না।

যুধিকার দিকে চোখ পড়ে ভদ্রলোকের, এবং সেই মুহূর্তে ব্যস্ত হয়ে আধশোয়ানো শরীরটাকে গুটিয়ে আর পা নামিয়ে পাশে আধ-হাত পরিমাণের একটা জায়গা তৈরি করেন। তারপর সাগ্রহ স্বরে হিমুকে বলেন—আসতে বলুন ঔকে। যথেষ্ট জায়গা আছে।

যুধিকাকে এগিয়ে আসবার জন্ত, এবং ট্রাউজার পরা ভদ্রলোকের পাশে খালি জায়গাটিতে বসবার জন্ত হাত তুলে ইঙ্গিত করে হিমু দত্ত। যুধিকা ঘোষ একটু আশ্চর্য হয়। তারপরেই ছোটো একটা ফ্রকুটি করে যুধিকা মাথা নেড়ে আপত্তি জানিয়ে আবার সেই রকমই দাঁড়িয়ে ট্রেনের দোলানির সঙ্গে ছলতে থাকে।

মাথা নেড়ে আপত্তি করতে গিয়ে যুধিকা ঘোষের মনের ভিতরে অদ্ভুত রকমের একটা রাগের ঝাঁজও যেন তপ্ত হয়ে উঠেছে। ভুরু

কুঁচকে চোখ ছুটো ছোটো করে হিমু দত্তের মুখের দিকে একবার তাকিয়ে নিয়ে আবার মুখ ফেরায় যুধিকা। মুখটাও লালচে হয়ে ওঠে।

ট্রাউজার পরা ভদ্রলোকের এই বেহায়া উদারতার রকম দেখে রাগ করেছে কি যুধিকা? কত ব্যস্ত হয়ে, যুধিকাকে পাশে বসাবার আশায় কত খুশি হয়ে সরে বসেছেন আর জায়গা করে দিয়েছেন ভদ্রলোক। কিন্তু পরের উপকার নেওয়া পছন্দ করে না যে মেয়ে, তার পক্ষে রাগ হবারই কথা। কিন্তু রাগ করে হিমু দত্তের মুখের দিকে তাকায় কেন যুধিকা? চারু ঘোষের মেয়ের মনে এ আবার কোন রকমের ভুল? একজন অচেনা ভদ্রলোকের গা ঘেঁষে বসবার জন্ত যুধিকা ঘোষকে ইশারা করেছে হিমু দত্ত; এমন ইশারা করতে পারলো হিমু দত্ত? একটুও বাধলো না। তাই কি রাগ করেছে যুধিকা?

যুধিকা ঘোষের ধারণা আর জল্পনাগুলিকে যেন ক্ষণে ক্ষণে চমকে দিয়ে যুধিকার মনে আরও অবস্টি ভরে দিচ্ছে হিমু দত্ত। ধারণা করেছিল যুধিকা, ট্রাউজার পরা ভদ্রলোকের পাশে নিজের জন্ত জায়গা করেছে হিমু দত্ত। সে ধারণা মিথ্যে হয়ে গেল। ধারণা করেছিল যুধিকা, ট্রাউজার পরা ভদ্রলোকের পাশে ঐ জায়গাতে যুধিকা যখন বসলই না, তখন হিমু দত্ত নিজেই বসে পড়বে আর মনের সুখে হাঁপ ছাড়বে। যুধিকার এই ধারণাকেও মিথ্যে করে দিয়ে দাঁড়িয়ে রইল হিমু দত্ত।

কিন্তু কতক্ষণই বা চুপ করে দাঁড়িয়ে থাকতে পারে হিমু দত্ত? হিমু দত্তের হাত-পা আর চোখ ছুটো যেন একটু স্থস্থির হতে আর শাস্ত হতে জানে না। কামরার এদিকে ওদিকে চোখ ঘুরিয়ে আবার কি যেন দেখতে থাকে, এবং এক একজনের নীরব ও গম্ভীর ভদ্রলোকের কানের কাছে মুখ এগিয়ে দিয়ে কত রকমের ভঙ্গীতে মিনতি করে কি যেন বলতে থাকে। বোধহয় হিমু দত্তের মিনতি ব্যর্থ হয়, সাড়া না পেয়ে আবার এগিয়ে এসে যুধিকা ঘোষের বাস্তটাকেই একটা টান দেয়।

যেন কামরার ভিতরের এই মানুষ ও মালপত্রের ভিড়টাকে একটু

এলোমেলো করে দিয়ে বাস্কেটারই জন্ত জায়গা করতে চায় হিমু দত্ত।
যাত্রী ভদ্রলোকেরা বিরক্ত হয়ে ভ্রুকুটি করেন ; কেউ কেউ সতর্ক করে
দেন—একটু ভদ্রভাবে ধাক্কাধাক্কি করুন মশাই।

হিমু বলে—কিছু না, কাউকে একটু ছোঁবও না মশাই। শুধু
এই বাস্কেটাকে একটু সোজা করে রাখতে দিন।

বাস্কেটাকে সোজা করে পেতে বেডিংটাকে তার পাশে কাত করে
দাঁড় করিয়ে দেয় হিমু দত্ত। এবং তারপরেই হেসে হেসে যেন এতক্ষণের
চেষ্টায় একটা সাকলোর গৌরবে ধন্য হয়ে যুধিকার দিকে তাকিয়ে বলে
—এইবার বশুন !

—কি ? ভ্রুকুটি করে যুধিকা।

—বশুন।

—আমার জন্ত জায়গা করলেন নাকি ?

—তবে কার জন্তে ?

আনমনার মতো কি যেন ভাবে যুধিকা ; পরের কাছ থেকে এরকমের
অস্তুত উপকার স্বীকার করে নিতে একটা লজ্জা আছে। তা ছাড়া,
সত্যি কথা, যুধিকা ঘোষের মনটাও বিশ্বাস করতে পারে না, হিমু দত্তের
এই চেষ্টাগুলি কি সত্যিই বিশুদ্ধ উপকার ? এর পিছনে অস্ত্র কোনো
ইচ্ছা নেই ? হিমু দত্তকে প্রথমে দেখে যতটা বোকা-বোকা মনে হয়ে-
ছিল, এবং এখনও দেখে যতটা সরল মনের মানুষ বলে মনে হচ্ছে,
ততোটা বোকা-বোকা আর ততোটা সরল মনের মানুষ নয় বোধহয় হিমু
দত্ত। ট্রাউজার-পরা ঐ ভদ্রলোকের মতো স্পর্শলোভী না হলেও হিমু
দত্তের মনটা একটু ছায়ালোভীও কি নয় ? ধারণা করতে পারে যুধিকা,
হিমু দত্তের অনুরোধে বিশ্বাস করে এই বাস্কেট উপরে বসে পড়লে ভুল
হবে। সন্দেহ হয়, হিমু দত্তও বাস্কেটের একদিকে একটুখানি জায়গা নিয়ে
যুধিকা ঘোষের ছায়া ঘেঁষে বসে পড়বে ! তখন কি আর হিমু দত্তের
অভদ্রতাকে ধমকে শাসন করতে পারা যাবে ? কিন্তু সহ্যই বা করা যাবে
কি করে ?

যুধিকা ঘোষের সতর্ক মন, হিন্দেবী মন, আর উদাদীনের

আভিজাত্যে তৈরি কঠিন অহঙ্কারে মনও যেন একটা চতুর কৌশল খুঁজে পায়। বাস্কটর সারা পিঠটা জুড়ে একেবারে পা ছড়িয়ে বসে, আর বেডিং-এর গায়ে হেলান দিয়ে এলিয়ে পড়ে যুধিকা। যুধিকার গায়ের ছায়া ঘেঁষে বসবার আর একটুও জায়গা নেই। জব্দ হোক হিমু দত্তের গোপন ইচ্ছাটা।

অনেকক্ষণ ধরে একমনে উপন্যাস পড়ে যুধিকা। কতক্ষণ পার হয়ে গেল, সেই ছাঁসও বোধহয় নেই যুধিকার। কারণ সত্যিই তো উপন্যাস পড়ছে না যুধিকা। উপন্যাসের পাতার দিকে তাকিয়ে নিজেরই জীবনের এক আশার অভিসারের আনন্দ তৃপ্তি আর উল্লাসগুলিকে মনে মনে পড়ছে। এই রাত্রিটা পার হয়ে যাবার পর আর মাত্র পাঁচ-ছয় ঘণ্টা, কিংবা একটু বেশি, তার পরেই নরেনের সঙ্গে দেখা হয়ে যাবে। স্টেশনে আসবে কি নরেন? মামী তো আসবেনই, কারণ বাবা নিশ্চয় একটা জরুরী টেলিগ্রাম ক'রে দিয়েছে। কিন্তু মামী কি বুদ্ধি ক'রে নরেনকে খবর না দিয়ে ছাড়বেন? কাল সকালেই পাটনা পৌঁছে যাবে যুধিকা, খবর নিয়ে টেলিগ্রামটা কি এখনো পাটনায় পৌঁছে যায়নি?

জব্দ হয়েছে হিমু দত্ত। হঠাৎ ছাঁচোখ তুলে একেবারে স্পষ্ট ক'রে দেখতে পায় যুধিকা, বাস্কের একটা শেলফ ধরে এক ধারে দাঁড়িয়ে আছে হিমু দত্ত। দাঁড়িয়ে দাঁড়িয়ে ঘুমোচ্ছে; আর ঘুমন্ত মাথাটা বার বার ঝুঁকে বাস্কের ফ্রেমের উপর পড়ে ঠুক ক'রে বেজে উঠছে।

খোলা উপন্যাস, মিথ্যা উপন্যাসটাকে বন্ধ ক'রে হাতের ঘড়ির দিকে তাকায় যুধিকা ঘোষ। রাত মন্দ হয়নি। আর ঘুম-হারানো চোখ দুটোর মধ্যেও বিস্ত্রী রকমের একটা অস্বস্তি যেন ছটকট করছে।

হিমু দত্তকে একটা ধমক দিতে ইচ্ছে করে। কেন? ইচ্ছেটারই উপর যেন রাগ করে যুধিকা। লোকটার একটা ডিসেন্সি বোধও নেই? কি-রকম অভদ্রভাবে দাঁড়িয়ে ঘুমন্ত মাথাটাকে বাস্কের কাঠের উপর ঠুকছে। লোকটার শরীরে কি একটু অস্বস্তিরও বোধ নেই?

তবু ভাল; এই কামরার এতগুলি ভদ্রলোক আর মহিলা তবু

বুঝতে পারবে যে, যুধিকা ঘোষের সঙ্গে একটা বাজে লোক শুধু সঙ্গী হয়ে চলেছে। কোনো আপনজন নয়। কোনো নিকট আত্মীয়তারও সম্পর্ক নেই। হিমু দত্ত যদি যুধিকা ঘোষের পাশে বসে পড়তো, তবে এই কামরার সব মানুষের চোখ কে-জ্ঞানে কেমন করে তাকাতো, আর কি বুঝতো? ঐ যে শিখ মহিলা বার বার কেমন সন্দেহভরা চোখ নিয়ে একবার যুধিকার মুখের দিকে আর একবার হিমু দত্তের মুখের দিকে তাকাচ্ছেন, উনিই বোধহয় কোনো সন্দেহ না করে একেবারে বিশ্বাস করে ফেলতেন যে, এক বাঙালী ছোকরা তার...ছি, যা নয়, তাই বিশ্বাস করে ফেলতেন ঐ শিখ মহিলা।

ট্রেন ধেমোছে। এটা জসিডি। বেশ কিছুক্ষণ ট্রেনটা থেমে থাকবে। মা বলে দিয়েছেন, রাত বেশি করিস না, জসিডি পৌঁছেই খাবার খেয়ে এক কাপ চা খেয়ে নিবি।

খাবারের বাস্কেটকে পাশেই দেখতে পায় যুধিকা, এবং হাত বাড়িয়ে খাবারের বাস্কেটকে কাছেও টেনে নেয়। কতগুলি লুচি আর সন্দেশ, এই তো খাবার। কিন্তু এতগুলি লুচি আর এতগুলি সন্দেশ কি জীবনে কোনোদিন একসঙ্গে খেয়েছে যুধিকা। জিনিসগুলি নষ্ট হবে। অনর্থক, আদরের বেশি বাড়াবাড়ি করে এত বেশি খাবার সঙ্গে দিয়েছেন মা। আশ্চর্য, মা যেন যুধিকাকে একটা স্কিদের ব্রান্ডসুদী বলে মনে করেন!

না, পাটনা পৌঁছতে পৌঁছতে খাবারগুলি নিশ্চয় নষ্ট হবে না। মামীর ছেলে অরুণ আছে, মামীর মেয়ে ধীরা আছে; বাসি লুচি-সন্দেশ খুশি হয়ে খাওয়ার মানুষ মামীর বাড়িতে আরও আছে!

খাবারের বাস্কেট ভিতর থেকে অয়েল পেপারের একটা ছোটো টুকরো বের করে নিয়ে তার উপর গুনে গুনে চারটে সন্দেশ আর চারটে লুচি রাখে যুধিকা। খাবারের বাস্কেট বন্ধ করে আবার পাশে রেখে দেয়।

স্কিদের পেয়েছে বেশ। একটা সন্দেশ মুখের ভিতর ফেলতেই চমকে ওঠে যুধিকা।

—চা চাই নিশ্চয়? চেষ্টা করে উঠেছে হিমু দত্ত।

যুধিকা ঘোষের খাওয়ার আনন্দটাকেও যেন চমকে দিয়ে যুধিকার

মনের ভিতর আবার কতগুলি বিরক্তি আর অস্বস্তি ভরে দিল হিমু দত্ত ।
চা চাই নিশ্চয়, কিন্তু এত টেঁচিয়ে জিজ্ঞাসা করবার কি আছে ?

কথা বলবার জন্ম মুখ তুলেই দেখতে পায় যুথিকা, হিমু দত্ত
নেই, প্ল্যাটফর্মে নেমে পড়েছে, এবং শোনাও যায়, টেঁচিয়ে হাঁক দিচ্ছে
হিমু দত্ত—এই চা-ওয়ালা ইধার আও ।

চা-এর পেয়লা নিজেই হাতে নিয়ে দরজা ঠেলে কামরার ভিতরে
চুকলো হিমু দত্ত, এবং যুথিকা ঘোষের হাতের কাছে চা-এর পেয়লা
এগিয়ে দিলো ।

কোনো কথা না বলে, আর হিমু দত্তের মুখের দিকেও না তাকিয়ে
চা-এর পেয়লা হাতে তুলে নেয় যুথিকা ঘোষ । চা-এর পেয়লায়
চুমুক দেয়, এবং তারপরেই কেমন যেন সন্দেহ হয় । হ্যাঁ, চোখ
তুলতেই খোলা দরজা দিয়ে দেখতে পায় যুথিকা, দরজার কাছেই
প্ল্যাটফর্মের উপর দাঁড়িয়ে আছে হিমু দত্ত, আর, এক হাতে একটা শাল
পাতার ঠোঙ্গা ধরে পুরি-ভরকারি খাচ্ছে ।

তিন চুমুকে চা শেষ করে দিয়ে পেয়লাটাকে পাশে রেখে দেয়
যুথিকা, অয়েল পেপারের উপর এখনও চারটে লুচি আর তিনটে সন্দেহ
পড়ে আছে, কিন্তু খাওয়া আর হলো না । যুথিকা ঘোষের হাতটা যেন
রাগ করে একেবারে ঝিকু হয়ে খাবার সুন্ধ অয়েল পেপারের
টুকরোটাকে দলা পাকিয়ে একটা আবর্জনার মতো একপাশে ফেলে রেখে
দেয় । তার পরেই উপস্থানের পাতা খুলে মনে মনে বুঝতে চেষ্টা করে,
অনেক রাত হয়েছে, খাবার না খাওয়াই ভাল কিন্তু মিছিমিছি কিসের
জন্ম আর কার ওপর এত রাগ হলো ?

চা-ওয়ালা আসে । পেয়লা তুলে নিয়ে চলে যায় । চা-এর দামটা
দিয়ে দেয় যুথিকা ।

হিমু দত্ত আবার কামরার ভিতরে ঢোকে । যুথিকা ঘোষ প্রশ্ন করে
—আপনার পুরি-ভরকারির দাম কত ? ক' আনা দিতে হয়েছে ?

হিমু বলে—ছ'আনা ।

ছ'আনা পয়সা হিমুর হাতের দিকে এগিয়ে দেয় যুথিকা ঘোষ । হাত

এগিয়ে দিয়ে হিমু দত্তও বেশ আগ্রহের সঙ্গে ব্যস্ত হয়ে ছ'আনা পয়সা নিয়ে পকেটের ভিতর রাখে।

যুধিকা বলে—পয়সা গুনে নিন।

পকেট থেকে পয়সা বের করে আর গুনে নিয়ে হিমু বলে—ঠিক আছে।

সামান্য কয়েকটা কথা, এবং খুব অল্প কয়েকটা কথা কিন্তু এটুকু কথা বলতেই যেন হাঁপিয়ে পড়েছে যুধিকা ঘোষ, আর চোখ দুটোও জ্বলছে। এখন মনে হয়, এত অস্বস্তি ভোগ করে পাটনা যাবার কোনো দরকারই ছিল না। না হয়, নরেন রাগ করে বোম্বাই চলে যেত। কিন্তু হিমু দত্ত নামে এধরনের অদ্ভুত লোকের সঙ্গে একটা ঘণ্টা এক জায়গায় বসে থাকাও যে একটা শাস্তি। বড়ো নিচ মনের লোক। এর কাছে কোনো সৌজন্য আর কোনো লজ্জা আশা করা বৃথা। লোকটা প্রশ্ন করতেও জানে না। লোকটা যে যুধিকা ঘোষকেই নামে-মাত্র একটা মেরে বলে মনে করেছে।

জসিডিতেই যাত্রীদের অনেকে নেমে গিয়েছে। এদিকের সীট একেবারে খালি হয়ে গিয়েছে। কিন্তু বুঝতে পারেনি যুধিকা, এরই মধ্যে কখন বেডিংটাকে টেনে নিয়ে গিয়ে সীটের উপর পেতে ফেলেছে হিমু দত্ত।

হিমু হাসে—আঃ, এবার আর কোনো অসুবিধা নেই। অনেক জায়গা। আপনি এবার টান হয়ে গুয়ে পড়ুন।

কি বিশ্রী ভাষা। যুধিকা ঘোষের মতো বয়সের মেয়েকে অনায়াসে টান হয়ে গুয়ে পড়তে বলে, বলতে মুখে একটু সঙ্কোচও নেই; হিমু দত্তের ভাষা সহ্য করতে আর ইচ্ছা হয় না।

কিন্তু খোলা বেডিং-এর দিকে এগিয়ে না যেয়েও পারে না যুধিকা। সত্যিই যে টান হয়ে গুয়ে পড়তে ইচ্ছে করছে। এতক্ষণ কামরার ভিতরে ভিড়ের চাপের মধ্যে বাস্কেটার উপর বসে ধুকতে ধুকতে শরীরে ব্যাথাও ধরে গিয়েছে।

যুধিকা বলে—আমার ব্যাপার নিয়ে বেশি ব্যস্ত হবেন না। আপনি একটু নিজের সুবিধা করে নিন।

হিমু বলে—আমার ব্যাপার নিয়ে আপনি মিথ্যে ব্যস্ত হবেন না ।
আমার সুবিধা তো আমি ক'রে নিচ্ছিই ।

বাস্তবিক, লোকটা একেবারে নিরৈট । একটা ভাল কথাও সম্মান
দিতে জানে না ।

হিমু দত্তের কথা শুনে রাগ হয়, এটাও যে যুধিকা ঘোষের মনের
একটা দুর্বলতা । হিমুর মুখের একটা কথা অর্থ নিয়ে এত চিন্তা
করাই ভাল । হিমুর কথা মধ্যে এক ফোঁটাও ঘবা-মাজা ভদ্রতা থাকবে,
এটা আশা করাও ভাল । হিমুর চোখের সামনে টান হয়ে গুয়ে পড়লেই
বা কি আসে যায় ? যুধিকা ঘোষ রাগ করে ওর নিজেরই মনের
রাগটার উপর ।

কিন্তু হিমু দত্ত বসবে কোথায় ? লোকটা কি এখনও দাঁড়িয়ে থাকবে
বলে মনে করেছে ? সন্দেহ হয় যুধিকার, আর বোধহয় দাঁড়িয়ে দাঁড়িয়ে
ট্রেনের দোলানির সঙ্গে ছলতে ছলতে বাকের কাঠের উপর ঘুমন্ত
মাথাটাকে ঠুকে ঠুকে কষ্ট পাওয়ার ইচ্ছা নেই হিমু দত্তের ; হিমু দত্তও
ক্লান্ত হয়েছে বলে মনে হচ্ছে । তাই বাধ্য হয়ে সন্দেহ করতে হয়, এই
দীটেরই একদিকে বসে পড়বে না তো হিমু দত্ত ?

কী বিপদ ! বিছানার উপর টান হয়ে গুয়ে পড়তে গিয়েও চুপ করে
বসে থাকে যুধিকা । হিমু দত্তের কাণ্ডজ্ঞানের উপর ভরসা করা যায়
না । হয়তো যুধিকা ঘোষের পা-এর কাছেই বসে পড়বে । মাথার
কাছে বসে পড়লেই বা কি ? অস্বস্তির জ্বালায় যুধিকা ঘোষের শরীরটা
জ্বলবে, আর ঘুমের দফা রফা হয়ে যাবে ।

যুধিকা ঘোষের মন যেন শক্ত হয়ে এই সন্দেহগুলিকে একেবারে তুচ্ছ
ক'রে আর মিথ্যে ক'রে দিতে চায় । বশুক না হিমু দত্ত, মাথার কাছে
কিংবা পা-এর কাছে ; চোরা চাউনি তুলে কিংবা হাঁ ক'রে যুধিকা ঘোষের
ঘুমন্ত চেহারাটার দিকে বতখুশি তাকিয়ে বা ইচ্ছা হয় ভাবুক না কেন
লোকটা । রাত জেগে কাহিল হতে পারবে না যুধিকা । গুয়ে পড়তেই
হবে । হিমু দত্ত এমন মানুষ নয় যে, ওর চোখের ছ-একটা চোরা
চাহনিকে ভয় করতে হবে । টান হয়ে গুয়ে পড়ে যুধিকা ঘোষ । হাত

তুলে চোখ ছটোকে ঢাকে, যেন উপরের কড়া আলোটোর ঝলক চোখে না লাগে ।

এইবার যেন মনে-প্রাণে একটা ঘুম প্রার্থনা করে যুথিকা । রাতটা স্বপ্নের মধ্যে ছলতে ছলতে পার হয়ে যাক ।

নরেনের সঙ্গে লতিকার কি সত্যিই দেখা হয়েছে এবার ? অসম্ভব নয় । লতিকা কি নরেনকে কোনোদিন চিঠি লিখেছে ? অসম্ভব নয় । নরেন কি লতিকার চিঠির কোনো উত্তর দিয়েছে ? অসম্ভব ! কিন্তু উত্তর দিলেই বা কি ? লতিকাকে কি লিখতে পারে নরেন, সেটা কল্পনা করতে পারে যুথিকা ! এবং নরেনের চিঠির সেই ভাষা আর সেই কথা পড়ে লতিকা ঘোষের মনে আর যে-কোনো ভাবনা দেখা দিক না কেন, কোনো আশা দেখা দেবে না ।

শেষ যে-দিন নরেনের সঙ্গে দেখা হয়েছিল যুথিকার, কি কথা বলেছিল নরেন ? হাতের ছায়ায় ঢাকা-পড়া যুথিকা ঘোষের চোখ-বোঁজা মুখটাই হেসে ওঠে :—আর বড়ো জোর একটা বছর দেখবো যুথিকা, দেখি কলকাতায় বদলি হতে পারি কিনা । যদি দেখি যে, কলকাতায় বদলি হবার কোনো আশা নেই, তবে অগত্যা তোমাকে বোম্বাই প্রবাসিনী হতে হবে যুথিকা ।

প্রশ্ন করেছিল যুথিকা—লতিকার ডাক্তার দাদা তোমাদের বাড়ি গিয়ে কিসের গল্প করে এলেন ?

কোনো উত্তর না দিয়ে শুধু একটু মুহূ হেসে যুথিকা ঘোষের প্রশ্নের সূক্ষ্ম সন্দেহটাকে একেবারে মিথ্যে ক'রে দিয়েছিল নরেন । সেদিনের পাটনার যতো আশ্বাস যতো হাসি, যতো আলো আর শব্দগুলি যেন এখানেই এসে ঝিমঝিম ক'রে বেজে বেজে যুথিকার মনটাকেই ঘুম পাড়াতে থাকে ।

একটা ছোটো স্টেশনে, কে জানে কেন, হঠাৎ ধেমের গেল ট্রেনটা, এবং খামতে গিয়ে জোরে একটা ঝাঁকানি খেয়ে যাত্রীদের ক্লাস্ত শরীর-গুলিকে চমকেও দিলো । ঘুম ভেঙে যায় যুথিকার ; ভয় পেয়ে ধড়কড় করে উঠে বসে, চোখ ছটো চমকে ওঠে :—অ্যা ? একি ? কোথায় গেলেন আপনি ?

কিন্তু কই হিমু দত্ত ? যুধিকা ঘোষের পা-এর কাছেও না মাথার কাছেও না । দেখতে পায় যুধিকা, কামরার দরজার পাশে সেই কোণটি ঘেঁষে, কাত হয়ে দাঁড়িয়ে, কামরার কাঠের দেয়ালে হেলান দিয়ে অঘোর ঘুমের স্তূথে মজে আছে হিমু দত্ত ।

এমন লোককে সঙ্গে রাখা আর না রাখা সমান । যদি কোনো চোর জানালা দিয়ে হাত বাড়িয়ে যুধিকার গলার হার ছিঁড়ে নিয়ে চলে যেত, তবে ? হিমু দত্তের দায়িত্ববোধ তো এই, যুধিকা ঘোষকে অসহায় ক'রে কামরার একদিকে কেলে রেখে দিয়ে, নিজে আর একদিকে গিয়ে দাঁড়িয়ে আছে আর ঘুমোচ্ছে ।

কিন্তু এসব আবার কি কাণ্ড ? উপরের আলোটাকে কালো কাগজের ঠোঙা দিয়ে ঢেকে দিল কে ? যুধিকার গা-এর উপরের আলোয়ানটা মেলে দিল কে ? তাহলে অনেকবার কাছে এসেছে, দেখেছে আর চলে গিয়েছে হিমু দত্ত । যুধিকার ঘুমের আরামটাকে বেশ ভাল ক'রে সাজিয়ে দিয়ে গিয়েছে । তবু...ইচ্ছে ক'রে, বোধহয় জোর ক'রে দূরে সরে গিয়ে একটা জেদের ভান করেছে । কি মনে করে হিমু দত্ত, যুধিকা ঘোষ একেবারে খাঁটি ভদ্রতার কার্যদা অনুযায়ী ওকে কাছে বসে থাকতে অনুরোধ করবে ? এবং সে অনুরোধ না করলেই একেবারে ওদিকে গিয়ে, যেন কোনো সম্পর্কই নেই এই-রকম একটা পোজ নিয়ে, আর শুধু নিজেকে কষ্ট দিয়ে দিয়ে একটা কাণ্ড...হিমু দত্তের কাণ্ডগুলি সত্যিই অদ্ভুত । বেশ সূক্ষ্ম একটা একরোখা জেদ আছে মানুষটার ।

চোখ মেলে তাকায় হিমু । ব্যস্তভাবে যুধিকার কাছে এগিয়ে আসে । আর, পকেট থেকে সোনার একটা হার বের ক'রে যুধিকার হাতের কাছে এগিয়ে দেয়—আপনার হারটা গলা থেকে খুলে পড়ে গিয়েছিল । আপনি ঘুমের ঘোরে টের পাননি ।

খালি গলাটার উপর হাত বুলিয়ে ক্যালক্যাল করে তাকিয়ে আর হাত কাঁপিয়ে হারটাকে হিমুর হাত থেকে তুলে নিয়েই গম্ভীর হয়ে যায় যুধিকা ।

ছোটো একটা ধন্ববাদ জানিয়ে হিমু দত্তকে এইবার সরে যেতে

বলেই তো হয়। কিন্তু ধন্যবাদের ভাষা যেন যুধিকার গলার ভিতরে আটকে গিয়েছে। তার কারণও মনের একটা অস্বস্তি, এবং অস্বস্তির মধ্যে একটা রাগের উদ্ভাপও আছে। ধন্যবাদ শুনতে চায় না, ধন্যবাদের জন্য কোনো লোভই নেই, পুরস্কার দাবি করে না, শুধু উপকার করবার জন্য একটা বাতিকে ঘোরে লোকের উপকার করে, এহেন লোকের সঙ্গে কথা বলাও যে একটা সমস্যা। কি বলবে বুঝতে পারে না যুধিকা ঘোষ।

সত্যিই হারটা নিজের থেকেই গলা থেকে খুলে নিচে পড়ে গিয়েছিল তো? চারু ঘোষের মেয়ের মন মানুষকে সহজে বিশ্বাস করবার মতো মনই নয়। বিনা স্বার্থে মানুষের উপকার করবার বাতিকেটাও নিঃস্বার্থ বাতিকে নয়। পৃথিবীর ভয়ানক চালাকরা ভয়ানক বোকা মেজে থাকে, এ সত্যও জানা আছে যুধিকা ঘোষের। উদাসীনের খুব বিশ্বস্ত একটা চাকর ছিল, রামটহল। মনে পড়ে, রামটহলের সেই অতিসূক্ষ্ম ভালোমানুষী ছলনার ঘটনাটা। হঠাৎ একদিন একটা দশ টাকার নোট হাতে নিয়ে চারুবাবুর কাছে গিয়ে বলেছিল রামটহল—এটা কিমের কাগজ, দেখুন তো বাবা, আপনার দরকারী কোনো কাগজ নয় তো?

চারুবাবু আশ্চর্য হলেন, এবং হ্যাঁ মেরে নোটটাকে রামটহলের হাত থেকে তুলে নিয়ে বললেন—না, না, এটা একটা বাজে কাগজ; কোথায় ছিল এটা?

রামটহল—খাটের নিচে ঝাড় দিতে গিয়ে পেয়েছি।

হিসাবে দশটা টাকার গরমিল কোনোদিন হয়নি; কোনোদিন দশ-টাকার একটা নোট হারিয়েছে বলে মনেও পড়েনা চারুবাবুর। তবু বুঝলেন, সত্যিই ভুল হয়েছিল নিশ্চয়; তুলক্রমে দশ টাকার একটা নোট নিশ্চয় ক'দিন আগে পকেটের ভিতর থেকে পড়ে গিয়ে থাকবে। বাই হোক কিন্তু চাকরটা কী চমৎকার বেকুব। একেবারে প্রস্তর যুগের বুনো মানুষের মতো নিরেট একটা মূখ; দশ টাকার নোট পর্ষন্ত চেনে না।

তার পর থেকে চারুবাবু আদালত থেকে ফিরে এসে রোজই গায়ের কালো কোটটা খুলে রামটহলের হাতে দিতেন। রামটহলই কোটটাকে

আলনার হুকে টানিয়ে রাখতো। কোটের পকেটে তাড়া তাড়া নোট থাকতো ; কিন্তু কোনো আশঙ্কা নেই ; নিশ্চিত ছিলেন চারুবাৰু। ঐ নোট রামটহলের কাছে অর্থহীন কতকগুলি কাগজ মাত্র।

সেই রামটহল একদিন উধাও হয়ে গেল। এবং দেখা গেল, চারুবাৰুর কালো কোটটা ঠিক আছে ; কিন্তু কোটের পকেটের ভিতর ছ'হাজার টাকার নোটের ছুটি ব্যাঙিল নেই।

যুথিকা ঘোষের গলার সোনার হার কিরিয়ে দেশুয়া রামটহলী কৌশলের মতো একটা মতলবের ব্যাপার নয় তো ? ঘুমন্ত যুথিকার গলা থেকে হারটাকে নিজেই খুলে নিয়ে, তারপর এইভাবে কিরিয়ে দিয়ে চমৎকার সাধুতার একটা কীর্তি দেখিয়ে হিমু দত্তের এই বোকা-বোকা চোখের মধ্যে ভয়ানক চালাক কিছু লুকিয়ে নেই তো ? যুথিকা ঘোষ বলে—কিন্তু ভাবতে আশ্চৰ্য লাগছে, হারটা খুলে পড়ে যাবে কেন ?

হিমু বলে—জানি না কেন খুলে পড়ে গেল। তবে ঐ মহিলাকে জিজ্ঞাসা ক'রে দেখতে পারেন।

হিমু দত্ত সেই শিখ মহিলাকে দেখিয়ে দেয়।

যুথিকা বিরক্ত হয়ে বলে—ঐ মহিলাকে কি জিজ্ঞাসা করতে বলছেন ?

হিমু—উনি দেখেছেন, আপনার গলার হারটা খুলে নিচে পড়ে গেল। উনিই আমাকে ডাক দিয়ে দেখিয়ে দিলেন, হারটা নিচে পড়ে আছে।

কথা শেষ ক'রে এবং যুথিকা ঘোষের কোনো কথা শোনবার আশায় না থেকে সরে যায় হিমু দত্ত। এবং সরে গিয়ে দরজার কাছে সেই কোণটিতে সেই ভঙ্গীতে কাত হয়ে দাঁড়িয়ে ঘুমোবার জ্ঞান চোখ বন্ধ করে।

অনেকক্ষণ নিঃশব্দ হয়ে বিছানার উপর বসে থাকে যুথিকা। সোনার হারটাকে আবার গলায় পরানো হয়নি। হাতের মুঠোর মধ্যে কুঁকড়ে পড়ে আছে ঝকঝকে সোনার হার। হারটাকে জানালা দিয়ে ছুঁড়ে ফেলে দিতে ইচ্ছা করে, কিন্তু সাহস হয় না। মা'র কাছে অনেক মিথ্যে কথা বলে হার হারাবার অপরাধ ঢাকতে হবে, সেই ভয়ে বোধহয় যুথিকা

ঘোষের হাতটা স্তব্ধ হয়ে থাকে; নইলে হিমু দত্তের মতো একটা লোকের সততার ছোঁয়ায় একেবারে নির্লজ্জ হয়েছে যে হারটা, সেটার স্পর্শ এখন যুধিকা ঘোষের শুধু হাতটাকে নয়, মনটাকেও কামড়াচ্ছে; সে হার ছুঁড়ে ফেলে দিতে পারলেই ভালো ছিল।

গিরিডি থেকে রওনা হবার পর কম সময় তো পার হয়ে গেল না। কিন্তু এই ন'ঘণ্টার মধ্যে একটা মিনিটও বোধহয় মনের আরাম নিয়ে জেগে থাকবার সময় হয়নি যুধিকার। বিরক্ত করেছে হিমু দত্ত। বার-বার জ্বদ করেছে হিমু দত্ত। ভয় পাইয়ে দিয়েছে হিমু দত্ত। বারবার লোকটাকে সন্দেহ করতে হয়েছে, আর সন্দেহ করেই ঠকতে হয়েছে। ইচ্ছে করেনি, তবু ওর উপকার সহ্য করতে হয়েছে।

হিমু দত্তের মুখের দিকে বেশ কিছুক্ষণ তাকিয়ে ছিল যুধিকা ঘোষ, এবং নিজেরই বোধহয় হুঁস ছিল না যে, হিমু দত্ত হঠাৎ চোখ মেলে তাকিয়ে ফেলতে পারে, এবং দেখেও ফেলতে পারে যে, চারু ঘোষের মতো মানুষের মেয়ে হিমু দত্তের মতো মানুষের মুখের দিকে তাকিয়ে আছে।

কিন্তু হিমু দত্তের চেহারাটাকে যে একটা ভয়ানক গর্বের চেহারা বলে মনে হয়। ওর বিরুদ্ধে অভিযোগ করবার ক্ষমতা সংসারের সবচেয়ে সাংঘাতিক নিন্দুকেরও নেই, বোধহয় এই গর্বেই মজে আছে হিমু দত্তের মন। এটাই বোধহয় ওর বাতিকে একমাত্র আনন্দ।

হিমু দত্তের এই গর্ব কি ভেঙে দেওয়া যায় না? ওর কোনো ভুল ধরে দেওয়া যায় না? যুধিকা ঘোষের মনের মধ্যে যে অস্বস্তি ছটকট করে, সেটা হলো একটা জেদ। হিমু দত্তকে জ্বদ করবার জ্ঞান একটা জেদ। হিমু দত্তের ব্যবহারের খুঁত ধরবার একটা প্রতিজ্ঞা।

ট্রেনটা ধেমেছে।

কে জানে কোন্ স্টেশন? হিমু দত্তের ঘুমন্ত চোখ সেই মুহূর্তে দপ করে সতর্ক পাহারাদারের চোখের মতো জেগে ওঠে।

—শুনছেন? ডাক দেয় যুধিকা।

এগিয়ে আসে হিমু দত্ত।

যুধিকা বলে—আপনার তো সব দিকেই নজর আছে, খুব সাবধান আপনি। আমার কোনো অসুবিধাই হতে দিচ্ছেন না। কিন্তু—

হিমু—বলুন।

যুধিকা—কিন্তু...

বলতে গিয়ে একটা শুকনো হাসি হেসে ফেলে যুধিকা—কিন্তু আপনি জানেন না যে, আমার এখনও খাবারটুকু খাওয়ারও সুযোগ হয়নি।

—কেন? বিস্মিত হয়ে প্রশ্ন করে হিমু।

—আপনি দেখেননি, দেখতে পাননি, দেখতে ভুলে গিয়েছেন। যুধিকার অভিযোগের ভঙ্গীটাই হঠাৎ যেন, রুপ্ত হয়ে ওঠে। হেসে হেসে ঠাট্টা করতে গিয়ে অদ্ভুত একটা আক্রোশ প্রকাশ করে ফেলেছে যুধিকা।

হিমু বলে—দেখেছি।

যুধিকা আশ্চর্য হয়—কি?

হিমু—আমি দেখেছি, আপনি শুধু একটা সন্দেশ খেয়ে বাকি সব খাবার কাগজে মুড়ে ফেলে রেখে দিলেন।

কি আশ্চর্য! চমকে ওঠে যুধিকা; তারপরেই একেবারে বোবা হয়ে হিমু দত্তের মুখের দিকে তাকিয়ে থাকে।

না, হিমু দত্তের তুলনা হয় না। হিমু দত্তের চোখ ভয়ানক সাবধান ও সজাগ চোখ। হিমু দত্তের একটি ক্রটি ধরে অভিযোগ করবার আনন্দটুকুও যুধিকা ঘোষের কপালে জুটলো না। কিন্তু একটা প্রশ্ন তো করা যায়। বেশ রুদ্ধস্বরে এবং প্রায় চোঁচিয়ে উঠে প্রশ্ন করে যুধিকা—চোখে দেখেও তো কিছু বললেন না।

হিমু দত্ত হাসে—বলা কি উচিত হতো?

—তার মানে? ভ্রুকুটি করে যুধিকা ঘোষ।

হিমু দত্ত আবার হাসে—বললে আপনি হয়তো ভাবতেন যে, আমি একটা অবাস্তুর কথা মিছিমিছি বলি আপনাকে...

—বুঝেছি। থাক, আর বলতে হবে না। যুধিকা ঘোষ আন্তে আন্তে ক্লান্ত ও অলস স্বরে কথাগুলি বলেই মুখ ঘুরিয়ে নেয়. আর

জানালাৰ বাইৰে দৃষ্টি ছড়িয়ে দিয়ে ৰাতের অন্ধকার দেখতে থাকে।

—বুঝতে আৰু অনুবিধা নেই, একেবারে মৰ্মে মৰ্মে এইবাৰ বুঝতে পাবা গিয়েছে, হিমু দত্তের মন জড়-পদার্থ ছাড়া আৰু কিছু নয়। যা বলা হয় তাই শোনে, যা শোনে তাই বোঝে, যা চোখে পড়ে তাই দেখে হিমু দত্ত। নিজের থেকে কিছু শোনবার বুঝবার আৰু দেখবার চেষ্টা ওৱ মনের মধ্যেই নেই। মধুপুর স্টেশনে সেই যে শামানি দিয়ে অবাস্তৱ কথা বলতে নিষেধ ক’ৰে দিয়েছিল য়ুথিকা, সে শামানি স্বৰণ কৰে রেখেছে হিমু দত্ত। কেমন যেন চাকৰ-চাকৰ মনের একটা লোক মাত্ৰ। এহেন মানুষকে সন্দেহ ক’ৰে য়ুথিকা যে নিজেকেই ছোটো ক’ৰে ফেলেছে। মনে মনে এই লজ্জা স্বীকাৰ কৰে য়ুথিকা।

তবে ভাগ্যি ভাল, য়ুথিকা ঘোষের মনের এই লজ্জা পৃথিবীৰ কাৱও চোখে ধৰা পড়ে যাবে না। সেই ভয় নেই। এই হিমু দত্তও কল্পনা কৰতে পাৰে না যে, ওৱ মতো মানুষকেও জৰু কৰবার জন্তু চাৰু ঘোষের মেয়ের মনে একটা জেদ চেপে বসেছিল! য়ুথিকা ঘোষেরও এই লজ্জা ভুলে যেতে কতক্ষণ লাগবে। আৰু একবাৰ টান হয়ে শুয়ে মনের সুখে একটা ঘুম দিয়ে ভোৱ কৰে দিতে পাৰলেই হলো।

লজ্জাই বা কিসের? একটা লোক পৱের উপকাৰ কৰবার বাতিকে ভুগছে; সে লোকটার ওপৱ ৰাগ হওয়াই তো উচিত। তাকে সন্দেহ কৰাই উচিত।

আকাশে তারা নেই। তবে কি ভোৱ হয়ে আসছে? অন্ধকাৰটা ফিকে হয়েছে? তাই তো!

পাটনা পৌছতে এখনও বেশ দেরি আছে। এখন ঘুমিয়ে পড়লেই ভালো।

কি গভীৰ ঘুম! আশা কৰেনি, ভাবতে পাৰেনি য়ুথিকা; ট্ৰেনের কামৰায় একটা সীটের উপরে এলোমেলো একটা বিছানার উপৱ শুয়ে আৰু এত দোলানিৰ মধ্যে এত ভালো ঘুম হতে পাৰে। ভোৱ হয়ে গিয়েছে কখন, জানতে পাৰেনি য়ুথিকা। সূৰ্য উঠেছে, সকাল হয়েছে, কামৰায় জানালা দিয়ে ভিতৰে ৰোদ ছড়িয়ে পড়েছে, আৰু প্ৰত্যেকটা

স্টেশনে এত হাঁকডাক হয়েছে, কিছুই বুঝতে পারিনি যুধিকা। ঘুম ভাঙলো তখন, যখন হিমু দত্তের ডাক কানের ভিতরে গিয়ে বেজে উঠলো।—শুনছেন, পাটনা এসে পড়েছে।

—পাটনা? চমকে জেগে উঠেই প্রশ্ন করে যুধিকা।

হিমু দত্ত বলে—হ্যাঁ।

যুধিকা ঘোষ তাড়াতাড়ি হাত-ব্যাগ থেকে চিরুনি বের করে। হিমু দত্ত যুধিকা ঘোষের বিছানা গুটিয়ে বাঁধা-ছাঁদা করে।

ট্রেনের গতি মৃদু হয়ে এসেছে! জানালা দিয়ে মুখ বের করেই প্ল্যাটফর্মের দিকে তাকায় যুধিকা। হেসে গুঁঠে যুধিকার চোখ। ট্রেনটা ধেমে আসছে। কিন্তু এরই মধ্যে দেখে ফেলেছে যুধিকা, প্ল্যাটফর্মের ভিড়ের মধ্যে দু তিনটে চেনা মুখও হাসছে। মামী এসেছেন, মামীর হাত ধরে দাঁড়িয়ে আছে অরুণ। যুধিকাকে দেখতে পেয়ে হাত দোলাচ্ছে। আর, ফরফর ক'রে উড়ছে নরেনের গলার লালরঙা টাই। নরেনের মুখে হাসি, সেই সঙ্গে নরেনের হাতের রুমালও সুশ্রিত অভ্যর্থনার মতো ছলে উঠেছে।

ট্রেন থেকে নেমে, প্রায় ছুটে গিয়ে মামীর কাছে দাঁড়ায় যুধিকা। অরুণের গাল টিপে আদর করে; এবং তার পরেই নরেনের মুখের দিকে তাকিয়ে হেসে ফেলে।

একটা কুলি যুধিকা ঘোষের বাক্স আর বিছানা মাথায় তুলে নিয়ে হাঁক দেয়—চলিয়ে।

যুধিকা বলে—চলো।

চলতে গিয়েই হঠাৎ ধমকে দাঁড়ায় যুধিকা—ও হ্যাঁ...

মনে পড়েছে, হিমু দত্তকে গিরিডি ফেরবার খরচটা দিতে হবে। হাত-ব্যাগ থেকে টাকা বের ক'রে হিমুর দিকে তাকায় যুধিকা ঘোষ।

এগিয়ে আসে হিমু। হিমুর হাতে টাকা ফেলে দিয়েই যুধিকা মামীর দিকে তাকায়।—চলো এবার।

মামী বলেন—ছেলেটি?...

যুধিকা বলে—ও এখন গিরিডি ফিরে যাবে।

মামী—কে ছেলোট ?

যুধিকা ব্যস্তভাবে বলে—ও কেউ নয়, সঙ্গে এসেছে, এই মাত্র ।

গর্দানিবাগের মাঠের কিনারায় পলাশের মাথা ফুলে ফুলে লাল হয়ে উঠলো, তখন যুধিকা ঘোষের প্রাণটাও যেন গিরিডি ফিরে যাবার আশায় ফুলেল হয়ে ওঠে । কলেজের ছুটি হয়েছে, এবং এখন আর পার্টনাতে পড়ে থাকবার দরকার নেই । কারণ, নরেন এখন আর ছুটি পাবে না, আর পার্টনাতে আসতেই পারবে না । কাজেই, এখন গিরিডিতে চলে যাওয়াই ভাল ।

লতিকা অনেকদিন আগেই গিরিডি চলে গিয়েছে । এবারের পার্টনা জীবনের ঘটনাগুলির ইতিহাস মনে পড়লে মনে মনে হেসে ফেলে যুধিকা । নরেনকে নিমন্ত্রণ করে বাড়িতে ডেকে নিয়ে গিয়ে অন্তরঙ্গ হবার জন্য কতই না কষ্ট করেছিলেন লতিকার দাদা ডাক্তার শীতাংশু । কিন্তু যুধিকার মামী লতিকার ঐ ডাক্তার দাদার চেয়ে অনেক চালাক । যে ছুটো দিন পার্টনাতে ছিল নরেন, সে ছুটো দিন চারবেলা নিমন্ত্রণ করে রেখেছিলেন মামী । লতিকার ডাক্তার দাদার নিমন্ত্রণ স্বীকার করবার সুযোগ পায়নি নরেন ।

কিন্তু নরেনের মনটা একটু উদার, এবং কোমলও বটে । যুধিকার কাছেই কথায় কথায় অভিযোগ করেছিল নরেন, মামী এরকম চারবেলা ধরে একটা জ্বরদস্ত নেমস্তন্ন না খাওয়ালেই ভাল করতেন । শীতাংশুদা বেচারী নিজে এসে বারবার কত অনুরোধ করলেন ; ওঁদের বাড়িতে গিয়ে এককাপ চা খেয়ে এলেও কত খুশি হতেন শীতাংশুদা ।

যুধিকা গম্ভীর হয়ে বলেছিল—লতিকাও নিশ্চয় খুশি হতো ।

নরেন—তা, খুশি হতো নিশ্চয় ।

যুধিকা—গেলেই পারতে ।

নরেন হাসে—যেতে পারলে ভালোই ছিল, কিন্তু পারলাম কোথায় ?

সব ভালো নরেনের, শুধু ওর এই মনের দুর্বলতাটা ভালো

লাগে না যুধিকার। লতিকার ডাক্তার দাদা শীতাংশুবাবুর জন্ম নরেনের
এত বেশি শ্রদ্ধার আবেগেও যুধিকা ঘোষের ভালো লাগে না।

যাই হোক, শেষ পর্যন্ত জয়ী হয়েছিল মামীর চেষ্টি, এবং যুধিকার
ইচ্ছা। ষে ছুটি দিন পার্টনাতে ছিল নরেন, যুধিকার সঙ্গে চারবেলা
দেখা হয়েছে। ছ'দিন সন্ধ্যাবেলা ছ'জনে বেড়িয়ে এসেছে। এবং
ছ'জনের মনের কথা ছ'জনের কানের কাছে আবার নতুন করে বলে
বলে অনেক মুখরতা করেছে ছ'জনে। কোনো সন্দেহ নেই যুধিকার,
নরেনের মনও ব্যস্ত হয়ে উঠেছে, শুধু এ ভাবে বছরে কয়েকবার চোখের
দেখা দেখে, আর যুধিকাকে শুধু ছ'দিনের বেড়াবার আর গল্প শোনার
সঙ্গিনীরূপে কাছে পেয়ে তারপরেই বোম্বাই চলে যেতে ভালো লাগে না
নরেনের। কিন্তু এখনও তৈরি হতে পারছে না নরেন, ঠিক বুঝে
উঠতে পারছে না, কলকাতায় বদলি হবার সুযোগ পাওয়ার আগেই
যুধিকাকে বিয়ে করে হঠাৎ অত দূরে বোম্বাই-এ নিয়ে যাওয়া উচিত
হবে কিনা।

যুধিকা বলে—বিয়েটা হয়ে থাক না ; বোম্বাই না হয় পরে যাব।

হেসে ফেলে নরেন—অপেক্ষা করতে কি তোমার ভয় হচ্ছে, কোনো
সন্দেহ হচ্ছে যুধিকা।

—ছিঃ। কি যে বল! বরং তোমার মুখে এরকমের প্রশ্ন শুনেই
ভয় করে।

—তবে অপেক্ষা করো, যুহু হেসে যুধিকাকে আশ্বাস দেয় নরেন।

কিন্তু এভাবে আশ্বস্ত হতে যেন হাঁপিয়ে উঠেছে যুধিকার প্রাণ।
মনের ভিতরে কোথায় যেন একটা কাঁটার খোঁচা খচখচ করে।
ভালোবেসেও শান্ত হয়ে শুধু অপেক্ষা করার একটা ভয়ানক শক্তি যেন
নরেনের আছে। লতিকাদের বাড়িতে যাবার জন্ম, ডাক্তার শীতাংশুদার
অনুরোধ রাখবার জন্ম নরেনের মনের দুর্বলতাগুলিও যেন নরেনের
একটা শক্তি। তাই যুধিকার মনটা যেন মাঝে মাঝে অবসন্ন হয়ে যায়।
ভালোবাসতে গিয়ে কি এভাবে কেউ হাঁপিয়ে পড়ে? এত সাবধান হতে
হয় কি? বারবার এত দুর্ভাবনা নিয়ে গিরিডি থেকে ছুটে আসবার

দরকার হয় কি ? হারাই হারাই সদা ভয় হয়, এই বুঝি ভালোবাসার লক্ষণ ?

নরেনের বোম্বাই রওনা হবার দিন স্টেশনে গিয়েছিল য়ুধিকা। মামীও গিয়েছিলেন। আর, কি আশ্চর্য লতিকার ডাক্তার দাদাও গিয়েছিলেন। লতিকা অবশ্য যায়নি, এবং কেন যাবার সাহস হয়নি লতিকার, সেটা অনুমান করতে পারে য়ুধিকা। য়ুধিকা আছে যে ! একেবারে জলজ্যাস্ত য়ুধিকার চোখের সামনে দাঁড়িয়ে নরেনের সঙ্গে কথা বলবে লতিকা, এমন সাহসী প্রাণী নয় লতিকা। যাই হোক, ডাক্তার শীতাংশুদার এসেও কোনো লাভ হয়নি। ট্রেন ছাড়বার আগের মুহূর্ত পর্যন্ত নরেনের সঙ্গে অনর্গল কথা বললেন মামা ; শীতাংশুদা নরেনের সঙ্গে একটা কথা বলবারও সুযোগ পেলেন না।

পাটনার এই জীবনের কয়েক মাস আগের এই ইতিহাসের এক একটি ঘটনায় য়ুধিকা ঘোষের আশা জয়ের গর্বে ভরে উঠেছে। শুধু একবার মনে হয়েছিল, এবং মনটা বিরক্ত হয়ে উঠেছিল, নরেনের একটা চিঠির ভাষাতে একটু অবাস্তুর কোঁতুহলের মায়ী ছিল। লিখেছিল নরেন, লতিকা বোধহয় এখন পাটনাতে আছে। য়ুধিকার চিঠি লিখতে গিয়ে লতিকার কথা মনে পড়ে নরেনের, এটা যে নরেনের মনের পক্ষে একটুও উচিত নয় ; সরল মনের নরেন এটুকুও বুঝতে পারে না।

গর্দানিবাগের পলাশের লাল দেখতে আর কি-এমন সুন্দর ! মধুপুর পার হলেই ছু'পাশের মাঠে পলাশের মাথাগুলি এমন যে রঙীন আগুনের স্তবকের মতো ফুটে রয়েছে। য়ুধিকাকে গিরিডি নিয়ে যাবার জন্তু কবে আসবেন বলাইবাবু ?

মামী এসে বললেন—গিরিডি থেকে কুম্ভমন্দির চিঠি এসেছে। বলাইবাবু আসবেন না। লিখেছেন—

মামীর হাত থেকে চিঠিটা তুলে নিয়ে য়ুধিকা পড়ে।—ব্যবস্থা হয়েছে, হিমুই তোমাকে গিরিডি নিয়ে আসবে। পরেশবাবুর পিসিমাকে কাশী রেখে আসতে গিয়েছে হিমু, হিমুকে বলে দেওয়া হয়েছে, টেলিগ্রাম করে তোমাকে আগেই জানিয়ে দেবে, কখন কোন্ ট্রেনে দানাপুর

পৌছেবে হিমু। মামী যেন তোমাকে বাড়ির গাড়িতে দানাপুর পর্যন্ত পৌছে দেয়।

—হিমু কে? প্রশ্ন করেন মামী।

—হিমাজিবাবু। হঠাৎ উৎফুল্ল হয়ে উত্তর দেয় য়ুধিকা। আর মুখের উপরেও যেন মাঠের পলাশের লাল আভাটা ছুটে এসে লুটিয়ে পড়ে।

—হিমাজিবাবু কে? আবার প্রশ্ন করেন মামী।

—তুমি তো তাকে দেখেছো। ঐ যে, যে ভদ্রলোক এবার আমাকে গিরিডি থেকে নিয়ে এলো।

—তাই বল। ছেলেটিকে দেখে বড়ো ভালো ছেলে বলে মনে হলো।

—ভালো বৈকি।

—ছেলেটি দেখতেও বেশ।

—তা, খারাপ কেন হবে?

—তেমন শিক্ষিত নয় বোধহয়?

—একটুও শিক্ষিত নয়। কিন্তু...

—অবস্থাও বোধহয় খারাপ?

—ঠিক জানি না, তবে গরীব মানুষ বলেই মনে হয়। কিন্তু তাতে কি আসে যায়?

মামী মুখ টিপে হাসেন—দূর পাগল মেয়ে; যার তার সম্বন্ধে বলতে নেই।

পাটনা থেকে কতবার গিরিডি যেতে হয়েছে, কিন্তু য়ুধিকা ঘোষের মুখটা সে যাত্রার জন্ত তৈরি হতে গিয়ে এরকম খুশিতে লালচে হয়ে উঠেছে কি কখনও? কোনোদিনও না। এতদিন তো শুধু গিরিডি থেকে পাটনা ছুটে আসার পালাটাই জীবনের একটা ভাবনামধুর আর উদ্বেগসুন্দর পালা ছিল। কিন্তু গিরিডি থেকে ফিরে যাওয়ার হয়রানিটাও যে কল্পনায় মিষ্টি হয়ে উঠেছে। বুঝতে পারছে কি য়ুধিকা?

হিমুর টেলিগ্রাম এলো, আজই রাত আটটা পঁয়ত্রিশের ট্রেনে

দানাপুর পৌঁছবে হিমু, এবং যুধিকা ঘোষ যেন টিকিট কিনে সেই ট্রেনেই উঠবার জন্ত যথাসময়ে দানাপুরে উপস্থিত থাকে।

এখন ছপুর মাত্র; অনেক সময় আছে। কিন্তু যুধিকা ঘোষের ব্যস্ততা দেখে হেসে উঠলেন মামী—মামীর বাড়িতে কি খেতে পাচ্ছিলো না যুধি, গিরিডি যাবার নাম শুনেই লাফিয়ে উঠলো কেন?

দানাপুরের প্র্যাটকর্মে দাঁড়িয়ে আগন্তুক আটটা পর্যট্রিশের ট্রেনটাকে দেখতে পেয়ে হেসে ওঠে যুধিকা ঘোষের মুখ। এবং ট্রেন থামবার পর, একটি কামরা থেকে হিমুকে নেমে আসতে দেখে সে হাসিটা আর একবার চমক দিয়ে যেন আরও সুন্দর হয়ে গেল।

ট্রেন ছাড়লো যখন, তখন কামরার একই সীটের উপর হিমুর পাশে ধপ করে বসে পড়ে যুধিকা ঘোষ, আর হাঁপ ছেড়ে বলে—আঃ, আমাকে গিরিডি নিয়ে যাবার জন্ত আপনিই আবার আসবেন, আমি কোনোদিন ধারণাও করতে পারিনি।

হিমু—হ্যাঁ, আমি কাশী যাচ্ছি শুনতে পেয়ে আপনার মা ডেকে পাঠালেন, আর...

যুধিকা—সব জানি, সব জানি। আজই মা'র চিঠি পেয়েছি... যাই হোক, আমাকে কিন্তু পরের স্টেশনেই চা খাওয়াতে হবে; সেই বিকালে এক কাপ খেয়েছিলাম, তারপর আর...আমার ব্যাগটা ওপর থেকে একবার নামিয়ে দিন তো হিমাড্রিবাবু, প্লীজ...আর দেখুন তো একবার, সীটের নিচে একবার উঁকি দিয়ে দেখুন না, জলের কুঁজোটা উঠেছে, না দানাপুরেই পড়ে রইল?

উঠে দাঁড়ায় হিমু, আর যুধিকা ঘোষের এতগুলি নির্দেশের ইঙ্গিতে খাটতে গিয়ে যেন তাল সামলাতে পারে না। বাকের উপরে তাকিয়ে হিমু বলে—না, জলের কুঁজো নেই। আর উবু হয়ে বসে মাথা নিচু করে সীটের নিচে তাকিয়ে বলে—কই, আপনার ব্যাগ এখানে নেই।

খিল খিল করে হেসে ওঠে যুধিকা—আপনারও এরকম ভুল হয়?

আপনি না খুব স্মার্ট, কাজের মানুষ !

বিত্রতভাবে তাকায় হিমু—কি হলো ?

যুধিকা বলে—ব্যাগটা বান্ধের ওপরে, আর কুঁজোটা সীটের নিচে ।
লজ্জিত হয় হিমু । আবার বান্ধের দিকে আর সীটের নিচে
তাকিয়ে নিয়ে বলে—হ্যাঁ, ঠিক সবই আছে ।

যুধিকা—তবে দিন ।

হিমু—কি ?

যুধিকা—এক গেলাস জল ।

কুঁজো থেকে গেলাসে জল ঢেলে যুধিকার হাতের কাছে এগিয়ে দেয়
হিমু ।

যুধিকা হাসে—আপনি খান । আপনার জন্তেই জল চেয়েছি ।

হিমু একটু আশ্চর্য হয়ে তাকায় । যুধিকা বলে—আমি দেখেছি
হিমাদ্রিবাবু দানাপুর স্টেশনে আপনি জলের কলের দিকে এগিয়ে
গিয়েছিলেন...কিন্তু ট্রেন ছেড়ে দিল বলে জল না খেয়েই চলে এলেন ।

জল খেয়ে নিয়ে হিমু বলে—ওঃ, এরকম কাণ্ড তো সারা জীবন করে
আসছি । ওসব গা-সহা হয়ে গিয়েছে ।

যুধিকা ঘোষের চোখ, উদাসীনের কঠোর আভিজাত্যে তৈরি দু'টি
চোখ অপলক হয়ে হিমু দন্তের মুখের দিকে বেশ কিছুক্ষণ তাকিয়ে থাকে ।
বোকা হিমু দন্তের মুখের ভাষাকে যে কবির ভাষার মতো মনে হয় ।
তেষ্টা পায়, এবং ছুটেও যায় হিমু দন্ত । কিন্তু বেশি দূর এগিয়ে যাবার
সৌভাগ্য হয় না । তেষ্টার বেদনা বুকে নিয়ে ছুটেতে ছুটেতে ফিরে যায়,
নইলে ট্রেন ছেড়ে যাবে ।

চারু ঘোষের মেয়ে তার নিজের মনটাকে বুঝতে চেষ্টা করে, এবং
আশ্চর্যও হয় । হিমু দন্তের উপর আজ আর একটুও রাগ করতে পারছে
না কেন মনটা ? যার উপকার সহ্য করতে করতে বিরক্ত হয়ে গিরিডি
থেকে পাটনা পর্যন্ত সারাটা পথ বিত্ৰীভাবে কেটেছিল, তারই কাছে আজ
উপকার চাইতে ইচ্ছা করছে । হিমু দন্তকে খাটাতে ইচ্ছে করছে ! এক
গেলাস জল দিক, ব্যাগটা হাতে তুলে দিক । পরের স্টেশনে ট্রেন

খামলেই যেন নিজে নেমে গিয়ে আর নিজের হাতে চাএর চাপ এনে
যুধিকার হাতের কাছে এগিয়ে দেয় হিমু।

বোধহয় প্রায়শ্চিত্ত করছে যুধিকা ঘোষের সেদিনের অকারণ ক্ষোভে
রাগে আর সন্দেহে অভিভূত মনটা। ভদ্রলোক একটু বেশি ভালোমানুষ
হয়েই বোধহয় জীবনের সবচেয়ে বড়ো অপরাধ করেছে।

যুধিকা হঠাৎ বলে—আপনি তো সবারই উপকার করেন
হিমাড্রিবাবু।

হিমু হাসে—যদি কেউ ডাকে এবং যদি আমার সাধ্য থাকে, তবে
তাকে একটু সাহায্য করি, এই মাত্র।

যুধিকা হাসে—এই জন্তেই আপনার উপকারের দাম কেউ দিল না।

হিমু—দামই যদি পেলাম, তবে উপকার করা আর হলো কোথায় ?

যুধিকা—আপনার এই বাতিকেই কোনো অর্থ হয় না।

হিমু—হ্যাঁ, আপনার বাবা তাই বলেছিলেন বটে।

চমকে ওঠে যুধিকা, যুধিকার চোখে একটা বেদনার ছায়াও দেখা
যায়।

—বাবার কথা শুনে আপনি সেদিন বোধহয় খুব দুঃখিত হয়েছিলেন ?

হিমু—হয়েছিলাম ; কিন্তু তাতে কি আসে যায় !

যুধিকা উঠে দাঁড়ায় !—না, আপনার সঙ্গে তর্ক করে কোনো লাভ
নেই। মোট কথা...

হিমু—বলুন।

যুধিকা—আমি চা খেয়েই শুয়ে পড়বো। আর, আপনি...
সাবধান...

হিমুর চোখের দৃষ্টিও কঠোর হয়ে ওঠে—কিসের সাবধান করছেন ?

যুধিকা—আপনি আবার ঐ দরজার পাশের কোণটিতে কাত হয়ে
দাঁড়িয়ে, কাঠের উপর মাথা ঠুকে ঠুকে ঘুমোতে পারবেন না।

হিমুর চোখের কঠোর দৃষ্টিটা কেন হঠাৎ বিস্ময় আর লজ্জার সব
উত্তাপ হারিয়ে শান্ত হয়ে যায়। যুধিকা ঘোষের কাছ থেকে সমবেদনার
মতো অদ্ভুত একটা কোমল অনুভবের ধমক খেতে হবে, কল্পনা করতে

পারেনি হিমু। নিজেরই রুক্ষ মেজাজের উপর রাগ হয়; এবং হাসতে চেষ্টা করে হিমু—সেদিন গাড়িতে একটুও জায়গা ছিল না, তাই বাধ্য হয়ে...

যুধিকা—জায়গা থাকলেই বা কি? আপনি আমার কাছে থাকবেন। এখানেই বসে থাকবেন, নইলে—সত্যিই আমার ভয় করবে হিমাদ্রিবাবু।

হিমু—না না, ভয় কিসের? আপনি নিশ্চিত মনে ঘুমিয়ে পড়ুন। কামরার আর এক প্রান্তের সীটের উপর বসে আছেন যে প্রৌঢ়া বাঙালী মহিলা, তিনি অনেকক্ষণ ধরে যুধিকা ও হিমুর ভাষাও নিশ্চয় বুঝতে পারছেন। সুতরাং, তাঁর চোখে একটা সন্দেহের দৃষ্টি জ্বলজ্বল করবে তাতে আর আশ্চর্য কি?

যুধিকার চোখ প্রৌঢ় বাঙালী মহিলার চোখের দিকে পড়তেই হিমুর গায়ে আস্তে একটা ঠেলা দিয়ে আর মুখের হাসিটা চাপা দিতে চেষ্টা করে যুধিকা চাপা স্বরে ডাকে—হিমাদ্রিবাবু।

—কি?

—দেখছেন তো।

—কি দেখতে বলছেন?

—আস্তে কথা বলুন। সব শুনতে পাচ্ছেন ঐ মহিলা।

—কি শুনতে পেয়েছেন?

—আমাদের কথা।

—তাতে ক্ষতি কি?

—তাতে ভয় আছে।

—কিসের ভয়?

—উনি সন্দেহ করছেন।

—কি সন্দেহ?

—আপনি কিছুই আন্দাজ করতে পারছেন না?

—না।

—উনি সন্দেহ করেছেন, আমরা বোধহয় স্বামী-স্ত্রী নই।

—বাজে সন্দেহ। লজ্জিত হয়ে মাথা হেঁট করে হিমু, আর হাসতে থাকে।

যুধিকা হেসে হেসে ফিসফিস করে—আঃ, আপনি অকারণে বেচারার ওপর রাগ করছেন। আপনার ব্যবহার দেখে আপনাকে আমার দাদা বলেও কেউ মনে করবে না।

হিমু—সে তো সত্যি কথা।

যুধিকা—কোনো আত্মীয় বলেও মনে করবে না।

হিমু—হ্যাঁ, তাই বা মনে করবে কেন?

যুধিকা—স্বামী বলেও মনে করবে না।

হিমু—আপনিও বড়ো বাজে কথা বলতে পারেন।

যুধিকা—আমি বলতে চাই, আমাকে দেখে তো কেউ বিবাহিত মেয়ে বলে মনে করতে পারে না।

হিমু—তা তো নিশ্চয়।

যুধিকা হাসে—তাই উনি বোধহয় ভাবছেন যে, একটা বেহায়া মেয়ে তার ছেলেকুর সাথে কোথায় যেন সরে পড়েছে।

হিমু হাসে—আপনি মিছিমিছি মহিলাকে সন্দেহ করছেন। উনি এসব কিছুই ভাবছেন না।

যুধিকা—আপনাকে ও আমাকে যদি ছুই বন্ধু বলে উনি মনে করেন, তবে কি ভুল হবে?

হিমু—না, সেটা মনে করা ভুল হবে কেন?

একটা স্টেশনে ট্রেন ধেমেছে। যুধিকা ব্যস্তভাবে বলে—চা, আমার চা কই হিমাদ্রি, হিমাদ্রিবাবু।

—দেখি, অন্তত চেষ্টা করে তো দেখি। বলতে বলতে কামরা থেকে নেমে যায় হিমু। জানালা দিয়ে মুখ বাড়িয়ে দেখতে থাকে যুধিকা। এবং মনে মনে একটা বিস্ফোভ আগে থেকেই তৈরি করে রাখে; যদি শুধু এক পেয়লা চা নিয়ে আসে হিমু, তবে বেশ অভদ্রভাবে ছুটো কড়া কথা হিমুকে শুনিরে দিতে হবে। এই তোমার আক্কেল? তোমার চা কই? বন্ধুত্বের সাধারণ একটা নিয়মও জান না?

নিজের মনের এই করুণা নিয়ে মনে মনে হেসে রেগে কতক্ষণ নিজেকে মাতিয়ে রেখেছিল বুঝতে পারেনি যুধিকা। ট্রেনের ইঞ্জিনটা তাঁর একটা শিশু দিয়ে রাত্রির বাতাস কাঁপিয়ে দিতেই চমকে ওঠে যুধিকা। আঃ, এক কাপ চা নিয়ে আসতে এত দেরি করছে কেন হিমাদ্রি? সত্যিই তো নিজের হাতে চা-এর পেয়ালা বয়ে নিয়ে আসবার জন্তু ওকে বলা হয়নি? একটা চা-ওয়ালাকে ডেকে আনলেই হয়। আর, তারপর হিমাদ্রি যদি এখানে জানালার কাছে, প্ল্যাটফর্মের ঠিক এই জায়গাটিতে আলো-ছায়ার মধ্যে দাঁড়িয়ে চা-ওয়ালার হাত থেকে পেয়ালাটা নিজের হাতে তুলে নিয়ে যুধিকার হাতের কাছে তুলে দেয়, এবং তারপর যদি নিজে এক পেয়ালা চা নিয়ে খেতে খেতে যুধিকার সঙ্গে গল্প করে, তা হলেই তো ওকে আর নিছক একটা বাতালের মানুষ বলে অভিযোগ করতে হয় না। তাহলে মেনে নিতে হবে, বন্ধুত্ব বুঝবার মতো মন ওর আছে। এবং বুঝতেও পারে যাবে যে, খুব বোকাটি নয় হিমাদ্রি, বন্ধুত্ব করবার রীতি-নীতিও বেশ ভালোই জানে।

তুলে উঠলো ট্রেনটা, তারপরেই চলতে শুরু করলো।

কিন্তু হিমাদ্রি? কোথায় হিমাদ্রি? জানালা দিয়ে মুখ বাড়িয়ে সারা স্টেশনের এদিকে আর ওদিকে চোখ ঘুরিয়ে দেখতে থাকে যুধিকা, হিমাদ্রি কোথাও নেই! লাক্ষ্মী কাঁপ দিয়ে কত যাত্রীই কত কামরার দরজায় উঠে পড়লো, কিন্তু প্ল্যাটফর্মের কোনো প্রান্ত থেকে হিমাদ্রির মতো দেখতে কোনো ছায়ামূর্তি চলন্ত ট্রেনের এই কামরার দিকে ছুটে আসছে না।

...হিমাদ্রি! চোঁচিয়ে ডাক দেয় যুধিকা। যুধিকার উদ্বিগ্ন কণ্ঠস্বরের আহ্বান চলন্ত ট্রেনের চাকার শব্দে ছিন্নভিন্ন হয়ে মিলিয়ে যায়। প্ল্যাটফর্মের ল্যাম্পপোস্টগুলি চকিত ছবির মতো যুধিকার চোখের উপরে একটা আতঙ্কের ধাঁধা রেখে দিয়ে তরতর করে পার হয়ে যাচ্ছে। বেশ জোরে ছুটে আসছে ট্রেন।

—হিমাদ্রি! হিমাদ্রি! কামরার জানালা দিয়ে বাতাসে আর্তনাদ

ছুঁড়তে ছুঁড়তে যুদ্ধিকার গলা ধরে যায়। নেতিয়ে পড়ে মাথাটা
আর চোখের কোণ দুটো তপ্ত হয়েই ভিজে যায়।

একি হলো? একটা তামাসা করতে গিয়ে, কে জানে কোন
বিপদের মধ্যে হিমাঙ্গিকে ফেলে দিয়ে চলন্ত ট্রেনটার সঙ্গে ছুঁ ক'রে ছুটে
পালিয়ে যাচ্ছে যুদ্ধিকা ঘোষের জীবনটা!

বিশ্বাস করতে ইচ্ছা হয়, নিশ্চয় কোনো না কোনো কামরার উঠে
পড়েছে হিমাঙ্গি। কিন্তু বিশ্বাস করতে পারে না যুদ্ধিকা। নিশ্চয়
মানুষটা স্টেশনেই কোথাও পড়ে আছে, কিন্তু পড়ে রইল কেন?

একসঙ্গে মনের ভিতরে অনেক ভয় আর অনেক সন্দেহ ছটফট
করতে থাকে। এবং জানালা দিয়ে আবার বাইরের দিকে তাকিয়ে,
যেন কামরার আলোর চোখটাকে আড়াল করে নিজের চোখ দুটোকে
অন্ধকারের গায়ে মুছে ফেলতে চেষ্টা করছে যুদ্ধিকা; কি ভয়ানক ঠাট্টা
ক'রে মানুষকে জব্দ করতে পারে হিমাঙ্গি।

কতক্ষণে আর একটা স্টেশন আসবে, আর ট্রেনটা থামবে? এবং
ভারপরেণ যদি দেখা যায় যে হিমাঙ্গি এলো না, তবে? সত্যিই যদি
অন্য কোনো কামরাতে না উঠে থাকে হিমাঙ্গি, তবে?

তবে আর কি? গিরিডি পর্বন্ত ট্রেনের ভিতরে সঙ্গীহীন কয়েকটা
ঘণ্টার জীবন চুপ ক'রে সহ্য করতে হবে, এই মাত্র। ধমক দিয়ে আর
রাগ ক'রে নিজেকে বুঝিয়ে দিয়েও বুঝতে পারে যুদ্ধিকা, এই কয়েকটা
ঘণ্টার জীবনই যে অসহ্য হয়ে উঠবে। পাঁচটা মিনিটও মনের শাস্তি
নিয়ে বসে থাকা যাবে না, টান হয়ে গুয়ে ঘুমিয়ে পড়া আর স্বপ্ন দেখা
তো দূরের কথা।

বাবা যখন প্রশ্ন করবেন, একলা এসেছি মনে হচ্ছে, তখন বাবার
মুখের উপর ছ'কথা ভালো করে শুনিয়ে দেওয়া যাবে। হিমাঙ্গিকে
তোমাদের বিশ্বাস করাই ভুল হয়েছে। এবং ভবিষ্যতে যেদিন
হিমাঙ্গিকে ধরতে পারা যাবে, সেদিন কৈফিয়ৎ চাইতেও অসুবিধা হবে
না,—এরকম একটা কাণ্ড করল কেন হিমাঙ্গি? চা আনতে গিয়ে
পালিয়ে গেল কেন?

কিন্তু হিমাদ্রির জন্ত কেউ যদি এসে কৈফিয়ৎ দাবি করে, কই আগ্নাদের হিমাদ্রিকে কোথায় ফেলে রেখে তুমি একলা হেসে হেসে গিরিভিতে ফিরে এলে মেয়ে, তবে? তবে কি উত্তর দেবে যুথিকা? যদি সিঁছর দিয়ে রাঙানো সিঁথি নিয়ে, মাথার কাপড়টা একটু সরিয়ে নিয়ে, কুড়ি বছর বয়সের ঢলঢলে মুখটি তুলে কোনো মেয়ে এসে হঠাৎ প্রশ্ন করে বসে—কি গো চারু ঘোষের মেয়ে, ওকে কোথায় ফেলে রেখে এলে? তুমি কি মনে করেছে ওর কেউ নেই?

সত্যিই হিমাদ্রির এরকম কেউ আছে কি? যদি থেকে থাকে, তবে সে যে তার চোখের দৃষ্টিকে জ্বলন্ত শিখার মতো কাঁপিয়ে আর কেঁদে কেঁদে যুথিকা ঘোষকে অভিশাপ দেবে।—তুমি একটা খেয়ালের তামাশা করে যে সর্বনাশ করলে, সে সর্বনাশ যেন তোমারও হয়।

জানালায় উপর মাথা রেখে আর বন্ধ নিঃশ্বাসের একটা গুমোট বুকের মধ্যে নিয়ে বৃথা ঘুমোবার চেষ্টা করতে গিয়ে ছেঁড়া ছেঁড়া ভাবনার মধ্যে ছটফট করতে থাকে যুথিকা। না মাথাটা গরম হয়ে উঠেছে বলেই বোধহয় যত অদ্ভুত কল্পনা আর চিন্তা মাথা জুড়ে লাফালাফি করছে।

সেঁ। সেঁ। করে হাওয়া কেটে যেন উড়ে যাচ্ছে ট্রেনটা। ভয়ানক শব্দ। বোধহয় একটা নদীর পুল পার হয়ে চলে যাচ্ছে ট্রেন। যুথিকার মাথার উপর যেন ঠাণ্ডা হাওয়ায় ফোয়ারা ছুটে এসে পড়ছে। ঘুম আসছে ঠিকই, ঘুমিয়ে পড়তে ইচ্ছে করছে।

তারপর আর চেষ্টা করতে বা ইচ্ছে করতে হয় না। অঘোরে ঘুমিয়ে পড়ে যুথিকা।

যুথিকার ঘুম কেউ ভাঙায়নি। ঠাণ্ডা বাতাসের হোঁয়ায় আরাম পেয়ে ঘুমিয়ে পড়া যুথিকার কান ছোটোর বধিরতার ঘোর তবু হঠাৎ ভেঙে যায়। শুনতে পায় যুথিকা ট্রেনের কামরাটা যেন কথা বলছে।

—তুমি ছিলে কোথায়? মেয়েটি এতক্ষণ কি ভয়ানক ছটফট করেছে। শেষে ঘুমিয়ে পড়েছে বেচারী।

—চা তৈরি করতে গিয়ে দেরি হয়ে গেল। তা ছাড়া চা-এর

দোকানটাও তো প্ল্যাটফর্মের উপর নয়, বেশ একটু ভেতরের দিকে ।
হঠাৎ ট্রেনটা ছেড়ে দিতেই দৌড়ে এসে শেষের দিকে একটা কামরায়
উঠে পড়লাম ।

—কি দরকার ছিল, সামান্য চা-এর জন্তু এত দূরে যাবার ?

—ভেবেছিলাম, তাড়াতাড়ি চা-টা পেয়ে যাব । কিন্তু... ।

—তোমরা যাচ্ছ কোথায় ?

—গিরিডি ।

—তোমার বাড়ি গিরিডি ?

—না ; ঠিক আমার বাড়ি গিরিডি নয় ।

—খসুরবাড়ি ?

—না না, সে-সব কিছু নয় ।

—তোমাদের বিয়ে বোধহয় বেশিদিন হয়নি ।

—না না, সে-সব কিছু নয়, আপনি খুব ভুল বুঝেছেন ।

চমকে চোখ মেলে তাকায় যুধিকা, এবং বুঝতে পারে ঐ প্রৌঢ়া
বাঙালী মহিলা হিমাদ্রির সঙ্গে এতক্ষণ ধরে যে-কথা বলাছিলেন, সে-কথাই
ঘুমন্ত যুধিকার স্বপ্নে ভাষা হয়ে কানের মধ্যে বেজেছে । যুধিকার
পাশেই বসে আছে হিমাদ্রি । ট্রেনটা ধেমে রয়েছে ।

যুধিকা—জুকুটি করে গম্ভীর হয়ে বলে—তুমি এরকম একটা কাণ্ড
করলে কেন হিমাদ্রি ?

হিমু—আপনি বিশ্বাস করুন যে... ।

যুধিকা—বেশি আপনি আপনি করবে না । শুনতে বিস্ত্রী লাগে ।
তোমার বয়সের চেয়ে আমার বয়স কিছু কমই হবে ।

হিমু—বেশ তো । বিশ্বাস করো ; চা-ওয়াল লোকটা সামান্য এক
পেয়লা চা তৈরি করতে এত দেরি করে দিল যে ট্রেনটা ছেড়ে দিলো ।

যুধিকা—যদি ট্রেনে উঠতে না পারতে, তবে ?

হিমু বিব্রতভাবে বলে—হ্যাঁ, তাহলে তোমাকে খুব বিপদে পড়তে
হতো । তোমার বাবার কাছে আমাকে একটা কৈকিরং দিতে হতো ।

যুধিকা—তোমার কেউ একজন এসে যদি আমার কাছে কৈকিরং

স্বাধিকার করে বলতো, হিমাত্রি কোথায় ? তবে কি হতো ? কি বলে
তাকে আমি বোঝাতাম যে, আমার বিশেষ কিছু দোষ নেই ?

—আমার জন্ম উদ্বিগ্ন হয়ে তোমার কাছে কৈফিয়ৎ চাইতে আসবে
কে ? কি বলছো তুমি ? হাসালে তুমি !

—কেউ নেই ?

—কেউ নেই ; তুমি কি জান না ?

—আমি জানবো কেমন করে ?

—গিরিডির সকলেই তো জানে ।

—তা জানুক, আমি গিরিডির সকলের মতো নই । আমি কারও
হাঁড়ির খবর জেনে বেড়াই না ।

—যাই হোক ; বলতে গিয়ে হেসে ফেলে হিমু । আমার কৈফিয়ৎ
তো শুনলে ; এইবার বিছানাটা পেতে দিই, কেমন ?

—না, থাক ।

—কতক্ষণ জেগে বসে থাকবে ?

—যতক্ষণ পারি ।

—না না, রাত জেগে কোনো লাভ নেই ।

—লাভ আছে ।

—কি ?

—গল্প করতে পারা যাবে ।

হিমু হাসে—আমার সঙ্গে গল্প করলে তোমার লাভ হবে না
যুধিকা ।

যুধিকার চোখ আবার গম্ভীর হয় ।—তার মানে ?

হিমু হাসে—আমি সত্যিই গল্প টল্ল জানি না, বলতেও পারি না
যুধিকা । ছোটো ছোটো ছেলে-মেয়েরা, যাদের আমি পড়াই, তারাও
আমার উপর ভয়ানক রাগ করে, গল্প বলতে পারি না বলে । ভুলু
একদিন বলেই ফেললো, মাস্টার মশাইটা কিছু জানে না ।

যুধিকা—এই তো বেশ গল্প করতে পারছো ।

প্রৌঢ়া বাঙালী মহিলা উপরের আলোটার দিকে একবার তাকিয়ে

যেন রাগের সুরে হঠাৎ চোঁচিয়ে গুঠন—কি যে কাণ্ড, ছিঃ ; ভগবান জানেন কি ব্যাপার !

মাথা হেঁট করে মুখের হাসি লুকিয়ে এবং হাতটাকেও লুকিয়ে লুকিয়ে এগিয়ে দিয়ে হিমুর কামিজের পকেটটা ধরে টান দেয় যুধিকা। ফিস ফিস করে বলে—শুনলে তো হিমাদ্রি, মহিলা কি বলছেন ?

হিমু—না, ঠিক শুনতে পাইনি।

যুধিকা—মহিলা একটা সমস্ভায় পড়েছেন।

হিমু—কিসের সমস্ভা ?

যুধিকা—উনি বুঝতে পারছেন না, কে কার সঙ্গে চলেছে। তোমার সঙ্গে আমি যাচ্ছি, না আমার সঙ্গে তুমি যাচ্ছ।

হিমু হাসে—তোমার কাণ্ড দেখে মনে হতে পারে, তোমার সঙ্গেই আমি যাচ্ছি।

যুধিকা—তার মানে, মহিলা তোমাকে একটা অপদার্থ বলে মনে করেছেন।

হিমু—অনেকেই তো তাই মনে করে, মহিলাও তাই মনে করবেন, তার আর আশ্চর্য কি ?

যুধিকা—অনেকে মানে ? কে কে ?

হিমু—তা কি আর মনে করে রেখেছি ? দেখেছি, অনেকেই তাই মনে করে।

যুধিকা—সেই অনেকের মধ্যে আমিও আছি বোধ হয় ?

হিমু—থাকলে দোষ কি ?

যুধিকা কটমট করে হিমাদ্রির মুখের দিকে তাকায়—ওভাবে বেকিয়ে কথা বলো না। ঠিক করে, স্পষ্ট করে বলো তোমার কি ধারণা ? আমিও তোমাকে অপদার্থ বলে মনে করি ?

হিমু—বললাম তো, তাতে দোষের কি আছে ? মনে করলে অন্তায় কিছু হবে না।

কে বলে মাটির মানুষ ? বেশ তো ক্ষোভ অভিমান আর অভিযোগের টাটকা রক্তমাংস দিয়ে তৈরি বেশ গভীর বুদ্ধির মানুষ ! খুব

বুঝতে পারে, খুব দেখতে পায়, আর কিছুই ভুলে যায় না; কি
ভয়ানক নিখুঁত হিমাদ্রির মাটির মানুষের ছদ্মবেশটা! ইচ্ছে করলে, ওর
মুখের ঐ বোকা-বোকা হাসিটাকেই ঝিক করে একটা বিদ্যুতের জ্বালায়
জ্বালিয়ে দিয়ে মানুষের মুখের দিকে বেশ তো তাকাতে পারে হিমাদ্রি।
মানুষের মনের কোমলতার উপর বেশ আঘাত দিয়ে কথা বলতে পারে।
যুদ্ধিকা ঘোষের মনের সব কৌতুক আর কৌতূহলের দুঃসাহস চমৎকার
একটি নিষ্ঠুর বিদ্রোপের খোঁচা দিয়ে রক্তাক্ত করে দিয়ে এখন কেমন
নির্বিকার মনে নশ্বর ভিবে ঠুকছে হিমাদ্রি।

যুদ্ধিকা বলে—আমিও তোমাকে এরকম একটা শক্ত কথা বলতে
পারি।

হিমু হাসে—একটা কেন, অনেক বলতে পার।

যুদ্ধিকা—মিথ্যে অভিযোগের কথা নয়। সত্যি অভিযোগ।

হিমু হাসে—তোমাকে সময় মতো এক পেয়ালা চা এনে দিতে
পারিনি, এছাড়া আমার বিরুদ্ধে বোধহয় আর কোনো অভিযোগ খুঁজে
পাবে না।

যুদ্ধিকা—খুঁজে পেয়েছি।

হিমু—কি?

যুদ্ধিকা—তুমি আমাকে একটা অহঙ্করে মেয়ে বলে মনে করো।

হিমু হাসে—তা মনে করি, কিন্তু সেজন্য রাগ করি না নিশ্চয়।

যুদ্ধিকা—রাগ করবে কেন? তুমি যে ভয়ানক চালাক। মানুষকে
ছোটো ভাবতে তোমার বেশ মজা লাগে। আর।...

আনমনার মতো কিছুক্ষণ চুপ করে থাকে যুদ্ধিকা। তারপরে
গলার স্বরের একটা রুদ্ধ তীব্রতাকে যেন কোনোমতে চেপে রেখে
আস্তে আস্তে বলে—তাই পরের উপকার করে বেড়াও। ওটা মোটেই
তোমার বাতিক নয়। ওটা তোমার ভয়ানক একটা অহঙ্কার। মানুষ
নিজেকে কত ছোটো করে কেলতে পারে, তাই দেখে মনে মনে মজা
করবার জন্য অকারণ পরের উপকার করে বেড়াচ্ছ। গিরিডির কেউ
তোমাকে বুঝতে পারেনি, কিন্তু আমি বুঝেছি।

হিমু—তুমি যে আমাকে আমার চেয়েও বেশি বুঝে ফেলেছো মনে হচ্ছে ।

যুধিকা—আজ্ঞে হ্যাঁ । তুমি নিজেই জাননা যে তুমি—

হিমু—বলেই ফেলো ।

যুধিকা—তুমি কি ভয়ানক চালাক আর অহঙ্কারী !

এক টিপ নস্টি নিয়ে হিমু আবার হেসে ওঠে—বেশ, অনেক গল্প তো হলো ।

যুধিকা হাসে—এবার ভয়ানক খিদে পেয়েছে !

হিমু—তোমার সঙ্গে খাবার আছে নিশ্চয় ?

যুধিকা—আছে ; কিন্তু সে খাবার খাব না ।

হিমু—কেন ?

যুধিকা—কোনো স্টেশনে ট্রেনটা ধামুক । খাবারওয়ালার কাছ থেকে পুরি তরকারী কিনে খাবো ।

হিমু—না ! খবরদার না ।

যুধিকা—তুমি বাধা দেবার কে ?

হিমু—আমার বাধা না শুনলে কোনো লাভ হবে না ।

যুধিকা—তার মানে ?

হিমু—আমি তোমার সঙ্গে লুচি সন্দেশ খেতে রাজি হব না ।

চমকে ওঠে যুধিকা । এবং মনে মনে সারা গিরিডির একটা অসার ধারণার আনন্দকে ধিক্কার দেয় । হিমু দত্তকে চিনতে বুঝতে আর ধরতে পারেনি কেউ । ওর বুকের প্রত্যেক নিঃশ্বাস ওর উদাস আনমনা ভালোমানুষী চোখের প্রত্যেকটা দৃষ্টি যে চরম চালাকির লীলাখেলা যুধিকা ঘোষের মনের গভীরের এত গোপন ইচ্ছাটাকেও কত সহজে দেখে ফেলেছে হিমাদ্রি ।

সত্যি কথা ; হিমাদ্রিকে লুচি-সন্দেশ খাওয়াবার একটা ছতো খুঁজছিল যুধিকা । কিন্তু সন্দেহ ছিল যুধিকার মনে, বাতিকেই মানুষ হিমাদ্রি যুধিকার খাবারের বুড়ির লুচি-সন্দেশ স্পর্শ করতে রাজি হবে না । হিমুর সেই অনিচ্ছাকে জয় করবার জগু কি কথা বলতে হবে,

তা'ও মনে মনে ঠিক করে রেখেছিল য়ুধিকা। কিন্তু তুমি না খেলে আমিও লুচি সন্দেশ খাব না, একথা বলবার সুযোগও পেল না য়ুধিকা। মূর্ত হিমু দত্ত মানুষের মনের একটা সদিচ্ছাকে, একটা সৌজন্নের আগ্রহকেও কি-ভয়ানক আঘাত দিয়ে ব্যাধা দিতে জানে।

কিন্তু হিমাঙ্গির বুদ্ধির কাছে কি হার মানবে চারু ঘোষের মেয়ে য়ুধিকা ঘোষ ?

য়ুধিকা বলে—তুমি যদি সত্যিই বাধা দিয়ে আমাকে পুরি-তরকারী খেতে না দাও, তবে মনে রেখ, আমার খাওয়াই হবে না।

হিমু—কেন ? তোমার সঙ্গেই তো ভাল খাবার আছে।

য়ুধিকা—হ্যাঁ আছে। তেমনই থাকবে !

হিমু—তার মানে ?

য়ুধিকা—তার মানে, তুমি যদি সেবারের জার্নির সময় আমার একটা ভুলের কথা ভুলতে না পেরে শুধু একটা প্রতিশোধ নেবার ইচ্ছায়...

হিমু হাসে—তুমিও তো মানুষের ভুলের খুঁটিনাটি ধরতে কম যাও না ! যাও আমি তর্ক করতে চাই না।

তর্ক ছেড়ে দিয়ে য়ুধিকাও হাসে, এবং সে হাসির মধ্যে বোধহয় বিজয়িনীর মনের মতো একটা সুখী মনের গর্বও হাসে—খাবার খাওয়ার পালা একটু পরে শুরু হলেই ভালো হয় ; এখন গল্পের পালা থামিয়ে দেওয়া উচিত নয়। কি বলো হিমাঙ্গি ?

হেসে হেসে গল্প করবার আনন্দও অবাস্তুর কোনো প্রশ্নের আঘাতে এলোমেলো হয়ে যায় না। কথায় কথায় শুধু একটি প্রশ্নকে কয়েকবার টেনে নিয়ে এসে শেষে শান্ত হয়ে যায় য়ুধিকা।

—তোমার কেউ নেই, এটা কি একটা কথা হলো ? এ কথার কোনো মানে হয় না হিমাঙ্গি।

হিমু—মানে হোক বা না হোক, কথাটা সত্যি।

য়ুধিকা—তুমি আমার কথাটাই বুঝতে পারনি।

আশ্চর্য হয় হিমু। না বোঝবার কি আছে ? অনেক কথাই তো

জিজ্ঞাসা করেছে যদুথিকা, যে কথা হিমুর গিরিডি-জীবনের এক বছরের মধ্যে কোনো মানুষ হিমুকে জিজ্ঞাসা করেনি। যদুথিকার ছোটো ছোটো এক একটা সরল প্রশ্নের উত্তরে হিমুও সরল ভাষায় উত্তর দিয়ে দিতে পেরেছে; হ্যাঁ, বাবা-মা দুজনের কেউ এখন আর বেঁচে নেই। দেশের বাড়ি অনেকদিন আগেই বিক্রি হয়ে গিয়েছে। ভাই-বোন কেউ নেই; চাকরিরচেষ্টা করতে করতে সেই ডিক্রগড় থেকে হঠাৎ এই গিরিডিতে এসে পড়া, এই তো ব্যাপার। দেখা যাক, আবার কোন্‌দিকে ভেসে পড়তে হয়।

যদুথিকা হেসে ফেলে—সব বলেও একটি কথা বোধহয় বলতে পারলে না হিমাড্রি। বোধহয় বলতে তোমার লজ্জা করছে।

হিমু—আর কি বলবো বুঝতে পারছি না।

যদুথিকা—এমন কেউ একজন তো থাকতে পারে, যে তোমাকে ভেসে পড়তে দিতে চায় না; ধরে রাখতে চায়?

হিমু—তার মানে?

যদুথিকা—বিয়ে করোনি?

হিমু হো হো করে হেসে ওঠে।—এত কথা শোনার পর তোমার মনে এরকম একটা অদ্ভুত প্রশ্ন দেখা দিল, কি আশ্চর্য!

যদুথিকা—বুঝলাম, বিয়ে করোনি। কিন্তু...কিন্তু তাতেও প্রমাণ হয় না যে, তোমার কেউ নেই।

হিমু বিরক্ত হয়ে বলে—না নেই। আমি পাগল নই, আমার ওসব অদ্ভুত শখ থাকতে পারে না।

যদুথিকাও যেন অদ্ভুত এক জেদের আবেগে আরও জোর দিয়ে বলে—তুমি পাগল নাই বা হলে, কিন্তু গিরিডিতে অদ্ভুত একটা পাগল মেয়ে তো থাকতে পারে; তোমার অদ্ভুত শখ না থাক, অল্প কারো তো থাকতে পারে। সে তোমাকে ভেসে পড়তে দিতে রাজি হবে কেন?

হিমু—না, এরকমও কেউ নেই।

যদুথিকা—কেন নেই?

হেসে ফেলে হিমু—ঠাট্টা করবার আর গল্প করবার কিছু না থাকলেও এসব কথা বলতে হয় না।

যুধিকা—তোমাকে যদি ভয় করতাম, তবে নিশ্চয়ই এসব কথা জিজ্ঞাসা করতাম না।

যুধিকার মুখের দিকে তাকিয়ে গম্ভীর হয়ে যায় হিমু। ভয় করে না যুধিকা, কিন্তু ভয় করে না বলেই কি এত ঠাট্টা করতে হয়? চারু ঘোষের মেয়ের মাথার মধ্যে একরকমের পাগলামির পোকা আছে বোধহয়।

কিন্তু মনটাকে এত গম্ভীর রেখেও বুঝতে পারে হিমু দত্ত, যুধিকার প্রশ্নগুলি যেন হিমু দত্তের জীবনের উপর মানুষের মায়ার প্রথম অভিনন্দন। যে কথা কেউ জিজ্ঞাসা করেনি, সে-কথা জিজ্ঞাসা করেছে চারু ঘোষেরই অহঙ্কারী মেয়ে; আপন বলতে কেউ আছে কিনা হিমু দত্তের। আর কটা কথা মনে পড়ে, এই তো সেই যুধিকা ঘোষ; যে মেয়ে হিমাজিবাবু বলে প্রথম ডেকেছিল। সে ডাকের পিছনে একটা ঠাট্টা ছিল নিশ্চয়; কিন্তু তবু তো ডেকেছিল। এবং শুনতে খারাপও লাগেনি।

কি-যেন বলেছে যুধিকা। বুঝতে না পেরে প্রশ্ন করে হিমু—কি বললে?

যুধিকা—তোমাকে বন্ধু বলে ভাবতে সত্যিই আর ভয় করে না।

হিমুর গম্ভীর মুখ যেন হঠাৎ ভয়ের চমক লেগে কেঁপে ওঠে।—বন্ধু?

যুধিকা—হ্যাঁ। তোমাকে কি একটা পূজনীয় গুরুজন বলে মনে করবো ভেবেছো?

হিমু হেসে ফেলে, বলে—কিন্তু ভয় করবার কথা বলছে কেন?

যুধিকা—ভয় করে না বলছি।

হিমু—কেন?

যুধিকা খিল-খিল করে হেসে ওঠে—তোমার মতো একটা একলা অপদার্থ মানুষকে ভয় করবো কেন?

আস্তে একবার চমকে ওঠে হিমু, তারপরেই অগ্নিদিকে মুখ ফেরায়।

অনেক রাত হয়েছে। আর বেশি গল্প করলে রাতটা চোখের উপরেই ভোর হয়ে যাবে।

হিমু বলে—তুমি এইবার শুয়ে পড় যুদ্ধিকা ।
যুদ্ধিকা শাস্তভাবে বলে—হ্যাঁ ।
বাক্সের উপর থেকে বেডিংটা টেনে নামিয়ে সীটের উপর পেতে দেয়
হিমু ।

যুদ্ধিকা বলে—তুমি এই সতরঞ্চিটা ঐ সীটের উপর পেতে ঘুমিয়ে
পড় লক্ষ্মীটি । সেবারের মতো দাঁড়িয়ে দাঁড়িয়ে সারাটা পথ কষ্ট
ক'রে....

হিমু বলে—না না, কষ্ট করবো কেন ? সেবার কামরাতে জায়গাই
ছিল না ; তাই বাধ্য হয়ে...

যুদ্ধিকা—আর একটা কথা ।

হিমু—কি ?

যুদ্ধিকা আস্তে আস্তে বলে—তুমি আমার গায়ের উপর চাদর-টাদর
মেলে দিতে চেষ্টা করো না । কেমন ?

হিমু—আচ্ছা ।

যুদ্ধিকা—কিছু মনে করলে না তো ?

হিমু—না ।

যুদ্ধিকা—মহিলা হয়তো একটা বাজে সন্দেহ করে বসবেন, সেই
জন্তেই বলছি ।

হিমু—হ্যাঁ, ঠিকই বলেছ ।

এ কি অদ্ভুত কথা বলছে দিদি !—বাবা শুনলে যে রাগ করবে ।
আর মা নিশ্চয় আরও রাগ করে শেষে ধমক দেবে, না, এরকম বিস্ত্রী-
ভাবে বেড়াতে যাবার কোনো মানে হয় না ।

যুদ্ধিকার কথা শুনে আশ্চর্য হয়ে গিয়েছে দুই ভাই, বীরু আর নীরু ।
একবার বাড়ির বাইরে বেড়িয়ে আসতে চায় দিদি ; বীরু আর নীরুকেও
সঙ্গে নিয়ে যেতে চায় ।

কিন্তু ঠিক কোথায় যে বেড়াতে যেতে চায়, সেটা ঠিক স্পষ্ট করে
বলতে পারছে না দিদি । উশীর দিকে নয় ; বরাকরের দিকে নয় ;

বেনিয়াডি কোলিয়াৰি যাবাৰ সড়কৰ দিকে, যেখানে মাঠৰ উপৰ
অনেক পলাশেৰ মাখা লাল ফুলে রঙীন হয়ে রয়েছে, সেদিকেও নয়।
তবে কোথায় ? কোন্ দিকে ?

যুধিকা বলে—ওসবই তো দেখা, তার চেয়ে বরং...

বীৰু—মহেশমুণ্ডাৰ দিকে ?

যুধিকা—না ; অতদূৰে নয় !

নীৰু—তবে কি পরেশনাথের দিকে ?

যুধিকা—না ; পায়ে হেঁটে কি অতদূৰে বেড়াতে যাওয়া যায় ?

বীৰু আৰ নীৰু একসঙ্গে আশ্চৰ্য হয়ে চোঁচিয়ে ওঠে—পায়ে হেঁটে ?

যুধিকা—হ্যাঁ, তাতে কি হয়েছে ? এত বড়ো বড়ো চোখ করে
আশ্চৰ্য হবার কি আছে ?

উদাসীন নামে এত বড়ো বাড়ির আত্মাটাও বোধহয় চমকে
উঠেছে। বেড়াতে যেতে চায় যুধিকা। কিন্তু এত সুন্দর জায়গা
থাকতে ঐ শ্রীহীন শহরের ভিতরে একটু ঘুরে ফিরে বেড়িয়ে আসতে
চায়। তাও আবার গাড়িতে নয়, শুধু পায়ে হেঁটে। তা ছাড়া এমন
একটা অসময়ে।

শহরের দিকে, যে-দিকে এগিয়ে গেলে দেখতে পাওয়া যাবে জগতের
যত ধুলো-ময়লার ভিড়, যত বাজে মানুষের ছুটোছুটি আৰ সোৱগোল,
যত দীনতা আৰ হীনতার ছায়াও পথের উপর আৰ দু'পাশে ছড়িয়ে
আছে। শর্মা ব্রাদার্সের অমন সুন্দর ভ্যারাইটি স্টোর্সের কাছে যেতে
হলেও অনেক বাজে মানুষের ভিড়ের গা ঘেঁষে এগিয়ে যেতে হয়।
গাড়ি ছাড়া কোনোদিনও পায়ে হেঁটে শহরের কোনো দোকানে
আসেনি চারু ঘোষের ছেলে-মেয়ে।

কিন্তু যুধিকা যে-কথা বলছে, সেটা দোকানে-টোকানে যাবার
পৱিকল্পনাও নয়। কোনো পথের জিনিস কেনবার কথাও ওঠেনি।
শুধু শহরের ভিতরেই এদিকে-ওদিকে একবার ঘুরে আসতে চায়
যুধিকা। বাজারের দিকে, চকের দিকে, স্টেশনের দিকে। বিনা
দরকারে শহরের যে-সব পথে ঘুরে বেড়াবার কোনো অর্থ হয় না, সেই

সব পথেই বেড়িয়ে আসবার জন্য অদ্ভুত এক ইচ্ছার খেয়ালে যেন ছুরস্ত হয়ে উঠেছে যুধিকা ঘোষের মন ।

ভয় পায় নীরু ।—কিন্তু রাস্তায় যে ভিখারী আছে দিদি ; নোংরা খেঁকি কুকুরও আছে ।

যুধিকা হাসে—থাকুক না ; ভয় কিসের ?

দিদির সাহসের হাসি দেখে আশ্বস্ত হয় নীরু ।

এবং তারপর আর দেরি হয় না । চারু ঘোষের মেয়ে যুধিকা ঘোষ, সঙ্গে চারু ঘোষেরই ছুই ছেলে বীরু আর নীরু, যখন উদাসীনের ফটক পায় হয়ে সড়কের ধুলো মাড়িয়ে শহরের দিকে এগিয়ে যেতে থাকে, তখন উদাসীনের মালীটাও একটু আশ্চর্য হয়ে হাঁ করে তাকিয়ে দেখতে থাকে ।

মাত্র বিকেল হয়েছে । আদালত থেকে চারু ঘোষের বাড়ি ফিরতে এখনও বেশ দেরি আছে ; এবং চারু ঘোষের স্ত্রীও এখন ডাক্তারের উপদেশ অনুযায়ী তিন ঘণ্টার রেস্ট নেবার জন্য উপর-তলার একটি ঘরে নীরবতার মধ্যে ঘুমিয়ে পড়ে আছেন ।

এত রোদ ! এখন যে ঠিক বেড়াতে যাবার সময়ও নয় কিন্তু যুধিকা ঘোষের প্রাণটা যেন উদাসীনের জীবনের এতদিনের নিয়মের শাসন ভঙ্গ করবার কোঁতুকে ছঃসাহসী হয়ে উঠেছে । বীরু আর নীরুকে হেসে হেসে আশ্বাস দেয় যুধিকা—না না ; বাবা কিছু বলবে না বীরু । মাও বলবে না নীরু । দেখো, আমার কথা সত্যি হয় কিনা ।

আরও কিছুদূর এগিয়ে যাবার পর, যুধিকা ঘোষের প্রাণের এই ছুরস্ত অবাধ্যতার আনন্দ যেন মুখর হয়ে হেসে ওঠে । বীরু আর নীরুর মুখের দিকে তাকিয়ে হেসে হেসে বলে—যদি একটু বকুনি খেতে হয় তো খাব ।

যুধিকার সাজটাও বেড়াতে যাবার মতো সাজ নয় । বীরু বলে—তোমাকে বড়ো অভদ্র দেখাচ্ছে দিদি ।

—কেন ? চমকে ওঠে যুধিকা ।

নীরু বলে—বিচ্ছিন্নি ড্রেস করেছো, একেবারে গরীব লোকের মতো ।

ঠিক কথাই বলেছে বীরু আর নীরু । যুধিকা ঘোষের পায়ে এক-

জোড়া চটি, আর গায়ে এলোমেলো করে পরা একটি রঙিন ছাপাশাড়ি ও ছিটের ব্লাউজ। খোঁপা নয়, বিলুনিও নয়, সাবান-ঘষা মাথার চুল এতক্ষণে শুকিয়ে আর রুক্ষ হয়ে ফেঁপে উঠেছে। স্নানের পর ঘাড়ে আর গলায় যে সামান্য একটু পাউডার ছড়ানো হয়েছিল, সে পাউডারের কোনো চিহ্নও এখন আর নেই। স্নানের সময় গলার হার আর কানের ছলও খুলে রাখা হয়েছিল। সেগুলিও আর পরা হয়নি। আয়নার দেওয়ালের মধ্যেই সেগুলি পড়ে আছে।

চেহারাটা অভদ্রের মতো দেখাচ্ছে, গরীবের মতো দেখাচ্ছে, কিন্তু খারাপ দেখাচ্ছে কি? প্রশ্নটা হয়তো মুখ খুলে বলেই ফেলতো যুদ্ধিকা ঘোষ, আর বীরু ও নীরুর চোখের বিশ্ময়ের দিকে তাকিয়ে বুঝে ফেলতে পারতো যুদ্ধিকা, একটুও খারাপ দেখাচ্ছে না নিশ্চয়।

কিন্তু প্রশ্ন করতে হয় না; কারণ বীরুই হঠাৎ যুদ্ধিকার মুখের দিকে তাকিয়ে আশ্চর্য হয়ে একটা ছেলেমানুষী আনন্দের কথা বলে ফেলে—তোমার গায়ে অনেক রক্ত আছে দিদি।

—কি করে জানলে?

—তোমার মুখটা কি চমৎকার লাল হয়ে উঠেছে?

হাসতে গিয়ে আরও লাল হয়ে ওঠে যুদ্ধিকার মুখ। তবে আর সন্দেহ নেই; উদাসীনের মেয়ের মুখ পথের রোদের ছোঁয়ায় একটুও অসুন্দর হয়ে যায়নি; একটুও খারাপ দেখাচ্ছে না যুদ্ধিকাকে। বরং বীরুর চোখের এই বিশ্ময় লক্ষ্য করবার পর বিশ্বাস করতে হয়, যুদ্ধিকার এই সাজহীন মূর্তিটা নতুন রকমের একটা প্রাণের আভায় রঙীন হয়ে আরও সুন্দর হয়ে উঠেছে।

যুদ্ধিকা জানে না, বীরু আর নীরুও জানতে পারে না, কিসের জ্ঞান আর কি দেখবার জ্ঞান পথের এত ভিড় পার হয়ে, এত সোরগোল শুনতে শুনতে এগিয়ে যেতে হচ্ছে। কোনো কাজ নেই, দরকার নেই কোথাও থামবার আর জিরোবার কথা নেই, শুধু শহরের ভিতর এদিকে-ওদিকে একটু ঘুরে বেড়ানো, এই মাত্র।

ঘুরে বেড়াতে একটুও খারাপ লাগে না। লোহার পুলটা পার

হবার সময় ট্রেনছাড়া একটা একলা ইঞ্জিন ভয়ানক চিৎকার করে আর ঘন কালো ধোঁয়ার স্তবক ধমকে ধমকে উড়িয়ে দিয়ে ছুটে চলে গেল। চুপ করে দাঁড়িয়ে দেখতে থাকে উদাসীনের দিদি আর ছই ভাই। ইঞ্জিনের ধোঁয়ার কুণ্ডলী থেকে মোটা মোটা কয়লার গুঁড়ো যুধিকার রুক্ষ চুলের উপর ঝড়ে পড়ে।

ছুটন্ত ইঞ্জিনের দিকে তাকিয়ে হাততালি দিয়ে হেসে ওঠে বীরু আর নীরু। তারপর যুধিকার চুলের উপর কয়লার গুঁড়োর ছড়াছড়ি দেখে আরও জোরে হাততালি দেয়।

যুধিকা বলে—দুষ্টমি করো না ; ছিঃ—আচ্ছা, এইবার চলো, একবার চকের কাছে গিয়ে...তারপর একবার স্টেশনের দিকটা ঘুরে এসে, তারপর...

বিচিত্র এক উদ্ভাস্তির অভিবান ! এগিয়ে যেতে থাকে যুধিকা, বীরু আর নীরু। চকের দোকানগুলিতে যেমন ভিড় তেমনই হৈ-হৈ। কত মানুষ আসছে আর যাচ্ছে, কত ব্যস্ততা। কত কথা বলছে, হাঁকা-হাঁকি ডাকাডাকি করছে, আবার ঝগড়াও করছে মানুষগুলি। গাড়িতে করে এই চক কতবার পার হয়ে গেছে যুধিকা, কিন্তু কোনোদিন ভীড়ের মুখগুলির দিকে তাকাবার কোনো দরকার হয়নি। তাকাতে ইচ্ছেও করেনি।

কিন্তু আজ বারবার তাকাতে ইচ্ছে করে। দরকারের মানুষগুলি আসছে যাচ্ছে আর ভিড় করে ধমকে রয়েছে, দেখতে বেশ লাগে। কিন্তু—কি আশ্চর্য, একটা চেনা মুখ এখন পর্যন্ত দেখতে পাওয়া গেল না। পথের ভিড়গুলি যেন একটা নিরেট অচেনা জগতের কতগুলি হাসাহাসির, মুখরতার আর ব্যস্ততার ভিড়।

মাঝে মাঝে এক-একবার চমকেও ওঠে যুধিকা ঘোষের খেয়ালের চোখ। ঠিক হিমাদ্রির মতো নীলরঙের কামিজ গায়ে, এক ভদ্রলোক ব্যস্তভাবে একটা কলের দোকানের ভিড়ের সঙ্গে মিশে রয়েছেন। আশ্চর্য, হিমাদ্রি নয় তো ? কিন্তু আশ্চর্য হবার কি আছে ? চকের এই সব

দোকানে এসে যদি এত মানুষের ভিড় করবার দরকার থাকে, তবে হিমাদ্রিই বা আসবে না কেন ?

না হিমাদ্রি নয়। নীলরঙের কামিজ বটে, কিন্তু আস্তিন ছোটো গোটানো নয়। আর পায়ে এক জোড়া নাগরা, সাদা রবারের জুতো নয়।

স্টেশনের কাছে এদিক ওদিক ঘুরে ঘুরে আর পথের ভিড়ের অনেক মানুষের মুখের দিকে তাকিয়ে তাকিয়ে যেন ক্লান্ত হয়ে যায় যুধিকা ঘোষের এই বিচিত্র উদ্ভ্রান্তির অভিযান। নীলরঙের কামিজ, আস্তিন ছোটো গোটানো, আর পায়ে সাদা রবারের জুতো, এমন কোনো মূর্তি শহরের এত ভিড়ের মধ্যেও দেখা গেল না !

বীরু বলে—এবার কোন্ দিকে যাবে দিদি ?

যুধিকা বলে—আর কোনো দিকে না।

নীরু—কেন দিদি ?

যুধিকা—সন্ধ্যা হয়ে এসেছে।

বীরু—তাতে কি হয়েছে ?

যুধিকা বিরক্ত হয়ে চোঁচিয়ে ওঠে—কারও মুখ স্পষ্ট করে যে দেখতেই পাওয়া যাচ্ছে না। কাউকে চিনতে পারা যাবে না।

নীরু ভয়ে ভয়ে বলে—তবে এবার বাড়ি ফিরে চলো দিদি।

যুধিকা বলে—হ্যাঁ, চল।

ফটক পার হয়ে উদাসীনের বারান্দার উপর দাঁড়াতেই বুঝতে পারে যুধিকা, হ্যাঁ, বকুনি খেতে হবে। বীরু আর নীরুও বুঝতে পারে বোধ হয়, তা না হলে ওরা হুঁজনে শুভাবে যুধিকার এলোমেলো চেহারাটার আড়ালে মুখ লুকিয়ে দাঁড়িয়ে থাকবার চেষ্টা করে কেন ?

অনেকক্ষণ হলো আদালত থেকে ফিরেছেন চারু ঘোষ। অনেকক্ষণ হলো বিশ্রামের ঘুম থেকে জেগে উঠেছেন চারু ঘোষের স্ত্রী কুমুম ঘোষ। অনেক ডাকাডাকি করেও উদাসীনের ছেলে মেয়ের কোনো সাড়া না পেয়ে অনেক আতঙ্ক অনেকক্ষণ ধরে সহ্য করেছেন। তারপর মালীর কথা শুনে কিছুটা আশ্বস্ত হয়েছেন। কিন্তু মনের রাগটাকে শাস্ত করতে

পারেননি। বলা নেই, কণ্ঠ নেই, অনুমতি না নিয়ে, একটা জানান না দিয়ে বাচ্চা ভাই ছুটোকেও সঙ্গে নিয়ে পায়ে হেঁটে কোথায় গেল বাইশ বছর বয়সের কাণ্ডজ্ঞানহীন শিল্পি? গণেশবাবুর স্ত্রীর মতো নিন্দুকের চোখে পড়লে আর রক্ষা নেই। এক বেলার মধ্যেই বোধহয় সারা গিরিডির সব পাড়া ঘুরে ছুঁরাম রটিয়ে দেবে, কিপ্টে চারু ঘোষ শুধু নিজে একাই গাড়ি চড়ে; ছেলেমেয়েগুলো পায়ে হেঁটে ফ্যা-ফ্যা করে ঘুরে বেড়ায়।

কি আশ্চর্য, ভেবে কোনো কারণই ঠাহর করতে পারেন না চারু ঘোষ আর কুমুম ঘোষ; উদাসীনের স্ত্রী জীবনের শিক্ষা-দীক্ষা পেয়েও আর এত বড়ো হয়ে ঠেঁবার পরেও যুথিকার মতো মেয়ের মনে আবার একোন্ রকমের অপকৃতির অনাচার? গাড়ি ছাড়া কোনোদিন বেড়াতে বের হয়েছে যুথিকা, এমন ঘটনা স্মরণ করতে পারেন না কুমুম ঘোষ, কারণ এমন ঘটনা কোনোদিনই ঘটেনি। তবে আজ হঠাৎ এমন অধঃপতনের ধুলো পায়ে গায়ে আর মাথায় মাথবার জন্ত এ কেমন নোংরা শখের খেলা খেলে এল মেয়েটা? কেন, বিসের জন্ত, কোথায় কোথায় গিয়েছিল যুথিকা? কার সঙ্গে কথা বলে এলো?

সন্দেহ করেন কুমুম ঘোষ, নিশ্চয় একটা কাণ্ড করে এসেছে যুথিকা। তা না হলে, না বলে-কয়ে একটা চুপি-চুপি চেষ্টার মতো বাইরে বের হয়ে গেল কেন? বিস্তী কাণ্ড করতে হলে যে ঠিক এই ধরনের চুপি-চুপি চেষ্টা করতে হয়। কুমুম ঘোষের জেঠতুতো দাদা, আই-সি-এস মোহনদার বউ বর্ণালীর কথা মনে পড়ে। চাল-চলনে প্রায় মেমসাহেব হয়ে গিয়েছে যে বর্ণালী বউদি; একশো টাকা মাইনের মগ কুকের হাতের রান্না যত রোস্ট প্রিল আর ফ্রাই ছাড়া যার মুখে কোনো বাংলা রান্না রোচে না; সেই বর্ণালী বউদি লুকিয়ে লুকিয়ে চাপরাশিকে দিয়ে বাজারের তেলভাজা বেগুনি আনিয়ে আর ঘরের দরজা বন্ধ করে লুকিয়ে লুকিয়ে খেত।

যুথিকার কাণ্ডটা প্রায় এই রকমের একটা চুপি-চুপি সেরে আসা

নোংরা শখের কাণ্ড। যুধিকার মুখের দিকে তাকিয়ে ধমক দেন কুসুম ঘোষ—ছিঃ !

যুধিকা হাসে—কি হলো মা ?

—হঠাৎ এরকম একটা কাণ্ড করবার মানে কি ?

যুধিকা—শহরের ভেতরে একটু এদিক ওদিক বেড়িয়ে এলাম।

—কেন ? কারণ কি ?

যুধিকা হাসে—এমনি ; কোনো কারণ নেই।

—তার মানে পাগলামিতে পেয়েছিল ?

চারুবাবু বলেন—যাক্ গে ; আর কথা বাড়িয়ে লাভ নেই। কুসুম ঘোষ চুপ করেন ; এবং চারুবাবু আরও গস্তীর হয়ে বলেন—মোট কথা, তোমার কাণ্ড দেখে আমি বড়ো ছঃখিত হয়েছি যুধিকা। আমাদের প্রেষ্টিজের দিকে চোখ রেখে কাজ করবে। উদাসীনের মেয়ে উদাসীনের কালচার ভুলে যাবে কেন ?

উদাসীনের কালচারের উপর আবার একটা উপদ্রব। এই উপদ্রবও উদাসীনের মেয়ে যুধিকা ঘোষের একটা খেয়ালের কাণ্ড। এবং এই খেয়ালটাও একটা নোংরা শখের খেয়াল। খুব ছঃখিত হলেন চারু ঘোষ, এবং খুব রাগ করলেন কুসুম ঘোষ।

দিনটা ছিল যুধিকা ঘোষেরই জন্মদিনের উৎসবের দিন।

সেদিন আদালতে যাননি চারু ঘোষ। সেদিন স্কুলে যায়নি বীরু আর নীরু। সেদিন শহরে গিয়ে শর্মা ব্রাদার্সের ভ্যারাইটি স্টোর থেকে যুধিকার জন্ম ছ'শো টাকা দিয়ে একগাদা করাসী পারফিউমারির সৌরভ সামগ্রী আর প্রসাধনের উপচার কিনে এনেছেন চারু ঘোষ। দশ শিশি সেন্ট, পাস্তুরাইজড ফেস ক্রীম, অল-টোন শ্যাম্পু, স্কিন টনিক লোশন, ওয়াটারপ্রুফ মাসকারা আর বিউটি গ্লেন।

সকাল আটটা থেকে শুরু করে বেলা বারটা পর্যন্ত অনেক স্নেহময় আগ্রহ উৎসাহ আর যত্ন নিয়ে কুসুম ঘোষ রান্না করেছেন মিষ্টি পোলাও, রুই মাছের ক্রোকে, মাংসের দম্পক্ত, নারকেল-চিংড়ি আর ছানার পায়েরস।

তখনো টেবিলে খাবার সাজানো হয়নি ; আর চাকর ঘোষের স্নান সারানো বাকি ছিল । কিন্তু উদাসীনের মেয়ে যুথিকা ঘোষ ওর সেই সুরভিত আর প্রসাধিত সুন্দর চেহারাটাকে নিয়ে ঝলমলে শাড়ির আভা ছড়িয়ে ছলিয়ে আর ছুটিয়ে বারবার যেন একটা পেটুকে লোভের আবেগে রান্নাঘরের দরজার কাছে এসে কুসুম ঘোষকে বিরক্ত করতে থাকে ।—
রান্না শেষ হলো কি মা ?

কুসুম ঘোষ হাসেন—হ্যাঁ রে লোভী মেয়ে । শেষ হয়ে এসেছে,
শুধু জলপাই-এর চাটনিটা বাকি ।

জলপাই-এর চাটনি রাখতে এমন কি আর সময় লাগে ? পনের
মিনিট পার হতে না হতে আবার ছুটে আসে যুথিকা ।—হলো চাটনি ?

কুসুম ঘোষ হাসেন—হ্যাঁ । এবার ওকে স্নান সেরে নিতে বলা ।

যুথিকা—বলছি হ্যাঁ...একটা কথা !

—কি !

যুথিকা—তিনটে খালাতে খাবার সাজিয়ে দাও তো ।

কুসুম ঘোষ আশ্চর্য হন—তিনটে খালাতে ?

যুথিকা—হ্যাঁ ।

—কিসের খাবার ?

যুথিকা—এই যে, এইসব পোলাও টোলাও...সবই কিছু কিছু করে
তিনটে খালাতে সাজিয়ে দাও ।

কুসুম ঘোষের চোখে এইবার একটা ক্রকুটি ফুটে ওঠে—কারণ জ্ঞে ?

যুথিকা—গিরধারীর জ্ঞে, জানকীরামের জ্ঞে আর সোমরার
জ্ঞে ।

—কি বললি ? কুসুম ঘোষ যেন একটা আর্তনাদ করে তাঁর যন্ত্রণাক্ত
বিস্ময়টাকে সামলাতে চেষ্টা করেন ।

ড্রাইভার গিরধারী, চাকর জানকীরাম আর মালী সোমরার জ্ঞে
তিনটে খালাতে এইসব আভিজাতিক খাবার নিজের হাতে সাজিয়ে
দিতে হবে, যুথিকা যেন কুসুম ঘোষের হাত ছুটোকে একটা অভিশাপ
সহ করতে বলছে । বলতে একটুও লজ্জা পেল না যুথিকা ? একটুও
ভেবে দেখলো না, কি অদ্ভুত কথা বলছে ? ভুলে গেল মেয়েটা,

এরকম নোংরা কাণ্ড যে এই উদাসীনের পঁচিশ বছরের জীবনে কোনো-দিন সম্ভব হয়নি। কুমুম ঘোষ বলেন—না; তোমার বাজে খেয়াল বন্ধ করো যুধি।

যুধিকাই এইবার আশ্চর্য হয়—আমার জন্মদিনে আমরা সবাই পোলাও টোলাও খাব, আর ও বেচারারা বাড়িতে থেকেও খাবে না?

—না।

যুধিকা নাক সিঁটকে বিড়বিড় করে—কি বিক্রী ব্যাপার!

—বিক্রী হয়ে গিয়েছে তোমর বুদ্ধিশুদ্ধি।

বাগ্গে। আবার নাক সিঁটকে নিয়ে গস্তীর হয়ে, আর ছটকট করে চলে যায় যুধিকা।

কুমুম ঘোষের সন্দেহ হয় এবং ছ'চোখের ক্ষুদ্র দৃষ্টি তুলে দেখতে থাকেন, কেমন যেন একটা আধপাগলা রকমের মুখ করে ধেই ধেই ক'রে চলে গেল মেয়েটা। মেয়েটার ব্যবহারের রকম-সকম, কথা বলবার ঢং, চোখের চাউনি, হাঁটা-চলা আর বুদ্ধি আর রুচি ইচ্ছে টিচ্ছে সবই যেন কেমনতর বিক্রী হয়ে যাচ্ছে।

মেয়েটার জন্মদিন, তাই খুব বেশি ধমক-ধামক করতে ইচ্ছে করে না। তাই রাগ সামলাতে চেষ্টা করেন কুমুম ঘোষ।

চারু ঘোষও সব কথা শুনতে পেয়ে গস্তীর হয়ে গেলেন। মেয়েটাকে যেন উদাসীনের জীবনের রীতি আর অভ্যাসগুলিকে অপমান করবার শখে পেয়েছে। কিংবা কাণ্ডজ্ঞানই হারিয়েছে। তা না হলে বুঝতে পারে না কেন, এরকমের কাণ্ড করলে উদাসীনের প্রেষ্টিজ নষ্ট করা হয়।

বাই হোক, খাবার টেবিলের আনন্দটা আর নষ্ট করেনি যুধিকা। কোনো বিক্রী উপদ্রব করেনি। বরং, শেষ পর্যন্ত দেখতে পেয়ে খুশি হলেন, আর একটু নিশ্চিত হলেন চারু ঘোষ এবং কুমুম ঘোষ, বীরু আর নীরুর লোভের সঙ্গে সমানে তাল দিয়ে সব খাবারের সব স্বাদুতা একেবারে চেটেপুটে খেল যুধিকা; প্রত্যেকবার জন্মদিনের উৎসবের দিনে একটু বেশি উৎফুল্ল হয়ে বীরু নীরুর সঙ্গে যে সব গান গায় আর গল্প করে যুধিকা, এবারও তার ব্যতিক্রম হলো না।

উদাসীনের পিতা আর মাতার মুখের অপ্রসন্ন ভাবটাও শেষ পর্যন্ত হাসিচাপা পড়ে। মনে মনে বোধহয় একটু আশ্বস্ত হন এবং একটু হাঁপও ছাড়েন চারু ঘোষ আর কুমুম ঘোষ; না যুধিকার মনের এই ছন্নছাড়া খেয়াল বোধহয় একটা বুদ্ধিহীন আমোদের খেলা মাত্র; কিটের ব্যারামের মতো কোনো ব্যারাম নয়। গিরধারীকে, জানকীরামকে, আর সোমরাকে—একটা ডাইভার, একটা চাকর আর একটা মালীকে হঠাৎ সমাদর করে পোলাও-টোলাও খাওয়াতে গেলে ওয়াই যে ভয় পেয়ে চমকে উঠবে; যুধিকা বোধহয় ওদের ঐ ভয়ের চমক দেখে একটু মজা পেতে চায়। তাই কি?

কুমুম ঘোষ বলেন—আমার মনে হয়, যুধিকা শুধু একটু মজা করবার জন্তে এরকমের একটা কাণ্ড করতে চেয়েছিল।

চারু ঘোষ—তা যদি হয়, তবে রাগ করবার কিছু নেই। কিন্তু আমার কেমন একটা সন্দেহ হয় যে ..

—কি? কুমুম ঘোষ আতঙ্কিতের মতো তাকিয়ে প্রশ্ন করেন।

চারুবাবু বলেন—আমার সন্দেহ হয়, যুধিকা বোধহয় আজকাল বাজে বই-টাই পড়ছে।

কুমুম—হাঁ, গাদা গাদা নভেল পড়ে দেখেছি।

চারুবাবু—না-না, নভেল টভেলের কথা বলছি না। ওতে কিছু হয় না; আমার সন্দেহ হয়, যুধিকা আজকাল বিবেকানন্দের বই-টাই পড়ছে না তো?

কুমুম অবিশ্বাস করেন—বিবেকানন্দের বই যুধিকা পড়বে কোন্‌ ছুঃখে?

চারুবাবু—ছুঃখে নয়; খেয়ালে। বাতিকে। সেই জন্তেই তো বলছি। এ বিষয়ে আমার যথেষ্ট অভিজ্ঞতা আছে।

কুমুম আশ্চর্য হন—তুমি কবে বিবেকানন্দের বই পড়লে?

চারুবাবু—আমি না; আমি দেখেছি কয়েকজনকে, বিবেকানন্দের বই পড়তে পড়তে শেষে জীবনের সব প্রসপেক্টের কি ভয়ানক সর্বনাশ করে কি হয়ে গেলেন নন্দকাকা।

কুমুম—নন্দকাকা কে ?

চারুবাবু—আমারই বন্ধু—এক কলেজের বন্ধু কটিকের আপন কাকা।
ভদ্রলোক কেমব্রিজের এম-এ ; দেশে ফিরে এসেই আটশো টাকা
মাইনের একটা সরকারী সার্ভিস পেলেন ; ভেবে দেখ, সে সময়ের
আটশো টাকা ; তার মানে, আজকের প্রাইস ইনডেক্স অনুসারে বত্রিশ
শো টাকা। ভদ্রলোক সে সার্ভিস নিলেন না ; একটা অজ পাড়াগাঁয়ে
গিয়ে নিজেই একটা স্কুল করলেন। আমি নিজের চোখে দেখেছি, স্কুল
বাড়ির কাছে কাউ-শেডের মতো একটা ঘরের ভেতরে বসে নিজের হাতে
রান্না করছেন নন্দকাকা, ভাত, ডাল আর টেঁড়মের চচ্চড়ি ; বাস্। কী
সাংঘাতিক অবস্থা !

কুমুম—ইচ্ছে করে কেন এরকম অবস্থা করলেন নন্দকাকা ?

চারুবাবু—বললাম তো, বিবেকানন্দের বই পড়বার অভ্যাসে
পেয়েছিল। গরীব হয়ে যাবার বাতিকে ধরেছিল।

চারুবাবুর সন্দেহটাকে সন্দেহ করবার মতো মনের জোর আর পান
না কুমুম ; এবং একটু ভয়ও পান বোধহয়। এবং একদিন হঠাৎ
বৃথিকার পড়ার ঘরে ঢুকে ভয়ের কথাটা একটু কৌশল করে বলেই
ফেললেন কুমুম।—ভাল বই-টাই পড়বি ; বিবেকানন্দের বই-টাই পড়ে
কোনো লাভ নেই।

বৃথিকা হাঁ করে আর চোখ বড়ো করে তাকিয়ে থাকে—বিবেকানন্দ
কে ?

কুমুম—বিবেকানন্দ, আবার কে।

বৃথিকা—আমি জানি না ; কোনোদিন এরকম একটা নামও
শুনিনি।

কুমুমের চোখের দৃষ্টিটাই যেন হঠাৎ খুশি হয়ে হেসে ওঠে। তাঁর
কৌশলের প্রশ্নটাই সার্থক হয়েছে। বৃথা সন্দেহ, অযথা হুশিঙ্গা।

এবং চারুবাবুর কাছে গিয়ে হেসে ফেলেন কুমুম।—মেয়েটার
সামান্য ছটো-একটা খেলালের কাণ্ড দেখে মিছিমিছি বড়ো বেশি ভাবনা
করা হচ্ছে, ছিঃ।

চারুবাবুও একটু লজ্জিত হয়ে হানতে থাকেন।

উদাসীনের বারান্দায় চেয়ারগুলির উপর রোজই সকাল বেলায় যে-সব মানুষকে বসে থাকতে দেখা যায় তারা সবাই মক্কেল। মাঝে মাঝে সন্ধ্যাবেলাতেও ছুঁচারজনের সমাগম দেখা যায়।

কিন্তু আজ সন্ধ্যায় উদাসীনের ফটক পার হয়ে, ছুঁচোখে কেমন একটা উৎসাহের দৃষ্টি নিয়ে, আর আস্তে আস্তে হেঁটে এসে উদাসীনের বারান্দার উপর দাঁড়ালো যে মানুষটা, তাকে দেখলেই বোঝা যায়, মক্কেল নয়। তবে কে? কিসের জঞ্জাই বা এসেছে?

চারুবাবু বাড়িতে নেই। কুমুম ঘোষও নেই। উদাসীনের বাপ-মা ছুঁজনেই বেড়াতে বের হয়েছেন। বীরু-নীরুও সঙ্গে গিয়েছে। বাড়িতে আছে শুধু যুধিকা। যুধিকাকে আজ সকাল থেকে বিকালের মধ্যে অনেকবার হাঁচতে আর কাশতে দেখা গিয়েছে; একটু টেম্পারেচারও হয়েছে। কুমুম বলেছেন, সাবধান যুধি! তুমি আজ জানলার কাছেও দাঁড়াবে না, বেড়াতে যাওয়া তো দূরের কথা।

উপর তলার সেই ঘর, যেটা যুধিকা ঘোষের পড়ার ঘর; তারই ভিতরে একটা চেয়ারের উপর বসে উলের মাফলার গলায় জড়াতে জড়াতে হঠাৎ চোখে পড়ে যুধিকার, ফটক পার হয়ে ভিতরে ঢুকলে একটা মানুষ, যে মানুষকে মক্কেল বলে মনে হয় না। হিমাজি গোছের একটা মানুষ বলে মনে হয়। বয়সের দিক দিয়েও প্রায় হিমাজিরই মতো। গায়ের জামা-কাপড়ের চেহারাও প্রায় সেই রকমের। খয়েরী রঙের একটা আধা-আস্তিন পাঞ্জাবি, কেজো মানুষের মতো মালকৌচা দিয়ে পরা ধুতি; ধুতিটা অবশ্য ময়লা নয়। হিমাজিরও ময়লা ধুতি পরা অভ্যাস নয়। সাদা রবারের জুতো না হলেও আগস্তকের পায়ে সাদাটে এক জোড়া চামড়ার চটি দেখা যায়। কি আশ্চর্য ভদ্রলোককে দেখলে হিমাজিরই কথা মনে পড়ে যায়।

উদাসীনের যে মেয়েকে জানালার কাছে দাঁড়িয়ে গায়ে ঠাণ্ডা লাগাতে নিষেধ করে গিয়েছেন উদাসীনের মা, সেই মেয়ে হঠাৎ ব্যস্ত

হয়ে ওঠে ; জানালার কাছে গিয়ে একবার দাঁড়ায় । তার পরেই উপরতলা থেকে তরতর করে নেমে এসে একেবারে বারান্দায় এসে দাঁড়ায়, যেখানে সারি সারি টবে ফুলগাছগুলিকে ছুলিয়ে দিয়ে ফুর্ফুর করছে অফুরান ঠাণ্ডা হাওয়া ।

—কাকে চান ?

যুধিকার প্রশ্ন শুনে চেয়ার ছেড়ে উঠে দাঁড়ায় আগন্তুক যুবক । এবং উত্তর দেয়—আমি চারুবাবুর সঙ্গে দেখা করতে এসেছি ।

—বাবা এখন বাড়িতে নেই ।

—তাহলে আচ্ছা...তাহলে আর একদিন আসবো ।

চলে যাবার জন্তু তৈরি হয় যুবক ভদ্রলোক ।

দেখতে পায় যুধিকা, ভদ্রলোকের হাতে ছোটো একটা খাতা আর রসিদ-বইয়ের মতো দেখতে একটা বই ।

—আপনি নিশ্চয় কোনোও দরকারী কাজে এসেছিলেন । প্রশ্ন করে যুধিকা ।

—আজ্ঞে হ্যাঁ ।

—তাহলে কিছুক্ষণ অপেক্ষা করুন না কেন ? বাবা বড়ো জোর আর আধ ঘণ্টার মধ্যে এসে পড়বেন ।

যুবক ভদ্রলোক বেশ খুশি হয়ে এবং যেন একটু কৃতার্থ ভাবে বলে— আজ্ঞে হ্যাঁ, আধ ঘণ্টা অপেক্ষা করতে আমার কোনো অসুবিধা নেই ।

—তাহলে বসুন ।

যুবক ভদ্রলোক আবার চেয়ারে বসে ; কিন্তু যুধিকা ঘোষ চলে যায় না । বরং অদ্ভুত এক কৌতূহলের আবেগে বাচাল হয়ে ওঠে ।

—কিছু মনে করবেন না, যদি একটা প্রশ্ন করি ।

—বলুন ।

—বাবার কাছে আপনার কিসের কাজ ?

—টাঁদা চাইতে এসেছি ।

—কিসের টাঁদা ?

—রিলিফের কাজের জন্তু ।

যুধিকা বোকার মতো তাকায়।—তার মানে ?

যুবক ভদ্রলোক বলে—বাংলা দেশে একটা বজা হয়ে গিয়েছে। প্রায় ছ' লাখ মানুষের ঘর ভেসে গিয়েছে। ক্ষেতের সব ধান পচে গিয়েছে। খবরের কাগজে দেখেছেন বোধহয়...।

যুধিকা—খবরের কাগজ আমি পড়ি না।

—যাই হোক, দেশের সব বড়ো-বড়ো নেতাই সাহায্যের জন্তু আবেদন করেছেন। একটা রিলিফ কমিটিও হয়েছে।

—ঠিক বুঝলাম না।

বজার জন্তু যে-সব লোক কষ্টে পড়েছে তাদের সাহায্য করার জন্তু রিলিফ কমিটিকে অনেকেই টাকা পাঠাচ্ছেন। আমরাও ঠিক করেছি, টাকা করে আমাদের গিরিডি থেকে অন্তত শ' পাঁচেক টাকা রিলিফ কমিটিকে পাঠাবো।

—আপনারা কারা ?

—আমরা এখানেই চাকরি-বাকরি করি।

—তাই বলুন। হাঁপ ছাড়ে যুধিকা ঘোষ। এতক্ষণ ধরে ভদ্রলোকের কথাগুলিকে একটা রহস্যের মতো মনে হচ্ছিল, এবং কিছুই বুঝতে পারা যাচ্ছিল না।

বারকয়েক এদিকে-ওদিকে পায়চারি করে আর গলার শিথিল মাকলারটাকে ভালো করে জড়িয়ে, আবার আচমকা প্রশ্ন করে ওঠে যুধিকা—কত টাকা পেলে আপনি খুশি হবেন ?

যুবক ভদ্রলোক হেসে ফেলে—আপনারা খুশি হয়ে যা দেবেন, তাতেই খুশি হব।

যুধিকা—দশ টাকা ?

—হ্যাঁ।

—বেশ ; তাহলে...

যুধিকার কথা শেষ না হতেই উদাসীনের ফটকের কাছে মোটর গাড়ির হেডলাইটের আলো দেখা যায়। বেড়িয়ে ফিরছেন চাকু ঘোষ আর কুমুম ঘোষ এবং বীরু ও নীরু।

বীৰু-নীৰু দৌড়তে দৌড়তে ছুটে এসেই বাড়ির ভিতর চলে যায়।
এবং চারু ঘোষ ও কুমুম ঘোষ আস্তে আস্তে হেঁটে বারান্দার উপরে
উঠেই চমকে ওঠেন।

যুবক ভদ্রলোকও ব্যস্তভাবে চেয়ার থেকে উঠে দাঁড়ায়।—
আপনারই কাছে এসেছি।

—হেতু? চারু ঘোষের গলার স্বর একটা গম্ভীর বিরক্তির শব্দের
মতো বেজে ওঠে।

—আপনি নিশ্চয়ই জানেন বাংলা দেশে যে বণ্ডা হয়েছে...

—জানি, কিন্তু সে কথা জানাবার জন্ত তোমার এখানে আসবার কি
দরকার বুঝতে পারছি না।

—রিলিফ কমিটিতে কিছু টাকা পাঠাতে হবে। সেইজন্য আপনার
কাছে কিছু চাঁদা চাই।

—নো চাঁদা। দেয়ার ইউ স্টপ।

—আজ্ঞে?

—আমি চাঁদা দেব না।

—যে আজ্ঞে। আমি চলে যাচ্ছি।

যুবক ভদ্রলোক তখনই চলে যেত নিশ্চয়; কিন্তু যুধিকা হঠাৎ বলে
ওঠে,—আমি যে ভদ্রলোককে কথা দিয়ে ফেলেছি বাবা।

যুধিকার মুখের দিকে তাকাতে গিয়ে চারু ঘোষের চোখ দুটো বেন
চমকে ওঠে।—কি কথা?

যুধিকা—দশ টাকা চাঁদা প্রমিস করেছি। সেই জন্য উনি অনেকক্ষণ
ধরে এখানে বসে আছেন।

—কতক্ষণ ধরে?

—আধ ঘণ্টা হবে?

চুপ করে কিছুক্ষণ ধরে আনমনার মতো কি যেন ভাবেন চারু
ঘোষ। তারপর কুমুম ঘোষের হতভম্ব মুখটার দিকে তাকান। ছোট্টো
একটা জুকুটির ছায়াও চারু ঘোষের চোখের উপর সিরসির করে কাঁপে।

তারপরেই পকেট থেকে একটা দশ টাকার নোট বের করে যুবক
ভদ্রলোকের হাতের দিকে এগিয়ে দেন চারু ঘোষ ।

তাড়াতাড়ি পেন্সিল চালিয়ে খস খস করে একটা রসিদ লিখে চারু
ঘোষের হাতের উপর ফেলে দিয়ে আর দশ টাকার নোটটা হাতে নিয়ে
চলে যায় যুবক ভদ্রলোক । দেখলে মনে হয়, হ্যাঁ, লোকটা এই
উদাসীনকে প্রকাণ্ড অপমান করবার আনন্দে তৃপ্ত হয়ে ছুটতে ছুটতে
পালিয়ে যাচ্ছে ।

কুমুম বলেন—এ কী কাণ্ড যুধি ? আবার এরকমের একটা নোংরা
কাণ্ড কেন করলে তুমি ?

যুধিকা হাসে—রাগ করছো কেন ?

কুমুম চোঁচিয়ে ওঠেন—তোমাকে চড় মারা উচিত ছিল । কোথাকার
কে না কে, যেমন চেহারা তেমনি আক্কেল, তাকে ইচ্ছে করে তুমি এই
বাড়ির চেয়ারে আধ ঘণ্টা ধরে বসিয়ে রেখেছো ।

চারু ঘোষের গম্ভীর স্বর আরও তৃপ্ত হয়ে ওঠে—আমার প্রশ্ন,
তুমি লোকটার সঙ্গে কথা বললে কেন ?

কুমুম—তোমার জ্ঞে যে ওকে আজ একটা বাজে লোকের কাছে
অপমানিত হতে হলো, এটুকু বুঝতে পারলে কি মুখ্য মেয়ে ?

যুধিকা ক্যালক্যাল করে তাকায়—অপমানিত ?

কুমুম—হ্যাঁ । তুমি লোকটাকে চাঁদা প্রমিস করে বসে আছ
বলেই না উনি বাধ্য হয়ে...ছি, ছি, লোকটা এখন বোধহয় মুখ টিপে
হাসছে ।

চারু ঘোষ—আমাকে জীবনে কোনাদিন আমার ইচ্ছার বিরুদ্ধে
এরকম বাজে কাজ করতে হয়নি । দশ টাকা গেল, টাকা কোনো
কথা নয় । কথা হলো, আমার প্রিন্সিপ্ল্ নষ্ট করতে হলো ।
চারিটি করে পৃথিবীতে ভিত্তিরীর সংখ্যা বৃদ্ধি করা আমার নীতি
নয় ।

কুমুম—সে যাই হোক, কিন্তু তোমার মেয়ের মনের চাল

চলন ভিখিরী-ভিখিরী হয়ে যাবে কেন? বাজে লোকের সঙ্গে আধ
ঘণ্টা ধরে কথা বলতে ওর প্রেপ্তিজে বাধে না কেন?

চাকরবাবু এইবার একটু শান্তস্বরে উপদেশ দেন—আশা করি,
অপরিচিত কোনো লোকের সঙ্গে কোনোদিন বেশি কথা বলবে না।
যুধিকা। উদ্ভতা করতে হবে না, অভ্যুদ্ভতাও করতে হবে না। শুধু
একটি কথায় হ্যাঁ বা না বলে বিদায় করে দেবে।

যুধিকার মুখটাকে অনুতপ্তের মুখের মতো একটা করুণ মুখ বলে
মনে হয়। বোধহয় ভুল বুঝতে পেরেছে যুধিকা, আর উদাসীনের
বাপ-মাকে এভাবে বিরত ও বিরক্ত করে মনে মনে একটু লজ্জিতও
হয়েছে। যুধিকা বলে—আচ্ছা! উদাসীনের বাপ-মার উপদেশ
স্বীকার করে নিলে কাশতে থাকে যুধিকা।

কুসুমের চোখের দৃষ্টি এইবার একটু মায়াময় হয়ে ওঠে। —ছিঃ,
দেখ তো, ঠাণ্ডা লাগিয়ে কাশিটাকে আবার বাড়িয়ে তুললি।
...বা বলি, তোর ভালোর জন্মেই বলি।

এই ঘটনারই মাত্র পাঁচটা দিন পরের একটা ঘটনা। সেদিন
যুধিকা ঘোষের গলাতে কাশির থকথক শব্দের উপভব ছিল না।

ঠিক আজকেরই মতো সেদিনও উদাসীনের বাপ-মা আর বীরু-
নীরু বাড়িতে ছিল না। কিন্তু বেলাটা সন্ধ্যা নয়, সকাল। বই হাতে
নিয়ে কিজিক্সের ফরমুলা মুখস্থ করতে করতে যখন নিচের তলাতেই
বাড়ির বাইরের বারান্দায় পায়চারি করছিল যুধিকা ঘোষ, তখন একজন
অপরিচিত ব্যক্তি উদাসীনের ফটক পার হয়ে বারান্দার দিকে এগিয়ে
আসতে থাকেন।

আরও দেখতে পেরেছে যুধিকা, উদ্ভলোক মোটর গাড়িতে
এসেছেন। কটকের সামনে রাস্তার উপরেই গাড়িটা দাঁড়িয়ে আছে।

মোটর গাড়ির সম্পর্কে যুধিকা ঘোষের মনেও বেশ একটা শখের
কৌতুহল আর গবেষণা আছে। এ ব্যাপারে বীরু-নীরুর উৎসাহও
যুধিকার উৎসাহের কাছে হার মেনে যায়। বীরু আর নীরু এক
নিশ্বাসে যতগুলি গাড়ির নাম বলতে পারে, যুধিকা তার তিনগুণ

বলে দেয়। ম্যাগাজিনের পাতা উন্টয়ে নতুন ডিজাইনের গয়নার বিজ্ঞাপনী ছবির তুলনায় নতুন মডেলের গাড়ির বিজ্ঞাপনীর ছবি দেখতে বেশি ভালবাসে যুধিকা। বীরু আর নীরুও মাঝে মাঝে দিদির জ্ঞানের পরিচয় পেয়ে আশ্চর্য হয়ে যায়। কলিয়ারির সাহেব মক্কেলদের গাড়ি এসে যখন ফটকের কাছে ধামে, তখন উপরতলার ঘরের জানালার কাছে দাঁড়িয়ে, আগন্তুক গাড়ির দিকে মাত্র একবার তাকিয়ে বলে দিতে পারে যুধিকা—ওটা নিশ্চয়ই নাইনটিন ফিক্টি মডেলের বৃইক !

বীরু নীরু ছুটে যায় এবং ফটকের কাছে গিয়ে গাড়িটাকে দেখে নিয়ে আর ফিরে এসেই আশ্চর্য হয়ে বলে—হ্যাঁ, তুমি ঠিক ধরেছ দিদি !

আগন্তুক ভদ্রলোকের গাড়িটা দেখে যুধিকার চোখে একটা নতুন রহস্যের মতো বোধ হয়। একেবারে অপরিচিত ; কবেকার মডেল কে জানে ? চকচকে ঝকঝকে গাড়িটা যে খুব দামী গাড়ি, তোতে কানো সন্দেহ নেই।

ভদ্রলোকও বেশ চকচকে ও ঝকঝকে চেহারার মানুষ। দেখা মাত্র নরেনের কথা মনে পড়ে যায়। ভদ্রলোককে নরেনেরই সমান বয়সের মানুষ বলে মনে হয়। সিক্কের শার্ট আর ট্রাউজার, গলার টাই-ও সিক্কের। ভদ্রলোক যেন নরেনেরই মতো কিংবা, হতে পারে, নরেনের চেয়েও বেশি ঝকঝকে গৌরবের মানুষ।

বারান্দার উপরে উঠেই যুধিকার দিকে তাকিয়ে হাসিমুখে আর প্রীতিপূর্ণ উৎসাহের দৃষ্টি তুলে আগন্তুক ভদ্রলোক প্রশ্ন করেন—
মিস্টার ঘোষ বাড়িতে আছেন ?

যুধিকা—না।

—কখন আসবেন ?

যুধিকা—বলতে পারি না।

—তাহলে—বলতে বলতে একটা চেয়ারের কাছে হাত দেন ভদ্রলোক ; আর নিজেরই হাত ঘড়িটার দিকে তাকান।

—আমি তাহ'লে । —বেশ একটু বিড়ম্বিত স্বরে, আর একটু আশ্চর্য হয়ে আবার কথা বলেন আগন্তুক ভদ্রলোক । আর যুথিকা ঘোষ তার হাতের বই এর পাতা উলটিয়ে ফলমূলা খুঁজতে থাকে ।

—আমি তাহ'লে চলি ।

—হ্যাঁ ।

ভদ্রলোক বারান্দা থেকে নেমে বাবার আগেই সরে গিয়ে পায়-চারি করতে থাকে যুথিকা ।

ফটকের কাছে গাড়ির শব্দ বেজে উঠতেই বুঝতে পারে যুথিকা, চলে গেলেন ভদ্রলোক । কিন্তু ফটকের দিকে চোখ পড়তেই বুঝতে পারে যুথিকা, না, ভদ্রলোকের ঝকঝকে গাড়িটা স্টার্ট নেয়নি । বাড়ির গাড়িটাই এসে দাঁড়িয়েছে । বাড়ি ফিরেছেন বাবা আর মা । আর বীরু-নীরু । এবং আগন্তুক । ভদ্রলোকের সঙ্গে সবারই একে-বারে মুখোমুখি দেখাও হয়ে গিয়েছে ।

শুধু কি দেখা ? যুথিকা ঘোষের চোখ দুটো একটু আশ্চর্য হয়ে, আর বেশ একটু ভয়ে-ভয়ে বোকাম মতো তাকিয়ে দেখতে থাকে, বাবা আর মা যেন আগন্তুক ভদ্রলোকের পথ আটক করেছেন । ভদ্রলোককে এখনি চলে যেতে দিতে রাজি নন বাবা আর মা ; তবে কি, সত্যিই কি ভদ্রলোক বাবা আর মা-র পরিচিত কোনো মানুষ ?

কোনো সন্দেহ নেই । বারান্দাতে দাঁড়িয়েই শুনতে পায় যুথিকা, ভদ্রলোককে মাত্র পাঁচটি মিনিট বসে যেতে আর অন্তত একটি কাপ চা খেয়ে যেতে কি কাতর অনুরোধ করছেন বাবা আর মা !

কিন্তু ভদ্রলোকের এক কথা । —না, এক্সকিউজ মি !

ভদ্রলোকের গলার স্বর যেন একটা ব্যথিত অহংকারের সৌজস্য-পূর্ণ গর্জন ।

কুমুম ঘোষ অনুরোধ করেন—মাত্র পাঁচটা মিনিট বসে যাও কুমুম ।

কুমুম ? নামটা যেন বাবা আর মা-র মুখেই কয়েকবার শুনেছে যুথিকা ঘোষ । অনেকদিন আগে প্রায়ই এই নামটা বাবা আর মা-র মুখে শোনা যেত ; আজকাল আর শোনা যায় না । ঐ ভদ্রলোক

সেই স্তম্ভ ? বাবার এক ব্যারিস্টার বন্ধুর ভাইপো যে স্তম্ভ জার্মানী থেকে ইঞ্জিনিয়ার হয়ে দেশে ফিরেছে আর মধ্যপ্রদেশে একটা মস্ত বড়ো কারখানার জেনারেল ম্যানেজার হয়েছে, যাকে অনেকদিন আগে একবার গিরিডিতে আসবার জন্তু আর উদাসীনে এসে অন্তত সাতটি দিন থেকে যাবার জন্তু নিমন্ত্রণ করেছিলেন বাবা, ঐ ভদ্রলোক কি সেই স্তম্ভ ? তাই তো মনে হয় ।

কিন্তু শেষ পর্যন্ত স্তম্ভের জেদই জয়ী হলো । চারু ঘোষ আর কুমুম ঘোষের কাতর অনুনয়গুলি একেবারে ব্যর্থ হয়ে গেল ।

—আমার পাঁচ মিনিটেরও দাম আছে মিসেস ঘোষ । অকারণে আর অযথাস্থানে একমিনিট সময়ও নষ্ট করতে পারি না । বলতে বলতে নিজের গাড়িতে উঠেই গাড়ি স্টার্ট করে স্তম্ভ । উদাসীনের বারান্দা, উদাসীনের ফটক, আর উদাসীনের বাপ-মা-র ছোটো ছুখ-কাতর মুখের দিকে একটা ক্রম্পেও না করে উধাও হয়ে গেল স্তম্ভ ।

বিমর্ষভাবে আর কিসকিস করে আক্ষেপের স্বরে, বোধহয় স্তম্ভের এই অদ্ভুত রকমের রুঢ় ব্যবহারের কথা আলোচনা করতে করতে বারান্দার উপরে এসে দাঁড়ান চারু ঘোষ আর কুমুম ঘোষ । এবং যুথিকাকে দেখতে পেয়েই যেন একটা ভয়ানক বিশ্বয়ের চমক লেগে সন্দ্বিগ্ন হয়ে ওঠে কুমুমের চোখের চাহনি ।

—স্তম্ভ যে চলে গেল তুই কি দেখতে পাসনি যুথি ?

—পেয়েছি বৈকি ।

—কোথায় ছিল তুই ?

—এখানেই ।

—তবে কি স্তম্ভের সঙ্গে তুই কোনো কথাই বলিসনি ?

—হ্যাঁ বলেছি ; সামান্য ছ'একটা কথা ।

—তার মানে ? স্তম্ভের সঙ্গে সামান্য ছ'একটা কথা কেন ?

চারুবাবু বলেন—স্তম্ভকে একটু বসে চা খেয়ে যাবার জন্তু তুমি অনুরোধ করোনি ?

যুথিকা—না ।

চারুবাবু—কেন?

যুথিকা—কি আশ্চর্য, আমি কি করে জানবো যে উনি সুমন্ত না শ্রীমন্ত? একজন অপরিচিত ভদ্রলোককে গায়ে পড়ে চা খাওয়ার জন্য অনুরোধ করতে গিয়ে শেষে কি...

চারুবাবু—থাক, আর বলতে হবে না। তোমার চমৎকার কাণ্ড-জ্ঞানের আর একটা প্রমাণ পাওয়া গেল।

কুমুম চৈঁচিয়ে ওঠেন—ছি ছি ছি! এরকম অভদ্রতা তোর পক্ষে সম্ভব হলো কেমন করে বল শুনি? সুমন্ত যে নরেনের মাইনের চারপুণ মাইনে পায়। সুমন্তের তুলনায় নরেন তো বলতে গেলে একজন পেটি অফিসার মাত্র।...সুমন্তের সঙ্গে অভদ্রতা করে নিজেদেরই যে ক্ষতি করলি, তা যদি বুঝতে পারতিস তবে...

যুথিকা—তোমার যা খুশি বলতে পার, কিন্তু আমি কোনো অভদ্রতা করিনি, ভদ্রতাও করিনি।

—তোমার কপাল করেছ। ধমক দেন কুমুম।

—আর কথা বাড়িয়ে লাভ নেই। কুমুমের ক্ষোভ শান্ত করতে চেষ্টা করেন চারু ঘোষ।

উদাসীদের বাপ আর মা যখন নীরব হয়ে ঘরের ভিতরে চলে যান, তারও অনেকক্ষণ পরে, অনেকক্ষণ চুপ করে দাঁড়িয়ে থাকবার পর বই-এর পাতা হাতড়ে ফরমুলা খুঁজতে গিয়ে আনমনা হয়ে যায় যুথিকা।

যুথিকার অভদ্রতায় রাগ করে চলে গিয়েছে সুমন্ত; কিন্তু নরেন যদি আজ আড়ালে চারু ঘোষ আর কুমুম ঘোষের এই সব কথা শুনতে পেত, তবে কি হতো? নরেনও কি রাগ করে চলে যেতো না?

বেশ হতো! যুথিকা ঘোষের মনটা যেন হঠাৎ কঠোর হয়ে নীরবে হেসে ওঠে। সব লেঠা চুকে যেত। মামির কাছ থেকে এক একটা উদ্বেগের চিঠি তেড়ে আসতো না; আর যুথিকার পাটনা যাবার সব ব্যস্ততারও ইতি হয়ে যেত। তখন দেখা যেত, যুথিকার কাছে এসে নিজেদের ভুলের কোন্ কৈফিয়ৎ দিতেন চারু ঘোষ আর কুমুম ঘোষ?

সন্ধ্যাবেলা বেড়াতে এলেন গণেশবাবুর স্ত্রী অর্থাৎ লতিকার মা অর্থাৎ রমা মাসিমা। বসতে না বললেও বসে পড়েন, প্রশ্ন না করলেও কথা বলেন, আর গায়ে পড়ে হাজার কথা বলে মানুষকে জ্বালাতে পারেন। যে মহিলা তাঁকে দেখা মাত্র কুমুম ঘোষের মুখ অপ্রমত্ত হয়ে ওঠে। তা ছাড়া ভুলতে পারবেন কি করে কুমুম, ইনিই তো সেই প্রচণ্ড মতলবের আর কৌশলের মহিলা, যিনি নরেনের কাছে লতিকাকে গছাবার জন্ত বছরে পাঁচবার পাটনা দৌড়চ্ছেন। ভাগ্য ভালো, যুধিকার মামী কণিকার মতো শক্ত মানুষ পাটনাতেই থাকে; তাই নরেনকে টেনে নেবার অনেক চেষ্টা করেও আজ পর্যন্ত টেনে নিতে পারেন নি। কাণকা বাধা দেয় বলেই পারেন নি। তা না হলে এত দিনে বোধহয় নরেনের সঙ্গে লতিকার বিয়ে হয়েই যেত।

কিন্তু লতিকার মা এসেই হেসে হেসে সবার সামনে যে গল্পটা বললেন, সেটা একটা দুঃসহ বিশ্বাসের গল্প। শুনে বিশ্বাস করতেই ইচ্ছা হয় না। লতিকার মা যেন উদাসীনের আকাজক্ষার সব গর্ব মিথ্যে করে দিয়ে বিজয়িনীর মতো ভঙ্গী নিয়ে একটা কৃতার্থতার কাহিনী বলছেন। যুধিকা সামনেই বসে রয়েছে; তবু বলতে একটুও কুণ্ঠা বোধ করলেন না লতিকার মা।

লতিকার মা বললেন—আমি আজই পাটনা থেকে এসেছি। খবর নিয়েছি, কণিকা গুর ছেলেপিলে নিয়ে ভালোই আছে। হ্যাঁ বোম্বাই থেকে হঠাৎ একদিনের জন্ত পাটনাতে এসেছিল নরেন। ফোন করে শীতাংশুকে জানিয়ে দিল, আমি এসেছি শীতাংশুদা। জানোই তো, আমার শীতাংশুর অভ্যাস, মানুষকে নেমন্তন্ন করে খাওয়াতে কত ভালো-বাসে শীতাংশু!

কোনো প্রশ্ন করবেন না বলে মনে মনে প্রতিজ্ঞা করে বসেছিলেন যিনি, তিনিই, সেই কুমুম ঘোষই চমকে উঠে প্রশ্ন করে বসলেন।— শীতাংশু শেষ পর্যন্ত গায়ে পড়ে নরেনকে নিমন্ত্রণ করেছিল বোধহয়?

—হ্যাঁ; ছপুরে এলো নরেন; সন্ধ্যা হবার পর চলে গেল। লতিকার গান শুনে কত প্রশংসা করলো নরেন।

কুমুম—গায়ের পড়ে গান শোনাতে কে না প্রশংসা করবে বলুন ?

লতিকার মা—এটা আবার কেমন কথা হলো । গায়ের পড়ে গান শোনাতে কেন লতি ? নরেন নিজেই বারবার বললে, অগত্যা বাধ্য হয়ে...। হ্যাঁ, নরেন তোমাদের কথা জিজ্ঞাসা করেছিল । আমি বলেছি, সবাই ভাল আছে ।

কুমুম—আবার পাটনাতে কবে আসবে নরেন ?

লতিকার মা—তা জানি না । নরেন বললে মাঝে মাঝে হঠাৎ ছ'এক দিনের জন্তু চলে আসতে পারে ।

লতিকার মা চলে যেতেই যুধিকার মুখের দিকে আতঙ্কিতের মতো তাকিয়ে প্রশ্ন করেন কুমুম—এসব কি শুনলাম ?

যুধিকা হাসে—যা শুনতে পেলো তাই শুনলে ; আবার কি ?

কুমুম—আমার মনে হয়, সব মিথ্যে কথা ।

যুধিকা—সত্যি কথা হলেই বা কি ?

কুমুম রাগ করেন—বাজে কথা বলিস না ।...কিন্তু আমি ভাবছি, কণিকা বসে বসে করছে কি ? এরকম একটা কাণ্ড হয়ে গেল, অথচ তার কোনো খবরই রাখে না কণিকা ? হতেই পারে না ।

লতিকার মা-র কথাগুলিকে অবিশ্বাস করতেই ইচ্ছে করে ; কিন্তু অবিশ্বাস করবার মতো মনের জোরটাই যেন বার বার দুর্বল হয়ে যাচ্ছে । তাই ভাবতে গিয়ে এক-একবার সত্যিই শিউরে ওঠেন কুমুম ঘোষ ; ভগবান না করেন, লতিকার মা-র কথাগুলি যদি মিথ্যে কথা না হয়, তবে যুধিকার জীবনে যে একটা ভয়ানক অপমানের জ্বালা লাগবে । মেয়েটার মনের দশাও যে কি হয়ে যাবে, ভগবান জানেন ! জানেন কুমুম ঘোষ, কণিকার কাছ থেকে অনেক চিঠিতে যে খবর এত-দিন ধরে জেনে এসেছেন তাতে আর কোনো সন্দেহই নেই যে নরেনকে ভালবাসে যুধিকা । নরেনের ভালবাসার উপরেও মস্ত বড়ো একটা বিশ্বাস নিয়ে নিশ্চিন্ত হয়ে আছে যুধিকা । এর পর লতিকার সঙ্গে সত্যিই যদি নরেনের বিয়ে হয়ে যায়, তবে... ।

কুমুম ঘোষের চোখ দুটো করুণ হয়ে যুধিকার মুখের দিকে তাকিয়ে থাকে। কিন্তু এ কি ব্যাপার? যুধিকার মুখে কোনো উদ্বেগের বেদনা ফুটে উঠেছে বলে মনে হয় না। ঘরের ভিতরে কেমন স্বচ্ছন্দে ঘুরে ফিরে আর গুনগুন করে চাপা গলার গান গাইছে যুধিকা।

কণিকার অসাবধানতার উপর রাগ হয়, আর যুধিকার এই চাপা-গলার গানের গুঞ্জনের উপরেও রাগ করেন কুমুম ঘোষ। এরা ভেবেছে কি! কণিকা কি ক্লান্ত হয়ে সব চেঁচাই ছেড়ে দিল? আর যুধিকা কি আচমকা একটা শক পেয়ে, একেবারে আশাশূন্য হয়ে, ছুর্ভাগ্যের আর অপমানের জ্বালা চাপবার জন্য চাপা-গলার গান গেয়ে উঠলো?

—যুধি। ডাকতে গিয়ে কুমুম ঘোষের গলার স্বরটা যেন ছুশ্চিস্তার প্রতিধ্বনির মতো বেজে ওঠে।

—কি মা? গান খামিয়ে আর একটু আশ্চর্য হয়ে উত্তর দেয় যুধিকা।

—তুই ভাবিস না। লতিকার মা নিশ্চয় মিথ্যে কথা বলেছে।

হেসে ওঠে যুধিকা। —বললাম যে, সত্যি হলেই বা কি আসে যায়।

—ছিঃ, ওকথা বলতে নেই। বলবার কোনো দরকারও হয় না। লতিকার মা-র মতলব শেষ পর্যন্ত আমাদের ক্ষতি করতে পারবে না কিন্তু তবু একটু সাবধান হওয়া ভালো।

—বুঝতে পারছি না মা।

—আমার মনে হয়, তোর এখন পাটনাতে থাকাই ভালো।

—এখন পাটনাতে গিয়ে লাভ কি? কলেজ খুলতে এখনও অনেকদিন বাকি আছে।

—তা জানি, কিন্তু নরেনের যে হঠাৎ মাঝে মাঝে পাটনাতে এসে পড়বার সম্ভাবনাও আছে।

—আশুক না।

—কি ছাই বলছিস ? তুই এখানে বোবা হয়ে পড়ে থাকবি, কণিকা ওদিকে হাবা হয়ে পড়ে থাকবে ; আর শীতাংশু ডাক্তার বার বার নরেনকে নেমস্তন্ন করে চা খাইয়ে, লতিকার গান শুনিয়ে....ছিঃ ছিঃ...ওরা যে নরেনের একটা ভয়ানক ক্ষতি করে দেবে ।

—কিন্তু আমি কি করতে পারি বলা ?

—তুমি কালই পাটনাতে চলে যাও ; তারপর যা করবার কণিকা করবে ।

—আমি পাটনা যেতে পারবো না ।

যুধিকার কথা শুনে আশ্চর্য হন কুমুম ঘোষ । বরং একটু শঙ্কিতও হয়ে ওঠেন । যুধিকার চোখে-মুখের এই অবিচল প্রশান্তি, পাটনার উপর হঠাৎ এই তুচ্ছতা, এ যে যুধিকার মনের একটা অভিমানের বিদ্রোহ । খুবই ব্যথিত হয়েছে যুধিকা । মেয়েটার সম্মানে লেগেছে ।

চলে যান কুমুম ঘোষ ; এবং একটু পরেই ফিরে আসেন ; সঙ্গে চারুবাবুও আছেন । যুধিকা ঘোষ ততক্ষণে একটা নতুন উপস্থাসের কুড়ি পাতা পড়ে ফেলেছে ।

চারুবাবু বলেন—তোমার এখন পাটনা যাওয়া খুবই দরকার যুধি ।

যুধিকার চোখে ছোটো অঞ্চ শব্দ একটা আপত্তির ড্রাকুটি ফুটে ওঠে ।

চারুবাবু বলেন—দেয়ি করবারও দরকার নেই । ড্রাইভারকে বলে দিচ্ছি, কাল সকালে হিমু নামে সেই লোকটাকে একটা খবর দিয়ে আসবে... ।

যুধিকা ঘোষের ড্রাকুটিই যেন হঠাৎ একটা চমক লেগে গলে যায় আর স্তম্ভিত বিস্ময়ের মতো উধলে ওঠে । খোলা উপস্থাস বন্ধ করে টেবিলের উপর ফেলে দিয়ে যেন ছটফট করে উঠে দাঁড়ায় যুধিকা—
কালই রওনা হতে বলছো ?

চারুবাবু—হ্যাঁ সকাল দশটার ট্রেনে ।

যুধিকা—বেশ ।

পাটনা যেতে হবে। আবার জগদীশপুর...মধুপুর...ষশিডি—
 ট্রেনটা যেন ছ'পাশের রত ছোটো ছোটো স্বপ্নলোকের কলরব কুড়িয়ে
 নিয়ে ছুট করে ছুটে চলে যাবে। ট্রেনের কামরার অচেনা ভিড়ের
 মুখরতা যেন একটা নীরবতা; চুপ করে বসে শুধু নিজের মনের কথা-
 গুলিকে বুকের ভিতরে গুনেতে পাওয়া যায়। অচেনা ভিড়টাও যেন
 একটা নির্জনতা; মনের কথা মুখ খুলে বলে কেলতে একটুও অসুবিধা
 নেই, কোনো বাধাও নেই; কেউ গুনতেই পায় না বোধহয়। ট্রেনের
 ঘুম একটা জাগার স্বপ্ন, জেগে থাকার একটা ঘুম-ঘুম আবেশ।

উদাসীনের বাগানে সকালবেলার আলো ছড়িয়ে পড়তেই উদাসীনের
 মেয়ে যুথিকা ঘোষের মনের ভিতরেও যেন আলো ছড়িয়ে পড়ে।
 যুথিকা ঘোষের জীবনের গম্ভব্যটা পাটনা বটে; সেই পাটনাকে যে
 বেশ ভালো লাগে কিন্তু পাটনা যাওয়ার ঝঙ্কারটো যে একটা উৎসবের
 আনন্দ হয়ে যুথিকা ঘোষের কল্পনায় ছলতে শুরু করে দিয়েছে। সকাল
 দশটা হতে আর বেশি দেরি নেই। তৈরি হয় যুথিকা ঘোষ।

তৈরি হওয়াও এমন কিছু ঝঙ্কারের ব্যাপার নয়। এবং তৈরি
 হবার ব্যাপারটাও সকাল ন'টা হতে না হতেই চুকে যায়। চামড়ার
 বড়ো একটা কেস, ছোটো একটা বেডিং, খাবারের বাস্কেট, জলের
 ফ্লাস্ক আর ছোটো হাত ব্যাগটা উপরতলার ঘর থেকে নামিয়ে নিয়ে
 এসে নিচের তলার বারান্দায় রেখে দেয় চাকর জানকীরাম।

সাজ করবারও বিশেষ কোনো ঝঙ্কার নেই। নেকলেসটা গলা
 থেকে খুলে পড়ে যাবার ভয় আছে; না পরাই ভালো।

নেকলেসটাকে হাত-ব্যাগের ভিতরে রেখে দিয়েছে যুথিকা। আর...
 হ্যাঁ ভেলভেটের স্কাপেল পায়ে না দেওয়াই ভাল; ট্রেনে গুঠা-নামা
 করবার ছড়োছড়ির মধ্যে স্কাপেলটা পা থেকে খসে পড়ে যায় আর
 বেচারী হিমাদ্রি সেই স্কাপেল আনতে গিয়ে...। ছিঃ, এক পাটি জুতো
 কুড়িয়ে আনবার জন্তু মানুষ এমন বিপদের বুঁকিও নেয়? চলন্ত ট্রেন
 থেকে নেমে পড়ে আর...।

না, লাল ভেলভেটের স্কাপেল নয়, সবুজ রঙের চামড়ার সেই

মেয়েলী শু ছোড়া পায়ে দিয়ে তৈরি হয় যুধিকা । ডাইভারও গ্যারেজ থেকে গাড়ি বের করে ।

যাত্রালগ্নের এই বাস্ততার মধ্যেই এক ফাঁকে উপরতলার ঘরের ভিতরে গিয়ে একটু একলা হয়ে আয়নার সামনে দাঁড়িয়ে নিজের মুখের ছবিটার দিকে শেষবারের মতো তাকিয়ে যেন নিজেকেই একটু মায়া করে নেয় যুধিকা । তারপরেই তরতর করে হেঁটে নিচে নেমে আসে । বাইরের বারান্দার উপর দাঁড়ায় ।

চারুবাবু বলেন—দশটা বাজতে আর পনের মিনিট বাকি ।

কুমুম ঘোষ বলেন—চলো, যুধি ।

কিন্তু চলতে গিয়েই হঠাৎ ধমকে দাঁড়াল যুধিকা । উদাসীনের মেয়ের একটা আশার স্বপ্ন যেন হঠাৎ অন্ধ হয়ে গিয়েছে ।

গাড়ির কাছে দাঁড়িয়ে আছেন বুড়ো বলাইবাবু । বলাইবাবুর এক হাতে তাঁর সেই লাল কম্বলটি, আর এক হাতে সেই ছোটো ঝোলাটি এবং ঝোলার মুখ ঠেলে সেই ছোটো খেলো ছুকোটোর নলের মুখ উঁকি দিয়ে রয়েছে ।

চারুবাবু বলেন—হিমু নামে সেই...ইয়ে—সেই রাফ স্বভাবের লোকটাকে আর ডাকবার দরকার হলো না । মধুপুর থেকে বলাইবাবু হঠাৎ আজ সকালে এসে গিয়েছেন । কাজেই...

যুধিকার মুখের হাসি যেন মরা গোলাপের পাপড়ির মতো একটা শুকনো বাতাসের আঘাত লেগে ঝরে পড়ে গিয়েছে । বিড়-বিড় করে যুধিকা—তাহলে—তাহলে বলাইবাবু আমার সঙ্গে যাচ্ছেন ?

কুমুম—হ্যাঁ ।

চারুবাবু খুশি হয়ে হাসেন—বলাইবাবুর কোমরের বাত যে এত শিগগির সেরে যাবে আমিও আশা করতে পারিনি ।

হ্যাঁ, দেখতে পায় যুধিকা গাড়ির কাছে বেশ সোজা হয়ে আর কোমর টান করে দাঁড়িয়ে আছেন বলাইবাবু !

আর দেরি করে লাভ কি ? দেরি করবার কোনোও অর্থও হয় না । আস্তে আস্তে হেঁটে গাড়ির দিকে এগিয়ে যায় যুধিকা ।

তারপর আর কোনো ঘটনারই কোনো দেরি সহিতে হয় না। উদাসীনের গাড়ি একটানা ছুটে এসে স্টেশনের কাছে থামে। টিকিট কিনতে দেরি করেন না বলাইবাবু। মধুপুর যাবার ট্রেনের ইঞ্জিনটাও রঙনা হবার উল্লাসের শিস বাজাতে আর গুমরে উঠতে দেরি করে না।

চারুবাবু বলেন—টেলিগ্রাম করে কণিকাকে জানিয়ে দিয়েছি।

কুমুম ঘোষ বলেন—তুমিও পাটনা পৌঁছেই একটা চিঠি দিতে ভুলে যেও না যেন।

মাথা নেড়ে একটা সাড়া দিতেও ভুলে যায় যুধিকা। একজোড়া উদাস চোখ নিয়ে আর নীরব হয়ে, ট্রেনের কামরার ভিতর ঢুকে অলস মূর্তির মতো বসে থাকে। ছেড়ে যায় ট্রেন।

জগদীশপুরের নার্সারি পার হয়ে ট্রেনের ইঞ্জিন তীব্র একটা শিস বাজিয়ে ছ'পাশের মাঠের বাতাস শিউরে দিতেই যুধিকা ঘোষের এতক্ষণের নীরবতা যেন হটাৎ একটা চমক লেগে ভেঙে যায়। বলাইবাবুর দিকে তাকিয়ে প্রায় চৈঁচিয়ে ওঠে যুধিকা।—আপনার কোমরের বাত হঠাৎ সেরে গেল যে ?

বলাইবাবুও যেন চমকে ওঠেন, এবং আশ্চর্যে আশ্চর্য হসেন—হ্যাঁ দিদি, ঠাকুরের কৃপা। ওঃ, এই কটা মাস কি যে কষ্ট পেয়েছি, সে আর বলবার নয় দিদি।

যুধিকা—অসুখ হঠাৎ সেরে গেল ভালোই হলো, কিন্তু আজ হঠাৎ আপনার গিরিজিতে যাবার এত দরকার হয়ে পড়লো কেন ?

বলাইবাবু—দরকার বিশেষ কিছুই নয় দিদি। বাবুর সঙ্গে অনেক দিন দেখা হয়নি, তাই।

যুধিকা—তাই, আর সময় পেলেন না ? আজই হঠাৎ।

বলাইবাবু—কি বললে দিদি ?

যুধিকা—হুদিন পরেও তো আসতে পারতেন ?

বলাইবাবু—তা পারতুম কিন্তু আজ হঠাৎ গিরিজিতে এসে পড়ে ছিলুম বলেই না তোমাকে পাটনাতে পৌঁছে দেবার...

যুধিকা—আমাকে পাটনা পৌঁছে দেবার মানুষ ছিল। আপনি না এলে কোনো অসুবিধেই হতো না।

বলাইবাবু—অসুবিধে কেন হবে দিদি? বাবুর কি চাকর-বাকরের কোনো অভাব আছে? কত মানুষ আছে।

যুধিকার গলার স্বর তপ্ত হয়ে ওঠে—আজ্ঞে না। আপনি না বুঝে-সুঝে এসব কথা বলবেন না।

বলাইবাবু হাসেন—বুড়ো মানুষের কথার এত ভুল ধরতে নেই দিদি।

যুধিকা—সেই জগ্নেই তো বলছি।

বলাইবাবু—কি?

যুধিকা—আপনি বুড়ো মানুষ; ট্রেনে যাওয়া-আসা করবার সামর্থ্যই বা আপনার কতটুকু? মিছিমিছি নিজে কষ্ট পান আর আমাকেও অসুবিধায় ফেলেন।

বলাইবাবু ভীতভাবে বলেন—না না, আমার কষ্টের কথা ছেড়ে দাও। তোমার যদি কোনো অসুবিধের পড়তে হয়, তবে আমাকে বললেই আমি তখুনি...

যুধিকা—বলতে হবে কেন?

বলাইবাবু—অ্যা! না বললে কেমন করে...

যুধিকা—হ্যাঁ, না বললেও মানুষের অসুবিধে মানুষ বুঝতে পারে।

বলাইবাবু—আমিও কি পারি না? এতবার তোমাকে পাটনা নিয়ে গেলাম, বলতে পার দিদি, তোমার কোনো অসুবিধে হতে দিয়েছি?

বুড়ো বলাইবাবুর প্রশ্নের একটা স্পষ্ট উত্তর হয়তো বৌকের মাথায় সুনিয়েই দিত যুধিকা; কিন্তু বলাইবাবু হঠাৎ ব্যস্তভাবে চেষ্টা করে একটা প্রশ্ন করে ওঠেন।—তোমার হাত-ঘড়িটা দেখে একটু বলো তো দিদি, কটা বাজল? এগারটা বেজে গিয়েছে?

যুধিকা হাত-ঘড়ির দিকে তাকিয়ে বলে—হ্যাঁ।

ওঃ, বড়ো ভুল হয়ে গেল। বলতে বলতে আরও ব্যস্ত হয়ে ঝোলা থেকে থার্মোমিটার বের করেন বলাইবাবু; আর বগলে চেপে বসে থাকেন। একটু পরেই প্রশ্ন করেন—দেড় মিনিট হলো কি দিদি?

যুথিকা—হ্যাঁ।

থার্মোমিটারটাকে যুথিকারই হাতের কাছে এগিয়ে দিয়ে বলাইবাবু বলেন—দেখে একটু বলে দাও তো দিদি, সাতানব্বই না আটানব্বই?

থার্মোমিটার হাতে তুলে নিয়ে যুথিকা বলে—সাতানব্বই।

যুথিকার হাত থেকে আবার থার্মোমিটারটা তুলে নিয়ে ঝোলার ভিতরে ভরতে ভরতে বলাইবাবু বলেন—তা হলে ভালোই আছি বলতে হবে দিদি। নয় কি?

যুথিকা—হ্যাঁ।

নীরব হয় যুথিকা। এবং বোধহয় চুপ করে বসে শুধু নিজের মনের সঙ্গে নীরবে কথা বলতে চায়। জানালা দিয়ে বাইরের মাঠের শোভা আর সাঁওতালী গাঁ-এর কুটিরগুলির দিকে তাকিয়ে থাকতে থাকতে চোখ ছটো আনমনা মানুষের চোখের মতো অপলক হয়ে থাকে।

কিন্তু আবার বলাইবাবুর একটা প্রশ্নের শব্দ যুথিকার এই আনমনা নীরবতার শান্তিটাকেও যেন চমক দিয়ে নষ্ট করে দেয়।

—শুনছো দিদি?

যুথিকা বিরক্ত হয়ে বলে—কি?

—সাড়ে এগারটা বেজে গিয়েছে কি?

যুথিকা—হ্যাঁ।

—তা হলে আমার এখন কিছু আহাঙ্গাদি দরকার দিদি।

যুথিকা আশ্চর্য হয়।—এখুনি থাকেন?

—হ্যাঁ, নিয়মভঙ্গ করতে চাই না দিদি। ডাক্তার বলেছেন, দিবাভাগের আহাঙ্গ সারতে যেন কোনোমতেই বায়টার বেশি না হয়ে যায়!

যুথিকা—মধুপুরে পৌঁছে তারপর খেলেইতো পারতেন।

—না দিদি, মধুপুরে পৌঁছতে ট্রেনটা আজ লেট করবে বলে মনে হচ্ছে।

থাবারের বাস্কেট হাতের কাছে টেনে নিয়ে, অয়েল পেপারের ঠোঙার মধ্যে দশটা লুচি, আলুভাজা, আর পাঁচটা সন্দেশ ভরে দিয়ে বলাইবাবুর হাতের কাছে এগিয়ে দেয় যুথিকা।

বলাইবাবু বলেন—জল ?

বাস্কেটের ভিতর থেকে গেলাস বের করে নিয়ে ফ্লাস্কের জল ঢালে যুথিকা।

বলাইবাবু লুচি ও আলুভাজা মুখে চিবোতে চিবোতে বলেন— গিরিডির কুয়োর জল আমার শরীরের পক্ষে একেবারে মেডিসিন। ও জল খেতে পেলে আমি আধ সের মাংসের কার্নিকেও ডরাইনা।

আহারাদি সমাপ্ত হবার পর, ঝোলার ছাঁকোর দিকে যখন হাতটাকে মাত্র বাড়িয়ে দিয়েছেন বলাইবাবু, ঠিক তখন ট্রেনের গতি হঠাৎ মূছ হয়ে যায়। জানালা দিয়ে মুখ বাড়িয়ে যুথিকা বলে—মধুপুর এসে গিয়েছে। এখন আর ছাঁকো-টুকো...

বলাইবাবু বলেন—তাতে কি হয়েছে ? স্টেশন আসতে আসতে আমি টিকে ধরিয়ে ফেলবো।

ঝোলা থেকে ছকো, কলকে, তামাক আর টিকে বের করেন বলাইবাবু। এবং দেশলাই জ্বলে টিকে তাতাতে শুরু করে দেন।

বলাইবাবুর ফু খেয়ে খেয়ে টিকের জলন্ত কোণা থেকে যখন ছোটো ছোটো ফুলিঙ্গ উড়তে থাকে তখন ট্রেনটা থেমেই যায়। আর প্ল্যাটফর্মের ভিড়ের কলরব ট্রেনের কামরার ভিতরে এসে লুটিয়ে পড়ে। ছড়োছড়ি করে কুলির দলও ছুটে আসে।

একটা কুলি কামরার ভিতরে ঢুকে যুথিকা ঘোষের বাস্ক বিছানা বাস্কেট আর ফ্ল্যাঙ্ক নিয়ে প্ল্যাটফর্মে নেমে পড়ে। শুধু ছোটো হাতব্যাগটা হাতে নিয়ে উঠে দাঁড়ায় যুথিকা।

ছকোর নলের মুখে কলকেটা চেপে নিয়ে বলাইবাবু বলেন—আমার কঞ্চলটা আর ঝোলাটাকে ভুলে যেও না দিদি।

একহাতে হুকো নিয়ে, আর এক হাতে দরজার ব্লড ধরে আস্তে আস্তে নেমে যান বলাইবাবু। বলাইবাবুর প্রকাণ্ড কম্বল আর ঝোলাটাকে একহাতে কোনোমতো জড়িয়ে ধরে যুধিকাও প্ল্যাটফর্মে নামে।

বলাইবাবু হাফ ছাডেন—আঃ, পাটনা এক্সপ্রেস আসতে এখন অনেক দেরি আছে দিদি।

হ্যাঁ, অনেক দেরি আছে। এখনও আধ ঘণ্টার বেশি সময় অপেক্ষা করতে হবে, তারপর পাটনা যাবার ট্রেন ছুটে এসে প্ল্যাটফর্মের ওপর দাঁড়াবে। হেঁ-হেঁ করে বেজে উঠবে সংসারের একটা ছুটন্ত ভিড়ের কর্কশ মুখরতা। এবং সেই মুখরতার একটা প্রকোষ্ঠের মধ্যে ঢুকে চুপ করে বসে থাকতে হবে। বিকেল পার হয়ে যাবে, সন্ধ্যাটা আস্তে আস্তে মরে যাবে, আর গভীর হয়ে যাবে। তারপর, মাঝরাতেরও পরে একটি মুহূর্তে পাটনা স্টেশনের প্ল্যাটফর্মে নেমে শুধু দেখতে হবে মামীর ড্রাইভার দাঁড়িয়ে আছে।

পাটনা যাবার ট্রেন একটা ট্রেন মাত্র। এমন ট্রেনযাত্রা একটা যাত্রার অভিযান মাত্র ভাবতে একটুও ভালো লাগে না। যুধিকার কল্পনার ছবিটাকে মিশ্র করে দিয়ে এ কি অদ্ভুত একটা অমধুর আর অকরণ ট্রেনযাত্রা দেখা দিল।

হঠাৎ ছটকট করে শঙ্কিতের মতো টেঁচিয়ে ওঠে যুধিকা—বলাইবাবু!
—কি দিদি?

যুধিকা—আমার বড়ো অসুবিধে হচ্ছে। আমি পাটনা যেতে পারবো না।

চমকে ওঠেন বলাইবাবু—অসুবিধে? কিসের অসুবিধে? আমি তো সর্বক্ষণ তোমার সুবিধের জ্ঞান ব্যস্ত হয়ে রয়েছি দিদি।

যুধিকা—তবু আমার অসুবিধে হচ্ছে।

বলাইবাবু—কিন্তু, আমি তো...

যুধিকা—আপনাকে দোষ দিচ্ছি না। মোট কথা, আমার এখন পাটনা যেতে খুবই খারাপ লাগছে।

চোখ বড়ো করে ভয়ে ভয়ে তাকিয়ে থাকেন বলাইবাবু—তাহলে সত্যিই কি গিরিডি ফিরে যেতে চাও ?

যুধিকা—হ্যাঁ ।

বলাইবাবু—কিন্তু বাবু যে আমার উপর ভয়ানক রাগ করবেন দিদি ।

যুধিকা—আপনার ওপর রাগ করবেন কেন ? আপনার দোষ কি ?

বলাইবাবু—হ্যাঁ, সেটা বুঝে দেখ দিদি । আর সেটা বাবুকে স্পষ্ট করে বুঝিয়ে দিতে ভুলে যেও না ।

যুধিকা—আপনি ভাবছেন কেন ? আমি বলবো, আমিই ইচ্ছে করে ফিরে এসেছি ।

যুধিকাই ব্যস্ত হয়ে এদিকে-ওদিকে তাকিয়ে কুলিটাকে ডাকে । এবং কুলিটাও একটু আশ্চর্য হয়ে বাজ বেড়িং তুলে নিয়ে গিরিডি যাবার ট্রেনের কামরায় তুলে দিয়ে সেলাম জানায়—কুছ বকশিসভি দিজিয়ে দিদি ।

হাত-ব্যাগ থেকে টাকা বের করে কুলির হাতে ফেলে দিয়ে আর বলাইবাবুর দিকে তাকিয়ে হেসে ওঠে যুধিকা ।—চা খাওয়ার ইচ্ছে থাকে তো খেয়ে নিন বলাইবাবু । এই ট্রেন ছাড়তেও আর বেশি দেরি নেই ।

বলাইবাবু বলেন—নিশ্চয় নিশ্চয় । একটা চা-ওয়ালাকে ডাক দিও দিদি ।

জ্বর-টর হয়নি, শরীর ভালোই আছে, তবু মধুপুর থেকে ফিরতি ট্রেনেই গিরিডি ফিরে এসেছে যুধিকা । একি কাণ্ড ! কি বিস্ত্রী ব্যাপার । কুমুম ঘোষ তাঁর ছ'চোখের বিষয় সামলাতে গিয়ে শেষে সন্দেহ করেন, মেয়েটার মাথায় সত্যি সত্যি পাগলামির ছিট দেখা দিল না তো ?

চারু ঘোষ বলেন—আমি তো যুধির মতি-গতির কোনো অর্থই খুঁজে পাচ্ছি না ।

এখন পাটনা যেতে একটুও ভালো লাগছে না ; এই কথা ছাড়া আর কোনো কথা বলতে পারেনি যুধিকা । কথাগুলি একটুও মিথ্যে নয় । এবং বিশ্বাসও করেন উদাসীনের পিতা আর মাতা । কিন্তু,

কেন পাটনা যেতে একটুও ভালো লাগছে না? এ যে একটা অত্যন্ত অগ্ৰায় ভালো-না-লাগা! অনেকবার আক্ষেপ করেন কুমুম ঘোষ।

কেন পাটনা যেতে ইচ্ছে করছে না? এ যে নিতান্ত বোকার মতো ইচ্ছে না-করা! বারবার এবং বেশ একটু রুঢ় স্বরে অভিযোগ করেন চারু ঘোষ।

এবং মাত্র আর তিনটে দিন পার হবার পর, পাটনা থেকে কণিকা মামীর একটা মস্ত বড়ো চিঠি এসে উদাসীনের পিতা আর মাতার মনে আবার একটা কঠিন উদ্বেগের বেদনা ছড়িয়ে দেয়।

জানিয়েছেন কণিকা; আর তিন-চার দিনের মধ্যে নরেন পাটনাতে এসে পড়বে। এবং এইবার বেশ কিছুদিন পাটনাতেই থাকবে। নরেনের চিঠির ভাষা থেকে বুঝতে পেরেছে কণিকা, এবার পাটনাতে এসে মন স্থির করে একটা পাকা-কথা দিয়ে ফেলবে নরেন। নরেনের মার সঙ্গেও আলাপ করে তাই মনে হয়েছে কণিকার। তা না হলে দেড়-মাসের ছুটি নেবে কেন নরেন?

আরও কতগুলি কথা খুবই বিরক্ত হয়ে লিখেছে কণিকা;—কিন্তু আপনাদের প্রতিবেশী গণেশবাবুর বড়ো ছেলে, অর্থাৎ লতিকার ডাক্তার দাদা শীতাংশু যে কেন এত ঘন ঘন নরেনের মা-র সঙ্গে দেখা করছে, বুঝতে পারছেন কি? মাঝে একদিনের জন্তে আমি সাসারাম গিরে-ছিলাম। ফিরে এসে জানলাম, নরেনও একদিনের জন্তে পাটনা এসে-ছিল। যুধিকার সঙ্গে নরেনের ভাবসাব আছে, একথা তো ওরাও জানে। তবু দেখেন, কি কুৎসিৎ মনোবৃত্তি? নরেনের কাছে লতিকার মা আপনাদেরই প্রতিবেশিনী সেই সাংঘাতিক মহিলাটি, এর মধ্যে একবার পাটনা ঘুরে গিয়েছেন। নরেনকে বাড়িতে ডেকে নিয়ে লতিকার গান শুনিয়েছেন। নরেনের মা-র কাছে লতিকার একখানা ফটো আর লতিকার লেখা এক গাদা কবিতার একটা খাতা রেখে গিয়েছেন। কিন্তু ওদের কোনো মতলবই সফল হবে না, যদি এই সময় যুধিকা এসে পাটনাতে থাকে।

সব শেষে লিখেছে কণিকা—যুধিকার একটা বিস্তী দোষ এবার দেখলাম। মেয়েটা কি যেন সন্দেহ করেছে আর হতাশের মতো হাঁপিয়ে পড়েছে। ওরকম ভুল করলে চলবে না যুধিকার। ওকে একটু বুঝিয়ে দেবেন, নরেন যদি ভগবান না করেন, কোনো কারণে কিছু সন্দেহ করে ফেলে, তবে কি পরিণাম হবে কল্পনা করুন। যদি লতিকার সঙ্গে নরেনের বিয়ে হয়ে যায়, তবে যুধিকার কি আর কারও কাছে মুখ দেখাবার উপায় থাকবে ?

—এই নে, কণিকার চিঠি পড়ে দেখ। কুশুম ঘোষ রাগ করে চিঠিটাকে যুধিকার হাতের কাছে তুলে দিয়ে যান।

পাটনার মামীর প্রকাণ্ড চিঠিটা পড়েই চমকে ওঠে যুধিকা। যেন হঠাৎ ঘুম ভেঙে জেগে উঠেছে যুধিকার প্রাণ। অনেকক্ষণ চুপ করে যেন আকাশ পাতাল ভাবতে থাকে যুধিকা। তারপরেই ছটফট করে ওঠে।

লতিকার মনের আশার ইতরতা দেখে আশ্চর্য হয়ে গিয়েছে যুধিকা। লতিকার জীবনের জেদটাও কি ভয়ানক বেহারা। তাইতো ? কি হবে উপায় ? নরেন মতিয়ে যদি ভুল করে লতিকার মতো মেয়েকে...ভাবতে গিয়ে উদাসীনের মেয়ে যুধিকার মনের ভিতরে একটা অস্বস্তি, বোধহয় একটা উদ্বেগের ছায়া ছটফট করতে থাকে।

নরেনের মনটা যদি এত উদার আর কোমল না হতো তবে এক মুহূর্তের জ্ঞাও উদ্বেগে বিচলিত হতো না যুধিকার মন। কিন্তু নরেন খুব বেশি ভদ্র বলেই বোধহয় শীতাংশু ডাক্তারের ইচ্ছা আর চেষ্টার বিরুদ্ধে স্পষ্ট করে অভদ্রতা করতে পারে না! নইলে কবেই মাত্র একটি স্পষ্ট কথা বলে শীতাংশুদার উৎসাহ ধামিয়ে দিতে পারতো নরেন।

বলেই তো পারতো নরেন ; বললো না কেন ? আমি যুধিকাকে ভালবাসি, স্তত্রাং, আপনি বুধা আর লতিকার গান শোনারা জ্ঞা আমাকে ডাকবেন না ; একখাটাও শীতাংশু ডাক্তারকে বলে দিলে এমন কিছু অভদ্রতা হতো না।

কল্পনা করতে পারে যুধিকা, নরেনের সঙ্গে যুধিকার বিয়ে হয়ে বাবার পর শুধু লতিকা নয়, এই গিরিডির আরও অনেকে যুধিকার ভাগ্যকে হিংসে না করে পারবে না। মাত্র ত্রিশ বছর বয়সে এক হাজার টাকা মাইনের সরকারী সার্ভিস করে যে নরেন, সে নরেনের পক্ষে যুধিকার চেয়ে ঢের ঢের বেশি শিক্ষিতা এবং সুন্দরী মেয়ে বিয়ে করার অসুবিধা ছিল না। কিন্তু শুধু ভালবাসার সৌভাগ্যে যুধিকা ঘোষই যে নরেনের জীবনের সঙ্গিনী হয়ে যাবে। যদি হিংসে করতে হয়, তবে যুধিকার এই ভালবাসাকেই হিংসে করুক না সবাই।

কিন্তু যুধিকা যদি পাটনা যেতে চায়, তবে নিয়ে যাবে কে? শুনেতে পায় যুধিকা, বাবা আর মা বাইরের ঘরে বসে এই সমস্যার কথাও আলোচনা করছেন। বলাইবাবু বাতের ব্যথায় আবার পদ্ম হয়ে গিয়ে উদাসীনের ভাবনাগুলিকে সমস্যায় ফেলেছেন।

—যুধি। চৌচিয়ে ডাক দেন চারুবাবু।

বাইরের ঘরের দরজার কাছে যুধিকা এসে দাঁড়াতেই গম্ভীর স্বরে আদেশ করেন কুমুম ঘোষ—তোমাকে এখনই, আজ এই সন্ধ্যাতেই পাটনা রওনা হতে হবে।

চারুবাবু—আমি এখনি সেই লোকটাকে খবর পাঠাচ্ছি কি যেন তার নাম?

হেসে কৈলে যুধিকা—হিমাদ্রিবাবু।

হ্যাঁ, ডাক শুনে চলে আসতে দেরি করেনি হিমু। এবং যুধিকাকে সঙ্গে নিয়ে পাটনা রওনা হয়ে যেতে একবিন্দু আপত্তিও করেনি।

গিরিডি স্টেশনের ভিড় আর হল্লা পিছনে ফেলে রেখে দিয়ে ট্রেনটা যখন আবার গাঙা মাটির মাঠের উপর দিয়ে ছ'পাশের যত সবুজ শোভার ভিতর দিয়ে ছ ছ করে ছুটে এগিয়ে যেতে থাকে, তখন যুধিকা ঘোষের মুখে যেন একটা প্রাণখোলা হাসির এক ঝলক তরল আভা ছড়িয়ে পড়ে। —হিমাদ্রি যে আমাকে চিনতেই পারছে না!

হিমুও হাসে—তুমি জান, চিনতে পেরেছি কি না।

যুধিকা—তবে এ রকম না চেনবার ভঙ্গী ক'রে গস্তীর হয়ে আছ কেন ?

হিমু—তোমার গস্তীরতা দেখে ।

যুধিকা—আমি গস্তীর ?

হিমু—হ্যাঁ, এতক্ষণ খুব বেশি গস্তীর হয়ে কি যেন ভাবছিলে ।

যুধিকা—হ্যাঁ, সত্যি হিমাঙ্গি ; মানুষের ইতরতার রকম দেখে খুবই আশ্চর্য হয়ে গিয়েছি ।

হিমু—ওসব কথা ছেড়ে দাও । ওসব কথা যত ভাববে, তত নিজেরই ক্ষতি হবে ।

যুধিকা উৎফুল্ল হয়ে বলে—ঠিক কথা বলেছো হিমাঙ্গি, এরকম পরামর্শের জগ্গেই যে মানুষের একটা বন্ধু মানুষ দরকার ।

কিন্তু আবার কিছুক্ষণ গস্তীর হয়ে আনমনার মতো চোখ নিয়ে কি-যেন ভাবতে থাকে যুধিকা ঘোষ । মানুষের ইতরতার কথা না হোক, অথ কোনো কথা নিশ্চয় ভাবছে । হিমু প্রশ্ন করে ; এই বোধ হয় হিমু নিজের থেকে যেচে, কে জানে কোন্ সাহসের ছোঁয়া পেয়ে, প্রশ্ন করে হিমু—আবার কি ভাবতে আরম্ভ করলে ?

খিল খিল করে হেসে ওঠে যুধিকা । —যা ভাবছিলাম, সে কথা তোমাকে বলা উচিত কিনা তাই ভাবছি ।

—ভেবে দেখ । হিমুও হেসে হেসে জবাব দেয় ।

যুধিকা—কলেজ খোলেনি, তবু কেন পাটনা যাচ্ছি বলতে পার ?

হিমু—যদি বলতে পারতাম, তবে বলেই ফেলতাম । তোমাকে আর জিজ্ঞাসা করবার দরকার হতো না ।

যুধিকা—অভিনারে যাচ্ছি ।

হিমু মুখ ফিরিয়ে অগ্গদিকে তাকায় ।

যুধিকা—শুনে লজ্জা পেলে তো হিমাঙ্গি ?

হিমু—না । কিন্তু তোমার ইচ্ছেটা এই যে, তোমার কথা শুনে আমি যেন লজ্জা পাই । আসলে কিন্তু নিজে লজ্জা পেয়েছ ।

যুধিকা—লজ্জা পাওয়ারই কথা বটে । বোম্বাই থেকে নরেন আর

ছ'এক দিনের মধ্যে পাটনা পৌঁছে যাবে। নরেন হলো আমার... ৮

হিমু—কি ?

যুধিকা—আঃ, যেন একেবারে খোকাটি ! স্পষ্ট করে না বললে কিছু বুঝতেই পারে না।

হিমু হেসে ফেলে—এসব কথা যে শুধু মেয়ে-বন্ধুর কাছে বলতে হয় যুধিকা।

যুধিকা—তোমার মতো পুরুষ-বন্ধু মেয়ে-বন্ধুর চেয়েও বেশি মেয়ে।

হিমু—এরকম প্রশংসা আমাকে আজ পর্যন্ত কেউ করেনি।

যুধিকা—সত্যি হিমাদ্রি, নরেন মানুষটি সত্যি ভালো। তোমার চেয়ে বয়স একটু বেশিই হবে, তবে ত্রিশের বেশি নয় ; কিন্তু একহাজার টাকা মাইনের সরকারী সার্ভিসে আছে। কথাবার্তায় যদিও বেশ একটু অহঙ্কার আছে, কিন্তু সে অহঙ্কার মানিয়ে যায়। কেন মানাবে না বলো ? বেশ বড়ো অবস্থাপন্ন বাড়ির ছেলে, বেশ শিক্ষিত, তার ওপর চাকরিতেও এরকম ভাল কেঁরিয়ান। আমার মতো মেয়ে ওর চোখেই পড়বার কথা নয়। কিন্তু...

ছুটি শান্ত-চোখের দৃষ্টি আরও অলস করে দিয়ে, সুন্দর একটি গল্প শোনবার আনন্দে যেন কৃতার্থ হয়ে বসে থাকে হিমু দত্ত। নস্তির ডিবে ঠুকতেও ভুলে যায়।

যুধিকা—কিন্তু ভালবাসায় সাত খুন মাপ হয়। আমারও সেই সৌভাগ্য হয়েছে হিমাদ্রি। নরেন আমাকে বিয়ে করবার আশায় রয়েছে।

যুধিকার গল্পটা বোধহয় নিজের থেকেই ধামতো না, যদি জগদীশপুরেতে এতগুলি ভদ্রলোক এবং তাঁদের সঙ্গে একটি নববর ও একটি নববধু এই কামরাতে না উঠতো।

মধুপুরেতে গাড়ি বদল করতে অনেকখানি সময় ছড়োছড়ি আর ছুটোছুটি করে পার হয়ে গেল। পাটনার ট্রেনে উঠে সীটের এক কোণে হেলান দিয়ে পা ছড়িয়ে, বসে উপস্থান পড়তে পড়তে অনেক রাত করে

দেবার পরও যখন যুধিকার চোখে ঘুমের আবেশ দেখা দিল না, তখন ডাক দেয় যুধিকা—হিমাঙ্গি !

সামনের সীট থেকে উঠে এসে হিমাঙ্গি বলে—বিছানাটা পেতে দিই ।

যুধিকা—হ্যাঁ ।

বিছানা পেতে দেয় হিমু ।

যুধিকা বলে—নরেন আমার উপর মাঝে মাঝে রাগ করে মনে হয় ।

হিমু—তুমি কি এখনও জেগে বসে থাকবে ?

যুধিকা—আঃ, হ্যাঁ, তুমি একটু জেগে থাক না কেন ? একটু সরে বসে হিমুকে পাশে বসবার জগু জায়গা করে দেয় যুধিকা ।

হিমুর বসবার রকম দেখে আবার বিরক্ত হয়ে বলে যুধিকা—এ-গল্প চোঁচিয়ে বলা যায় না, এটুকুও বুঝতে পার না কেন ? আর একটু কাছে সরে এসো ।

উপস্থাসটাকে হাতে তুলে নিয়ে হিমাঙ্গির কোলের উপর ছুঁড়ে ফেলে দিয়ে যুধিকা হেসে গুঠে—এটাতে ধানাই পানাই ক'রে কত কিছুই না বোঝাবার চেষ্টা করা হয়েছে ! ছাই হয়েছে । ওসবের চেয়ে অনেক অনেক মিষ্টি ব্যাপার আমার আর নরেনের মধ্যে হয়ে গিয়েছে । নরেনের সঙ্গে একবার আমার তর্ক হয়েছিল, কে বেশি ভালবাসে । আমি জোর করে বলেছিলাম, আমি বেশি ভালবাসি । হেরে গিয়েছিল নরেন, শেষে আমার কথাটাকেই সত্য বলে স্বীকার করতে বাধ্য হয়েছিল ।

একটা স্টেশনে ট্রেনটা থেমেছে । স্টেশনে অন্ধকার বেশি, আলো কম, এবং মানুষের গলার আওয়াজের চেয়ে ঝিঁঝিঁর ডাকের জোর বেশি । জানালা দিয়ে মুখ বাড়িয়ে যুধিকা বলে—এটা বোধহয় সেই স্টেশন, যেখানে চা আনবার নাম ক'রে তুমি পালিয়ে গিয়েছিলে !

হিমু—তার মানে ?

যুধিকা—আমার তাই মনে হয়েছিল । যাকগে,....নরেন এবার দেড় মাসের ছুটি নিয়েছে কেন বলতে পার ?

—না, এটা সেই স্টেশনটা নয়। নশ্বর ডিবে ঠুকে এক টিপ
নশ্বর বার করে হিমু। যুদ্ধিকার প্রশ্নের উত্তর দিতে বোধহয় ভুলে যায়।

যুদ্ধিকা বলে—এবার একেবারে তৈরি হয়েই আসছেন বলে মনে
হচ্ছে। বিয়ের শাঁখের শব্দ না শুনে আর ছাড়বেন না। মামী চিঠিতে
যা লিখেছেন, সেটাই ঠিক। মনে হচ্ছে এবার সাজ হলো ধুলোখেলা।

যুদ্ধিকার চোখের তারা ঝকঝক করে। এবং দেখে মনে হয়, হ্যাঁ,
আর ধুলোখেলা নয়, যুদ্ধিকার জীবন এইবার মুক্তোখেলার আশ্বাস
পেয়ে মুগ্ধ হয়ে গিয়েছে। কল্পনায় তারই ছবি দেখেছে যুদ্ধিকা।

যুদ্ধিকা বলে—কে জানে বোম্বাই শহরটা দেখতে কেমন? যেমনই
হোক, নরেনের সঙ্গে যেখানে থাকবো সেখানেই তো আমার স্বর্গ।

বাইরের অন্ধকারের দিকে তাকিয়ে বুঝতে পারা যায় মাঠ জুড়ে
সাদা কাশের বন ছড়িয়ে রয়েছে। খুব জোরে সোঁ সোঁ শব্দ করে ট্রেনটা
বাতাস কাটছে। যুদ্ধিকা বলে—ক'টা বাজলো হিমাদ্রি? তোমার
ঘুম পায়নি?

—তুমি এবার ঘুমিয়ে পড়। বলতে বলতে উঠে দাঁড়ায় হিমাদ্রি,
এবং সামনের সীটের উপর গিয়ে বসে।

পাটনা স্টেশনের প্ল্যাটফর্মে শুধু মামী দাঁড়িয়ে আছেন। যুদ্ধিকার
চেনা মানুষ বলতে আর কেউ নেই। ট্রেন থেকে নেমে মামীর কাছে
এগিয়ে যায় যুদ্ধিকা। কুলির মাথায় যুদ্ধিকার জিনিসপত্র চাপিয়ে দিয়ে
এক দিকে চূপ করে দাঁড়িয়ে থাকে হিমাদ্রি।

মামী বলেন—সেই ছেলেটি আবার এসেছে দেখছি।

যুদ্ধিকা—হ্যাঁ, বলাইবাবু বাতে পঙ্গু হয়ে রয়েছেন।

মামী—ছেলেটি বোধহয় কিছু বলতে চায়।

যুদ্ধিকা—ও হ্যাঁ।

হিমুর কাছে এগিয়ে এসে যুদ্ধিকা হাতের ব্যাগ থেকে টাকা বের
করে।

হিমু বলে—টাকা দয়কার হবে না।

যুধিকা—তার মানে ? তুমি কি গিরিডি ফিরে যাবে না ?

হিমু হাসে—ফিরবো বৈকি ; কিন্তু ট্রেনভাড়ার দরকার নেই ।

যুধিকা—হেঁয়ালি করো না হিমাঙ্গি, স্পষ্ট ক'রে বলো ।

হিমু—আজই ফিরবো । কথা আছে, এখান থেকে লতিকাকে সঙ্গে নিয়ে যেতে হবে । লতিকার বাবা গণেশবাবু বলে দিয়েছেন, গিরিডি ফিরে যাবার খরচ তিনিই দেবেন ।

মামীর কানে হিমুর কথা গুলি পৌঁছেছে । শুনাই প্রসন্ন হয়ে ওঠে মামীর মুখটা । লতিকা গিরিডি চলে যাচ্ছে, তার মানে পাটনাতে থাকবার সাহস আর হচ্ছে না । বুঝে ফেলেছে শীতাংশু ডাক্তার, নরেনকে নেমতন্ন ক'রে লাভ নেই । এতদিনে আক্কেলের উদয় হয়েছে, এবং হার মেনে হতাশ হয়ে নরেনকে উদ্ভ্রান্ত করবার সব মতলব ছাড়তে হয়েছে ।

কোনো সন্দেহ নেই মামীর । নরেন পাটনাতে আসছে জেনেও লতিকা যদি পাটনা থেকে চলে যায়, তবে তার কি অর্থ হতে পারে ? হয় নরেন চিঠি দিয়ে, নয় নরেনের মা নিজেই শীতাংশুকে ডেকে নিয়ে, লতিকার কটো ফিরিয়ে দিয়ে স্পষ্ট করে বলে দিয়েছেন, না, আমাদের রাজী হওয়া সম্ভব নয় ।

এত তাড়াতাড়ি এরকম একটা সুসংবাদ শুনতে পাবেন, আশা করতে পারেননি মামী । আগে শুনতে পেলে যুধিকাকে এত তাড়াতাড়ি গিরিডি থেকে পাটনাতে চলে আসবার জন্য চিঠি দিতেন না ।

শুনতে পেলেন মামী, ছেলেটিরই মুখের দিকে তাকিয়ে যুধিকা যেন আশ্চর্য হয়ে জিজ্ঞাসা করছে—লতিকার এখন গিরিডি যাবার দরকার হলো কেন ?

একটা আকাট আহাম্মক মেয়ে ! কাকে কি জিজ্ঞাসা করতে হয়, তাও বুঝতে শিখলো না, অথচ বয়স তো তেইশ পার হয়ে প্রায় চব্বিশে গিয়ে পৌঁছেছে । এ-কথা এই গোবেচারী ছেলেটিকে জিজ্ঞাসা ক'রে লাভ কি ? তা ছাড়া, এত আশ্চর্যই বা হয় কেন যুধিকা ? লতিকা কেন গিরিডি চলে যাচ্ছে, এটুকু আন্দাজ করবার মতো বুদ্ধি নেই কি

মেয়েটার ? খবরটা শুনে গুরই তো এখন সবচেয়ে বেশি হেসে ওঠা উচিত ।

কি-যেন বলতে গিয়ে ব্যস্তভাবে যুধিকা আর হিমুর প্রায় কাছাকাছি এগিয়ে গিয়েই থমকে দাঁড়ান মামী । যুধিকার মুখের দিকে চোখ পড়তেই আশ্চর্য হয়ে যান । এ আবার কি রকমের কাণ্ড ? মেয়েটার চোখ ছুঁটো জ্বলছে যেন ; ছেলেটার মুখের দিকে যেন বিষদৃষ্টি হেনে একেবারে স্তব্ধ হয়ে দাঁড়িয়ে আছে যুধিকা । ছেলেটি যেন ভয়ানক একটা বিশ্বাসঘাতক, একটা নিষ্ঠুর অপরাধী, যুধিকার জীবনের একটা সুখ-স্বপ্নকে যেন আচমকা আঘাত দিয়ে দিয়ে ধুলোর উপর লুটিয়ে মিথ্যে করে দিয়ে...কি যেন ঐ ছেলেটার নাম, হ্যাঁ, হিমাঙ্গি ।

মামীর চোখে একটা সন্দেহের বেদনা ধমধম করে । কে জানে কি ব্যাপার ? যেখানে কোনো সমস্যা আশঙ্কা করতে পারেনি কেউ, সেখানে সত্যিই বিস্তীর্ণ একটা সমস্যা কঠিন হয়ে ওঠেনি তো ? যুধিকার বোকা মনটা কোনো ভুল করে কেলেনি তো ? নইলে এত বড়ো একটা মেয়ের পক্ষে এত বড়ো একটা ছেলের মুখের দিকে ওভাবে তাকিয়ে থাকবার আর কি অর্থ হতে পারে ?

মামী যে এত কাছে এসে দাঁড়িয়ে আছে, যেন দেখতেই পাচ্ছে না যুধিকা । হিমুর মুখের দিকে জ্বালাভরা ছুঁটো অপলক চোখ তুলে যুধিকা বলে—তোমার লজ্জা করছে না ?

হিমু হয়তো যুধিকার প্রশ্নের উত্তর দিত, কিন্তু মামীকে কাছে দাঁড়িয়ে থাকতে দেখে বিব্রত বোধ করে হিমু ; এবং স্পষ্ট করে উত্তর দিতে পারে না বলেই অস্পষ্ট স্বরের একটা প্রতিবাদ হিমুর ঠোঁটের কাঁপুনিতে শুধু বিড়বিড় করে ।

যুধিকা বলে—তুমি এখন গিরিডি ফিরে যাও হিমাঙ্গি । লতিকাকে নিয়ে যেতে পারবে না ।

হিমু হাসতে চেষ্টা করে—সে কি কথা ? আমি যে গণেশবাবুকে কথা দিয়ে এসেছি ।

যুধিকা—কথা দিতে লজ্জা করেনি একটুও ?

অন্যদিকে মুখ ফিরিয়ে নিলেন মামী ; মামীর কপালের রেখা কুঁচকে
ওঠে ।

যুথিকা বলে—কি ? কথা বলছো না কেন হিমাজি ?

হিমু—কি জানতে চাইছো, বোলো ।

যুথিকা—তুমি লতিকাকে গিরিডি নিয়ে যাবে না, আমাকে স্পষ্ট ক'রে
কথা দাও ।

হিমু—অসম্ভব ।

যুথিকা—কি ?

হিমু—লতিকাকে গিরিডি নিয়ে যেতেই হবে । মানুষকে কথা দিয়ে
মিছিমিছি কথার খেলাপ করতে পারবো না ।

প্ল্যাটফর্মের ভিড় শত শত মানুষের কোলাহলে মুখর হয়ে রয়েছে
পৃথিবীর একটা ব্যবস্থা ; শুধু চলে যাবার টানে অস্থির ও চঞ্চল একটা
সংসারের একটি টুকরো । এখানে ধমকে দাঁড়িয়ে থাকবার জন্ম কেউ
আসে না । কিন্তু চারু ঘোষের মেয়ে যুথিকা ঘোষ সত্যিই যেন
চিরকালের মতো ধমকে দাঁড়িয়ে পড়েছে এবং সামনে বা পিছনে কোনো
দিকে এগিয়ে যাবার সাধ্য নেই ।

টেঁচিয়ে ওঠে যুথিকা—তাহলে আমিও গিরিডি ফিরে যাব । আমিও
তোমাদের সঙ্গে যাব ।

মামী ডাকেন—যুথিকা ?

চমকে ওঠে যুথিকা ! আর, মামীকে কাছে দেখতে পেয়েই
আতঙ্কিতের মতো ফ্যাল ফ্যাল ক'রে তাকিয়ে থাকে, তারপরেই হাসতে
চেষ্টা করে ।

মামী বলেন—অনেকক্ষণ হয়ে গিয়েছে, কুলিটা বিরক্ত হয়ে উঠেছে-
চলো এবার ।

যুথিকা হাসে—হ্যাঁ, যাবই তো । এখানে চিরকাল দাঁড়িয়ে থাকবো
কে বলেছে ?

মামী—তোমার কাজ শেষ হয়েছে তো ?

যুথিকা—কাজ ? কিসের কাজ ?

মামী—ওকে যা বলবার ছিল, বলা হয়েছে ?

যুধিকা—ভ্রুকুটি করে মুখ ফিরিয়ে নিয়ে বলে—ওকে আবার কি বলবার ছিল ? কিছু না, চলো ।

পাটনাতে এসেছে নরেন ; এবং লতিকাও পাটনাতে নেই সুতরাং যুধিকার মনের ভাবনায় এক ফৌঁটা উদ্বেগও নেই । তা ছাড়া, মামীও খোঁজ নিয়ে জেনেছেন, এবার আর শীতাংশু ডাক্তার নরেনকে চা-এর নেমস্তন্ন করবার চেষ্টা করেনি । এবং একথাও সত্যি, নরেনের মা লতিকার ফটো কেবল পাঠিয়ে দিয়েছেন, এবং সেই সঙ্গে যে চিঠিটা দিয়েছেন, তাতে শুধু ফটো কেবল পাঠালাম ছাড়া আর কোনো কথা লেখেন নি । শীতাংশু ডাক্তারের পাশের বাড়ির সুব্রতবাবুর স্ত্রী একদিন বেড়াতে এসে মামীকে এই খবরও জানিয়ে দিয়ে গিয়েছেন ।

গর্দানিবাগের মাঠের সেই পলাশে এখন আর ফোটা ফুলের শোভা রক্তময় হয়ে হাসে না । নতুন বর্ষার জলে মাঠের ঘাস সবুজ হয়ে উঠেছে । এই মাঠের সবুজের উপর নরেনের পাশে পাশে হেঁটে প্রায় রোজই সকালে আর সন্ধ্যায় বেড়িয়েছে যুধিকা । নরেনকে আর নিমন্ত্রণ করে ডাকতে হয় না । নিজের প্রাণের আবেগে নরেন নিজেই রোজ এসে যুধিকার কাছে দাঁড়ায় । চা-এর জন্তু নিজেই তাগিদ দেয় নরেন । আর মাঝে মাঝে, মামী কিংবা অন্য কেউ কাছে না থাকলে, যুধিকার কানের কাছে নরেনই হেসে হেসে ফিসফিস করে—তোমাকেই কনগ্যাচুলেট করতে হয় ।

—কেন ?

—তোমার ভালবাসারই জয় হলো ।

—তা হলো বৈকি !

—অদ্ভুত ?

—কি ?

—তোমার ভালবাসার জেদ ।

—হ্যাঁ, অদ্ভুত জেদ বৈকি ! চার বছর ধরে বলতে গেলে তপস্বী করতে হয়েছে ।

নরেন—হাসে—তপস্কার সিদ্ধিও হয়েছে।

নরেনের হুঁচোখের গর্বময় উৎফুল্লতার দিকে তাকিয়ে যুধিকা বলে—
—হ্যাঁ, চার বছর অপেক্ষায় থেকে থেকে তারপর যখন তুমি আমাকেই
বিয়ে করতে রাজি হয়েছেো, তখন স্বীকার করতেই হয়।

—কি ?

সিদ্ধিলাভ করেছি। আমার ভালবাসাই জয়ী হয়েছে।

চার পাতা চিঠি লিখে কণিকা মামী গিরিডির উদাসীনের সব উদ্বেগ
দূর করে দিয়েছেন। রাজি হয়েছে নরেন। বিয়ের দিন ঠিক করবার
কথাও বলেছে। নরেনের মা বলেছেন, পয়লা অজ্ঞান খুব ভালো
শুভদিন।

মামীর প্রাণটাও যেন হাঁপ ছেড়ে অনুভব করে তাঁরও একটা
জেদের তপস্কা সকল হয়েছে। নরেনের মতো ছেলের সঙ্গে যুধিকার
মতো মেয়ে বিয়ে ঘটিয়ে দেওয়া চারটিখানি বুদ্ধি ও চেষ্টায় সম্ভব হয় না।
গিরিডি থেকে যুধিকার মা তিন পাতা চিঠি লিখে মামিমাকেও
অভিনন্দন জানিয়েছেন, তোমার চেষ্টা আর বুদ্ধির জোরেই মেয়েটার
ভাগ্য প্রসন্ন হতে পেরেছে কণিকা। নরেনের মাকে জানিয়ে দিও,
আমরা পয়লা অজ্ঞানেই রাজি।

মামীর চিন্তায় শুধু একটা অস্বস্তি মাঝে মাঝে ছটফট করে ওঠে।
যুধিকা এত বেশি ঘুমোয় কেন? জেগে থাকে যখন, তখনও যেন
অদ্ভুত একটা কুঁড়েমির জ্বরে গুটিশুটি হয়ে এঘর কিংবা ওঘরের বিছানার
এক কোণে বসে হাই তোলে আর ক্যালক্যাল করে তাকায়। যে-কথা
কোনোদিন যুধিকাকে বলতে হয়নি, সেই কথাই আজকাল বলতে হয়,
একটু ভালো করে সাজ করবার কথা। ভালো করে সাজবার
নিয়মটাই যেন ভুলে গিয়েছে যুধিকা। কিন্তু খুব ভালো করেই জানে
যুধিকা, সন্ধ্যা হবার আগেই নরেন এসে পড়বে। তবু, বিকেল হয়ে
এলেও যুধিকার মনে পড়ে না যে, এইবার তাড়াতাড়ি সেজে নেওয়া
উচিত। মামী মনে করিয়ে দেন, তবে বুঝতে পারে, এবং তারপরেই
বাস্তভাবে সাত-তাড়াতাড়ি একটা এলোমেলো সাজ করে। আর,

অরুণকে কোলে নিয়ে যত আজ-বাজে কথা বলতে থাকে। অরুণও টানা-ছেঁড়া করে যুধিকার সাজ আর খোঁপাটাকে আরও এলোমেলো করে দেয়।

নরেনের সঙ্গে বেড়িয়ে, বড়ো জোর এক মাইল পথ হেঁটে, আবার যখন ঘরে ফিরে আসে যুধিকা, তখন দেখে মনে হয়, যেন ছ'দিন না খেয়ে একশো মাইল হেঁটে একেবারে ক্লান্ত ও আধমরা হয়ে গিয়েছে যুধিকার চেহারাটা। এ আবার কোন্ ধরনের মানসিক ব্যাধি? মামীর চোখ দুটো আবার সন্দিক্ত হয়ে ওঠে।

শুধু মামী কেন, যুধিকাও যে যুধিকাকে সন্দেহ করতে শুরু করেছে। ধুলোখেলার পালা সমাপ্ত হয়ে গিয়েছে, হাতের কাছে মুক্তা এসে গিয়েছে, তবে আবার জীবনের অহঙ্কারটা এমন করে মুসড়ে পড়ে কেন? জিত হলো, তবুও হেরে গিয়েছি বলে একটা সন্দেহের অস্বস্তি মনের ভিতরে কাঁটার মতো খচখচ করে কেন?

কে হারিয়ে দিল? লতিকা? ভাবতে গিয়ে কপালের ছ'পাশে একটা জ্বালার কামড় জ্বলতে থাকে যেন। মামী বুঝবেন কি ছাই? মামী কল্পনাও করতে পারেন না, পাটনা থেকে লতিকার গিরিডি যাবার ট্রেনযাত্রা যে লতিকার জীবনের একটা জয়যাত্রা। হিমাদ্রি চা এনে দিয়েছে, সেই চা হেসে হেসে খেয়েছে লতিকা। লতিকার ঘুম পেয়েছে, আর ব্যস্ত হয়ে বাস্কের উপর থেকে বেডিং নামিয়ে লতিকার জন্ম বিছানা পেতে দিয়েছে হিমাদ্রি। লতিকা চালাক; কি ভয়ানক চালাক, সেটা মামীর ধারণাতেই নেই। নিরালা কামরার সঁটের উপর পাতা বিছানায় টান হয়ে শুয়েছে লতিকা, আর হিমাদ্রিকে মাথার কাছে বসিয়ে রেখে সারা রাত গল্প করেছে।

আর হিমাদ্রি? হ্যাঁ! লতিকাকে দোষ দিয়ে লাভ কি? হিমাদ্রিই যে যত নষ্টের মূল। কি ভয়ানক চালাক বোকা! চট্ট করে কত তাড়াতাড়ি জীবনের ট্রেনযাত্রার এক নতুন বাস্কবী জোগাড় করে নিল। পয়লা অজ্ঞানের পর আর ক'টা দিনই বা গিরিডি ও পাটনার মুখ দেখবার সুযোগ পাওয়া যাবে? বড়ো জোর দশটা দিন। নরেনের

ছুটি ফুরিয়ে যাবার আগেই নরেনের সঙ্গে যুথিকাকে বোম্বাই চলে যেতে হবে। তারপর? তারপর আর কি? লতিকা আর হিমাদ্রি অনন্তকাল ধরে পাটনা থেকে গিরিডি আর গিরিডি থেকে পাটনা যাওয়া-আসা করে চমৎকার ট্রেনযাত্রার পুণ্যে ধন্য হয়ে থাকবে।

গিরিডি থেকে চিঠি আসে। কিন্তু সে চিঠিতে বিশ্বের যত খবর থাকুক না কেন, শুধু একটি খবরের কোনো উল্লেখ থাকে না। হিমাদ্রি এখন কোথায়? লতিকা সত্যিই গিরিডি ফিরেছে তো? ফিরেছে নিশ্চয়। যাবে আর কোথায়? পাটনা ছেড়ে দিয়ে এখন গিরিডিতে গিয়ে শক্ত হয়ে দাঁড়িয়েছে লতিকা। এবং আশ্চর্য নয়, গণেশবাবুর বাড়িতে রোজ সন্ধ্যায় চা খেতেও আসছে হিমাদ্রি।

পাটনা নয়, গিরিডিই যে যুথিকার জীবনের উদ্বেগ হয়ে উঠলো। কোনোদিন কল্পনাতেও মনে হ করতে পারেনি, কোনো মুহূর্তেও একটু সাবধান হয়ে কল্পনা করতে পারেনি যুথিকা, লতিকার মতো মেয়ে যুথিকাকে এভাবে মিথ্যা জয়ের কাছে ফেলে রেখে দিয়ে নিজে একটা খাঁটি জয়ের কাছে চলে যেতে পারে। পয়লা অত্মান আসতে দেরি আছে। তবে এখন আর পাটনাতে থাকবারই বা কি দরকার? এখন গিরিডি চলে গেলেই তো হয়।

গিরিডির চিঠি আসতেও আর বেশি দেরি হয়নি। মা লিখেছেন, যুথিকার এখন গিরিডি চলে আসাই উচিত মনে করি। যুথিকাকে আমবার জন্তু বলাইবাবুকে পাঠাবার ব্যবস্থা করছি; তুমি একেবারে বরযাত্রী হয়েই এসো। বর আনতে এখান থেকে যাবার লোক নেই। তোমার আর অরুনের বাবা ছ'জনের ওপর বর আনবার সব দায়িত্ব রইল।

গিরিডির চিঠিটা যুথিকাকেও পড়তে দিলেন মামী। চিঠি পড়েই কিছুক্ষণ গম্ভীর হয়ে থাকে যুথিকা, তারপরেই বিরক্ত হয়ে টেঁচিয়ে ওঠে।
—বলাইবাবুকে পাঠিয়ে লাভ কি? বাতে পঙ্গু একটা মানুষ।

মামী—তবে কি একাই যেতে চাও?

যুথিকা—একা যাব কেন? হিমাদ্রি কি নেই?

অপলক চোখ তুলে যুধিকার মুখের দিকে তাকিয়ে কি-যেন ভাবেন মামী, মামীর হুঁচোখের মধ্যে যেন 'একট' ভয়ের ছায়া ছমছম করে! আন্তে আন্তে এবং ভয়ে ভয়ে বলেন মামী—বারবার হিমাদ্রিকে বিরক্ত-করাটা ভালো দেখায় না।

যুধিকা চোঁচিয়ে ওঠে।—হিমাদ্রি যে বিরক্ত হয় না, সেটা মা খুব ভালোই জানে।

মামী—আমার মনে হয়, হিমাদ্রিকে না পাঠালেই ভালো হয়।

যুধিকা—বেশ। তাহলে বলাইবাবুকেও আসতে বারণ করে দাও।

মামী—তার মানে?

যুধিকা হেসে ফেলে—আমি একাই গিরিডি যাব।

তুলে তুলে হেঁটে ঘরের ভিতরে ঢোকে ছোটো অরুণ। অরুণের হাতে একটা চিঠি। অরুণ বলে—একটা লোক।

চিঠি খুলে হুঁলাইন পড়তেই আশ্চর্য হয়ে বান মামী, এবং বাইরের বারান্দার দিকে উঁকি দিয়ে তাকান।

যুধিকা—কি ব্যাপার?

মামী বলেন—হিমাদ্রি এসেছে।

ঝক ক'রে হেসে ওঠে যুধিকার গোখ। শাড়ির আঁচলটাকে টেনে গায়ে জড়িয়ে বাস্তভাবে দাঁড়ায় যুধিকা।—তার মানে?

মামী বলেন—কুশুমদি লিখেছেন, বলাইবাবুর পক্ষে যাওয়া অসম্ভব। হিমুকেই পাঠালাম।

মামীর হুঁচিহ্নিত মুখের দিকে তাকিয়ে মামী বলেন—না, আমার মনে হয় সে রকম কোনো ভয়ের কারণ নেই।

মামী—তবু, আমি কিন্তু নিশ্চিত হতে পারছি না।

মামী—ভদ্রলোকের মেয়ে মাথা খারাপ করে বাজে লোকের সঙ্গে উধাও হয়ে গিয়েছে, এরকম কেস অবশ্য মাঝে মাঝে দেখা যায়। কিন্তু বেচারী যুধিকাকে এরকম মাথা খারাপ মেয়ে মনে করতে পারছি না।

মামী—কিন্তু হিমাদ্রি নামে এই ছেলেটার মনে কি আছে, সেটা কি ক'রে বুঝবে বলা?

মামা কিছুক্ষণ ভাবেন ! তারপর বলেন—আচ্ছা, একটা ব্যবস্থা ক'রে দিচ্ছি।

মামী—কি ব্যবস্থা ?

মামা—আমি এখনি গিয়ে ভোলাকে...রেলওয়ে পুলিশের ডি.. এস-পি ভোলাকে চেন তো ?

মামী—খুব চিনি।

মামা—ভোলাকে বলে দিচ্ছি, যেন ট্রেনের গার্ডকে প্রাইভেটলি বলে রাখে ভোলা, ওদের ছ'জনের উপর একটু ওয়াচ রাখবার জ্ঞান। আমি চললাম...ওদের তাড়াতাড়ি রওনা করিয়ে দাও।

রওনা হতে আর মাত্র পাঁচ মিনিট দেরি করিয়ে দিলেন মামী, অর্থাৎ টেলিফোনে নরেনকে একটা খবর দিতে যতটুকু সময় লাগলো, তার বেশি নয়। এবং স্টেশনে পৌঁছবার পর খুশি হয়ে দেখলেন মামী, যাদের আসবার কথা ছিল, তারা সবাই এসেছে। মামা এসে প্ল্যাটফর্মে দাঁড়িয়ে আছেন, তার পাশে নরেন। এবং কি আশ্চর্য, শীতাংশু ডাক্তারও এসেছে।

সবচেয়ে বেশি আশ্চর্য, শীতাংশু ডাক্তার হেসে হেসে নরেনের সঙ্গে গল্প করছে ! এমন কি মামাকেও হঠাৎ জিজ্ঞাসা করে কেলে শীতাংশু—পয়লা অস্বানই বোধহয় বিয়ের দিন ঠিক করা হয়েছে ?

মামা গম্ভীর হয়ে বলেন—বোধহয়।

শীতাংশু বলে—বড়ো ভালো হলো।

শীতাংশুর কথা শুনে মামীর মুখটা অপ্রসন্ন হয়ে যায়। কি রকম ঢ় ক'রে শুভেচ্ছা জানাচ্ছে শীতাংশু, যেন ছোটো ভাইটির বিয়ের খবর শুনে আহ্লাদে মজে গিয়েছে। কিন্তু মামীই জানেন, এই শীতাংশুই এই কটা বছর এই বিয়ের সম্ভাবনাকে ভাংচি দিয়ে মিথ্যে ক'রে দেবার জ্ঞান কি চেপ্টাই না ক'রে এসেছে। তবে আবার কিসের আশায়, কোন মতলবের উৎসাহে এখানে এসেছে শীতাংশু ? মামী ডাকেন—এদিকে এসে একটা কথা শুনে যাও নরেন।

শীতাংশুর কপট শুভেচ্ছার স্পর্শ থেকে নরেনকে সরিয়ে নিয়ে গিয়ে

পাটনার প্রচণ্ড গরমের জন্তু দুঃখ করে অনেক কথা বললেন মামী—
কার্তিক শেষ হতে চললো তবু দেখছো গরমের গুমোট ছাড়ছে না।

ট্রেনে উঠবার জন্তু যুধিকার ব্যস্ততা দেখে মনে মনে রাগ করেন
মামী। নরেনের কাছ থেকে অনেকক্ষণ হলো ইচ্ছে করেই সরে গিয়েছেন
মামী। এই তো, এইবার একটা সুযোগ পেলি বোকা মেয়ে। নরেনের
কাছে এসে একবার দাঁড়া। দু'টো কথা বল। কিন্তু কোথা যুধিকা!
কাণ্ডজ্ঞানহীন যুধিকা তখন ট্রেনের কামরার ভিতরে ঢুকে হিমাদ্রির সঙ্গে
কী অদ্ভুত মুখরতা আর হানাহাসি শুরু করে দিয়েছে। কিন্তু মনের
অভিযোগ মনেই চেপে রেখে চুপ করে দাঁড়িয়ে থাকেন মামী।

—আমি কিন্তু জানালার ধারে বসবো হিমাদ্রি। হাত ব্যাগটাকে
সীটের নিচে রেখে দাও হিমাদ্রি।

বড় বেশি ব্যস্ত হয়ে উঠেছে, আর কি বিশ্রী চেষ্টায়ে কথা বলছে
মেয়েটা! যুধিকার কাছে এগিয়ে এসে মামী কিসকিস করে বলেন—
আস্তে কথা বল যুধিকা।

ট্রেন ছাড়লো, এবং যুধিকা যেন এতক্ষণের ব্যস্ততার ভুলের মধ্যে
বিমনা হয়ে থাকা মনটাকে চিনতে পেরে চমকে ওঠে। ভুল হয়েছে,
ভয়ানক বিশ্রী ভুল। নরেনের সঙ্গে সামান্য একটু চোখে চোখে কথা
বলে নিতেও ভুলে গিয়েছে। এই ভুলটুকু শুধরে নেবার জন্তু জানালা
দিয়ে মুখ বাড়িয়ে নরেনের দিকে তাকিয়ে হেসে ওঠে যুধিকা।

হাসিভরা মুখটাকে জানালার কাছ থেকে সরিয়ে নিয়ে আসে
যুধিকা, কারণ প্ল্যাটফর্মের কোনো মুখ আর চেনা যায় না। ঝাপসা
হয়ে গিয়েছে পাটনা স্টেশনের প্ল্যাটফর্ম।

এইবার চোখের কাছে যাকে খুব স্পষ্ট করে দেখতে পায় যুধিকা,
তারই শাস্ত মুখের চেহারাটাকে সহ করতে গিয়ে ছটফট করে ওঠে।

যুধিকা বলে—কেমন আছ হিমাদ্রি?

হিমু হাসে—ভালো আছি।

যুধিকা—লভিকা ভালো আছে?

হিমু—জানি না। ভালো থাকলেই ভালো।

বৃথিকা—খোঁজ রাখ না ?
 হিমু—খোঁজ রাখা আমার অভ্যাস নয় ।
 বৃথিকা—কিন্তু লতিকার তো সে অভ্যাসটি আছে ।
 হিমু—জানি না ।
 বৃথিকা—কেন ? লতিকা খোঁজ করেনি ?
 হিমু—কর খোঁজ ?
 বৃথিকা—তোমার ?
 হিমু—না ।
 বৃথিকা—আশ্চর্যের ব্যাপার ।
 হিমু—কিসের আশ্চর্য !
 বৃথিকা—এত গরজ ক'রে পাটনা থেকে গিরিডি নিয়ে গেলে থাকে,
 তার সঙ্গে সামান্য একটু বন্ধুত্বও হলো না ।
 হিমু—না ।
 বৃথিকা—তোমার দুর্ভাগ্য ।
 হিমু—একটুও না ।
 বৃথিকা—কেন ? লতিকা দেখতে সুন্দর নয় ?
 হিমু—সুন্দর বৈকি !
 বৃথিকা—আমার চেয়েও সুন্দর নিশ্চয় ?
 হিমু—লোকে তো তাই বলে ।
 বৃথিকা—কে বলে ?
 হিমু—তোমার মা বলছিলেন ।
 বৃথিকা—কর কাছে ?
 হিমু—তোমার বাবার কাছে ।
 বৃথিকা—তোমার সামনেই ?
 হিমু—হ্যাঁ ।
 বৃথিকা—আর তুমিও বেশ ছ'কান ভরে কথাটা শুনে নিলে ?
 হিমু—হ্যাঁ, কানে শুনে পাই যখন, তখন না শুনে পারবো কেন ?

যুধিকা—কিন্তু কথাটা এত মনে ক'রে রাখতে বলেছে কে? মনে হচ্ছে, কানের ভিতর দিয়ে একেবারে মরমে পশেছে।

হিমু—না।

যুধিকা—জোর করে না বললে কি হবে?

হিমু—কত কথাই শুনতে পাই, কিন্তু মরমে পশে আর কোথায়?

যুধিকা—মরম নেই তাহলে।

হিমু—হবে।

যুধিকা—আমার তো তাই মনে হয়।

হিমু—বেশ ভালো মন তোমার।

হিমু দত্তের শাস্ত চোখ দুটোও যেন উদাসীনের মেয়ে যুধিকার মুখের দিকে অনর্থক বাচালতায় বিরক্ত হয়ে, এবং একটু তপ্ত হয়ে যুধিকার মুখের দিকে তাকায়। সেই মুহূর্তে ভয় পেয়ে কেঁপে ওঠে হিমু দত্তের চোখ। বিনা দোষের আসামী ফাঁসির হুকুম শুনেও বোধহয় এমন ভয় পাবে না। দেখতে পেয়েছে হিমু, চাক ঘোষের মেয়ের চোখ দুটো জলে ভরে গিয়েছে।

এমন ভয়ানক বিপন্নতা, এতো কঠোর শাস্তি, জীবনে কোনদিন সহ্য করার হুঁজুগ্য হয়নি হিমু দত্তের; এর চেয়ে যুধিকা ঘোষের চোখের সেই সব ভয়ানক অবহেলার আর কৌতূকের হাসিতে যে অনেক বেশি করুণা ছিল।

হিমু বলে—আমাকে মাপ করো যুধিকা, কিন্তু বুঝতে পারছি না, আমার কি অপরাধ হলো।

চোখ দুটোকে এক মুহূর্তের মধ্যেই সামলে নিয়ে শুকনো ক'রে ফেলেছে যুধিকা।

যুধিকা বলে—যাক গে, তুমি কিছু মনে করো না হিমুজি। তোমাকে সত্যিই অপরাধী বলছি না।

হাঁপ ছাড়ে, বৃকের ভিতরের একটা ভয়াতুর বেদনার গুমোট যেন নিঃশ্বাসের জোরে ভেঙে দিয়ে হাঁপ ছাড়ে হিমু। নস্তির ডিবে ঠুকে ঠুকে হাসতে চেষ্টা করে। গিরিজিতে এখন বেশ ঠাণ্ডা পড়েছে।

সকালবেলা রোদ ঠেঁবার পরেও উশীর উপর কুয়াশা একেবারে জমাট হয়ে থাকে।

যূথিকাও হাসে—সত্যি কথা বলবে ?

হিমু—তোমার কি সন্দেহ আছে, আমি সত্যি কথা বলি না ?

যূথিকা—না, তুমি সে বিষয়ে একেবারে খাঁটি গুডবয়। তাই জিজ্ঞাসা করছি।

হিমু—বলো।

যূথিকা—লতিকা তোমাকে আমার মতো বিরক্ত করেনি ?

হিমু—একটুও না।

যূথিকা—চা এনে দাও, বিছানা পেতে দাও, হেন তেন কোনো হুকুমই করেনি ?

হিমু—না। বরং লতিকাই ওসব কাণ্ড করেছে। আমি আপত্তি করেছি, তবুও শোনেনি।

যূথিকার চোখের দৃষ্টি আবার কঠোর হয়ে ওঠে।—তার মানে, লতিকা তোমার খুব সেবাযত্ন করেছে ?

হিমু—একটু বাড়াবাড়ি করেছে বলতে হবে। নিজেই হাঁক দিয়ে চা-গুরালাকে ডেকে এনে আমাকে চা খাইয়েছে। বিছানাটাকেও আমার জন্তু ছেড়ে দিয়ে, নিজে সারারাত জেগে উলের টুপি বুনেছে। একটু বেশি উদ্রতা করেছে লতিকা।

যূথিকা জুকুটি করে মুখ ফেরায়—কিন্তু তাই বলে লতিকা তোমাকে বিয়ে করতে পারে না।

হিমু—আমি লতিকাকে বিয়ে করতে পারি না।

যূথিকা—কেন ?

হিমু—আমার মতো মানুষকে লতিকার বিয়ে করা উচিত নয় বলে।

যূথিকা—নিজেকে কি তুমি এতই ছোটো মনে করো।

হিমু—একটুও ছোটো মনে করি না।

যূথিকা—তবে ?

হিমু—লোকে তো ছোটো মনে করে।

যুথিকা—আমিও মনে করি কি ?

হিমু—তোমার মন জানে ।

আবার হিমু দন্তের ছুঁচোখের দৃষ্টি অত্যন্ত হয়ে, আর যুথিকার এই অকারণ বাচালতার উপর বেশ কুপিত হয়ে যুথিকার মুখের উপর পড়তেই চমকে ওঠে, আর ভয় পায় হিমু । যুথিকা ঘোষের চোখের পাতা আবার ভিজে ভারি হয়ে গিয়েছে ।

হিমু দত্ত ভয়ে ভয়ে অঙ্কুরোধ করে ।—গল্প করবার এত জিনিষ থাকতে তুমি আজ কেন মিছিমিছি এসব কথা তুলে ট্রেনযাত্রার আনন্দটা মাটি করছো যুথিকা ।

হিমুর কথার কোনো উত্তর না দিয়ে হঠাৎ ব্যস্তভাবে উঠে দাঁড়ায় যুথিকা । নিজেই হাত বাড়িয়ে সীটের তলা থেকে একটা ছোটো বাস্কেট বের করে । বাস্কেট খুলে খাবারের প্যাকেট ও একটা ডিস বের করে । আর ডিসের উপর খাবার সাজিয়ে দিয়েই বলে—খাও হিমাদ্রি ।

হিমাদ্রি অপ্রস্তুতের মতো বলে—একি ? তোমার খাবার কোথায় ?
যুথিকা হাসে—এই তো । একই ডিসে দু'জনে খেতে পারা যায় না কি ?

সত্যিই হাত বাড়িয়ে ডিসের উপর সন্দেশ ভাঙে যুথিকা । এবং খেতেও কোনো দ্বিধা করে না ।

খাবার খেতে গিয়ে হেসে ফেলে হিমু—একটা কাণ্ডই করলে তুমি !

যুথিকা মুখ টিপে হাসে—কেন করলাম, বুঝতে পারলে কিছু ?

হিমু—না ।

যুথিকা—লতিকাকে হারিয়ে দিলাম । কেমন ? ঠিক কিনা ?
লতিকা নিশ্চয় এতটা করতে পারেনি ?

—না । কথাটাকে কেমন উদাসভাবে, যেন একটা দীর্ঘশ্বাসের সঙ্গে মিশিয়ে দিয়ে চুপ করে খাবার খেতে খেতে হিমু আবার আনমনার মতো হঠাৎ বলে ওঠে ।—এই তো আমাদের শেষ ট্রেন-যাত্রা !

—অ্যা, কি বললে ? হিমু দন্তের মুখের দিকে তাকাতে গিয়ে যেন

একেবারে ক্লান্ত হয়ে ঢুলে পড়ে যুধিকা ঘোষের চোখের চাহনি। শেষ ট্রেন-যাত্রা? তার মানে কি? হিমাজির সঙ্গিনী হয়ে একই ট্রেনে পাটনা থেকে গিরিডি আসা-যাওয়ার পালা চিরকাল চলতে থাকবে, এইরকম একটা জীবন কি সত্যিই কল্পনায় কামনা করে রেখেছিল যুধিকা? নইলে এত আশ্চর্য হয়ে যায় কেন যুধিকা? এবং হিমুর এত সহজ ও সরল কথাটা বুঝতে এত দেরি করে কেন?

বুঝতে দেরি হয়নি যুধিকার। চোখের সামনে একটা শূন্যতার দিকে তাকিয়ে বুঝতে পারে, হ্যাঁ, হিমাজির সঙ্গে এই শেষ ট্রেন-যাত্রা! ধুলোখেলার বন্ধুত্বের এই শেষ। বেশ হলো, খুব তাড়াতাড়ি ফুরিয়ে গেল।

যুধিকা বলে—খবরটা তাহলে তুমিও শুনেছ হিমাজি?

হিমু—কিসের খবর?

যুধিকা—আমার বিয়ের।

হিমু—হ্যাঁ, সেই জন্মেই তো বললাম।

যুধিকা—কি?

হিমু—এই আমাদের শেষ ট্রেন-যাত্রা। তাই মিছে আর তর্ক-টর্ক করে কেন শেষ দিনের আনন্দটা নষ্ট করো?

যুধিকা—আনন্দ?

হিমু—আনন্দ বৈকি। তুমি যা চেয়েছিলে, তাই পেলে, এর চেয়ে আনন্দের বিষয় আর কি হতে পারে?

যুধিকা—সত্যি করে বলো হিমাজি। শুনে তোমার খুব আনন্দ হচ্ছে।

হিমু—হ্যাঁ।

যুধিকা—আনন্দের মধ্যে কি এতটুকু...

হিমু—কি?

যুধিকা—কষ্ট হচ্ছে না।

চমকে মুখ ফিরিয়ে নেয় হিমু দত্ত। নইলে হিমুর জীবনের একটা ছঃসহ বেদনার নিঃশ্বাস বোধ হয় এখনই চারু ঘোষের মেয়ের উপর ছড়িয়ে

পড়বে, আর ধরা পড়ে যাবে হিমু! মাথা হেঁট করে, চোখ-মুখ একেবারে বিবর্ণ করে আর ধরা পড়ে যাবে হিমু!

হিমুর মুখের দিকে তাকিয়ে জোরে একটা নিশ্বাস ছেড়ে যুধিকা হাসে। তোমার উপর আমার আর রাগ নেই হিমাঙ্গি।

হিমু—কেন বলো তো?

যুধিকা—লতিকার কাছে হার মানতে হলো না। আমারই জিত হয়েছে।

ট্রেনটা ধেমেছে। খুব আলোয় ভরা জমজমাট একটা স্টেশন। যেমন লোকের ভিড়, তেমনিই কোলাহল। ট্রেনের কামরার একই জানালার ভিতর দিয়ে পাশাপাশি দু'টি মুখ উঁকি দিয়ে বেন চঞ্চলতা আর মুখরতার একটা আলোকিত উৎসবের মতো একটা দৃশ্যকে দেখতে থাকে। যেন চিরকালের বন্ধু ও বান্ধবীর দু'টি হর্ষোৎফুল্ল মুখ। এবং দু'জনেই জানে না, কখন কোন্ মায়ার আবেশে দু'জনের দুটি হাতের ছোঁয়াছুঁয়ি মুঠোবাঁধা হয়ে এক হয়ে গিয়েছে।

ট্রেনটা ছেড়ে দেয়। যুধিকা বলে—আমি সত্যিই কিছু বুঝে উঠতে পারছি না হিমাঙ্গি।

হিমু—কি?

যুধিকা—সত্যিই কি সোনা কেলে দিয়ে আঁচলে গেরো দিলাম।

হিমু—তার মানে?

যুধিকা—মানে জিজ্ঞাসা করো না হিমাঙ্গি। বুঝতে না পার যদি, তবে চূপ করে থাকো।

চূপ করে হিমাঙ্গি। যুধিকা হাঁপাতে হাঁপাতে বলে—বড়ো ক্লান্ত লাগছে শরীরটা, বুকের ভিতরেও যে হাঁপ ধরছে হিমাঙ্গি; আমি এভাবেই জানালায় মাথা রেখে ঘুমিয়ে নিই, কেমন?

হিমু—নিশ্চয়, তুমি চূপ করে ঘুমোও।

যুধিকা—তুমি সরে যেও না কিন্তু।

হিমু—না, কথখনো না।

কিন্তু ঘুমোতে পারে না যুধিকা। ঘুমটাই বেন থেকে থেকে

ক্ষুঁপিয়ে ওঠে, আর হিমু দত্তের হাতটাকে আরও শক্ত করে খিমচে ধরে
রাখে যুধিকা ।

সামনের সীটের এক ভদ্রলোক বলেন—ওঁর কোনো অসুখ আছে
বলে মনে হচ্ছে ।

হিমু বলে—না । হঠাৎ কাহিল হয়ে পড়েছেন ।

ভদ্রলোক আশ্চর্য করেন—তাইতো বড়ো ছুঃখের বিষয় হলো !
আপনিও বড়ো নার্ভাস হয়েছেন বলে মনে হচ্ছে ।

ভদ্রলোকের কথায় জবাব না দিলেও হিমু বোধহয় নিজের মুখটাকে
কল্পনায় দেখতে পার । যেন একটা ক্ষেপা হাওয়ার মাতামাতির মাঝ-
খানে, রাতের নদীর বুকের উপর ভাঙা নৌকাতে দাঁড়িয়ে পূর্ণিমার
চাঁদের শোভা দেখছে হিমু দত্ত । এই নৌকা ডুবে যাবে, অথই জলে
তলিয়ে যেতে হবে. সবই জানে হিমু ; কিন্তু তবু পূর্ণিমার চাঁদ দেখবার
লোভ যেন ছাড়তে পারছে না । হাসিটা কেঁদে ওঠেনি, হিমু দত্তের
জীবনের কান্নাটাই যেন ওর মুখের ওপর হেসে রয়েছে ।

হিমু দত্তের বুকের কত কাছে চারু ঘোষের মেয়ের মাথাটা ! হাতের
উপর কপাল নামিয়ে দিয়ে ঘুমিয়ে পড়েছে যুধিকা । যুধিকার খোঁপার
সুগন্ধও হিমু দত্তের নাকের কত কাছে মাতামাতি করছে !

হঠাৎ বাইরে থেকে গুঁড়ো বৃষ্টির একটা ঝাপটা এসে যুধিকার
মাথাটাকে ভিজিয়ে দেয় । রুমাল দিয়ে যুধিকার মাথা মুছে দিতে হিমু
দত্তের হাতটা আজ আর কোনো লজ্জায়, আর কোনো ভয়ে কাঁপে না ।

মুখ তোলে যুধিকা—আর একটা কথা জিজ্ঞাসা করছি ।

হিমাঙ্গি—বলো ।

যুধিকা—দরকার হলে তুমি কি আমাকে বোস্বাই থেকে গিরিডিতে
আনতে পারবে না ।

হিমাঙ্গি—দরকার কেন হবে ?

যুধিকা—আমি বলছি দরকার হবে ।

—না । দরকার হলেও না ।

যুধিকা—ঠিকই ভেবেছিলাম আমি, তুমি একথা বলবে। তুমি ভয়ানক চালাক।

হিমু—তোমার বোকামির জন্মই চালাক হতে হচ্ছে।

যুধিকা আবার জানালার কাঠের উপর হাত রেখে আর মাথা পেতে ঘুমোতে চেষ্টা করে। তন্দ্রাটা মাঝে মাঝে নিবিড় হয়ে ওঠে ঠিকই কিন্তু অদ্ভুত কতকগুলি ঠাট্টার ভাষা যেন মাথার ভিতরে একঘেয়ে সুরে বাজতে থাকে। পাটনাতে মাসীর সঙ্গে একবার হীরলালবাবুর বাড়িতে কীর্তন শুনতে গিয়ে যে গানের শ্রাকামি সহ্য করতে না পেরে দু-মিনিট পরেই বাড়ি ফিরে গিয়েছিল যুধিকা, সেই গানের ভাষা যুধিকার এই ক্লান্ত মাথার ভিতরে প্রচণ্ড উৎপাতের শব্দের মতো বেজে চলেছে। পীরিতিক রীতি শুন বরনারী!

আজ যুধিকাকে বাগে পেয়ে সেদিনের গানটা যেন যুধিকার অহঙ্কারের উপর প্রতিশোধ তুলছে। পীরিতের রীতিতে ভুল হলে কি দশা হয়, সেটাও ইনিয়ে বিনিয়ে শুনিয়ে দিয়েছিল গানটা। তুহারি ভরম কান্দে, তুহারি করম কান্দে। বাঃ চমৎকার।

চান্দ কিরণ ছোড়ি, দাবানল পরশিলি। অবকাহে ফুকারে হতাশা।
কিসের ছাই হতাশা? এত ভয় করবার কি আছে?

ধড়কড় করে জেগে আর মুখ তুলে হিমুর কানের কাছে যেন স্বপ্নের ঘোরে একটা প্রলাপ ফিসফিস করে যুধিকা—আমি যদি বোম্বাই না যাই হিমাদ্রি?

হিমু—তার মানে?

যুধিকা—তার মানে নরেনের সঙ্গে যদি আমার বিয়ে না হয়?

—ছিঃ, মাথা খারাপের আর কিছু বাকি নেই তোমার? রক্ষস্বরে প্রায় ধমকের মতো একটা ভঙ্গী করে উত্তর দেয় হিমু।

হেসে ফেলে যুধিকা—তার মানে আমাকে নিয়ে পালিয়ে যাবার সাহস তোমার নেই।

হিমু—না নেই।

যুধিকা—কেন?

যুধিকার মুখের দিকে কিছুক্ষণ তীব্র তীক্ষ্ণ ও বহুশব্দ একটা দৃষ্টি তুলে তাকিয়ে থেকে হিমু বলে—তোমাকে ভালবাসি বলে।

চমকে ওঠে যুধিকার চোখ আর মুখ। হঠাৎ সূর্যোদয়ের আভা যুমন্ত চোখ আর মুখের উপর ছড়িয়ে পড়লে যে রকম চমক লাগে, সেইরকম চমক। যেন যুধিকার জীবনের একটা আশার স্বপ্নালু আবেশ হঠাৎ আলোকের ছোঁয়া লেগে জ্বলে উঠেছে। হিমুর মুখের দিকে তাকিয়ে থাকে ; হুই চোখে নিবিড় তৃপ্তির স্নিগ্ধতা জ্বল জ্বল করে।

খেমে গেল ট্রেনটা। রাত প্রায় ভোর-ভোর হয়েছে। প্রায় নির্জন স্টেশনের প্ল্যাটফর্মের উপর দিয়ে মচ মচ করে জুতোর শব্দ বাজাতে বাজাতে জানলার কাছে এসে থমকে দাঁড়ালেন ট্রেনের গার্ড।—
আপনাদের কোনো অসুবিধা হচ্ছে না তো ?

হিমু একটু আশ্চর্য হয়ে বলে—না।

চলে গেলেন গার্ড। এবং ট্রেনটাও আবার চলতে শুরু করে।
যুধিকা চোখ মুছে নিয়ে আস্তে আস্তে বলে—তুমি এত স্পষ্ট করে একি কথা বলে ফেললে হিমাঙ্গি ?

যুধিকা—কিন্তু শুধু আমার কাছেই বলতে পারলে। আর কারও কাছে বলবার সাহস আছে কি ?

হিমু—সাহস খুব আছে ; কিন্তু বলবার দরকার হবে না।

যুধিকা—যদি দরকার হয় ?

হিমু—তার মানে ?

যুধিকা—যদি নরেন তোমায় হঠাৎ জিজ্ঞাসা করে বসে, তবে ?
সত্যি কথাটা বলতে পারবে তো ?

হিমু বলে—না।

যুধিকা—এই তোমার সাহস ! এই রকমই সত্যবাদী তুমি !

হিমু—যা ইচ্ছে হয় বলো, আমি তোমার ক্ষতি করতে পারবো না। দরকার হলে হাজারটা মিথ্যে কথা বলে দেবো।

যুধিকা—তাই বলো। পথে এসো এবার।

হিমু—কিন্তু তুমি কি পারবে ?

যুধিকা—কি ?

হিমু—নরেনবাবুর কাছে সত্যি কথা বলে দিতে ?

যুধিকা—কোন সত্যি কথা বলে দিতে ?

উত্তর দেয় না হিমু। যুধিকার কথার জালে জড়িয়ে পড়ে হিমুর মনের সবচেয়ে লোভনীয় একটা লোভ এইবার ধরা পড়ে গিয়েছে। কি জানতে চায় হিমু ?

যুধিকা হাসে—বলো হিমাঙ্গি, কোন সত্যি কথা জানতে চাইছো ?

যুধিকার এই হাসিটা কি চারু ঘোষের মেয়ের মনের সেই শুকনো কৌতূহলের হাসি ? তাই যদি হয়, তবে হিমু দত্তের জীবনের চরম কৌতূহল এই মুহূর্তে হিমু দত্তের বুকের ভিতরে শেষ আর্তনাদ তুলে ফুরিয়ে যাবে। ভালোই হবে। আর দুঃখ করবার, এবং সারা জীবন মনের মধ্যে গোপন রত্নের মতো লুকিয়ে রাখবার কিছু থাকবে না।

যুধিকা বলে—হ্যাঁ হিমাঙ্গি, আমি অনায়াসে নরেনকে বলে দিতে পারি যে, আমি হিমাঙ্গিকে ভালবাসি।

ভালবাসে যুধিকা ! শুধু এইটুকু জানবার সাধ যে হিমুর জীবনের চরম সাধ হয়ে আর স্বপ্ন হয়ে হিমুর বুকের ভিতর জমা হয়েছিল, সে সত্যি ধরা পড়িয়ে দিলো হিমুর চোখ দুটো। ভিজ্জ গিয়ে চিকচিক করে হিমু দত্তের সেই শাস্ত ও নির্বিকার চোখ, যে চোখ, কোনো মেয়ের মুখের দিকে তাকিয়ে মুগ্ধ হয় না বলে বিশ্বাস করেন কৃষ্ণার মা, অতসীর কাকীমা, কল্যাণীর মামা, নিভার বাবা, সরমার দাদা, আর প্রমীলার মা।

যুধিকা—এ কি করলে হিমাঙ্গি ? এর পরেও চাও, নরেনের সঙ্গে আমার বিয়ে হোক ?

হিমু—নিশ্চয়।

যুধিকা—নিশ্চয় না।

হিমু—তাহলে নিশ্চয় কি ? আমার সঙ্গে তোমার বিয়ে হবে কোনোদিন ?

যুধিকা—হলে মন্দ কি ?

হিমু—অসম্ভব নয় কি ?

যুধিকা—একটুও অসম্ভব নয়। শুধু তুমি রাজি হলেই হয়।

উত্তর—দেয় না হিমু।

যুধিকা—বলো, শিগ্গির বলো, আমাকে যদি বিশ্বাস করে থাক, তবে এখনি বলে দাও লক্ষ্মীটি!

—কি বিশ্বাস করবো? কি বলবো? প্রশ্ন করতে গিয়ে যেন দম বন্ধ ক'রে ছটকট করে হিমু।

যুধিকা—বিশ্বাস করো, আমি তোমাকে মিথ্যে কথা বলছি না; আমি তোমাকে ভালোবাসি।

হিমু—বিশ্বাস করি।

যুধিকা—বিশ্বাস করো, তোমার সঙ্গে বিয়ে না হলে সুখী হতে পারবো না।

হিমু—বিশ্বাস করি।

যুধিকা—তবে আমাকে বিয়ে করতে তোমার বাধা কোথায়? রাজি হয়ে যাও হিমাজি।

হিমু দন্তের মুখে যেন একটা করুণ ও থিন্ন হাসির আভা ফুটে ওঠে। যেন বুকভরা একটা হাসির সুন্দর জ্বালা বুকের ভিতরেই দমিয়ে দিতে চেষ্টা করে হিমু। যুধিকার মুখের দিকে অনেকক্ষণ অপলক চোখে তাকিয়ে থাকে হিমু। কে জানে কি ফুটে উঠেছে হিমুর চোখে। আশা আনন্দ মায়্যা আর বিশ্বাস? না, ভয় সন্দেহ কৌতুক আর ফাঁকি?

হিমু বলে—বেশ, আমি রাজি আছি যুধিকা।

যুধিকা—তাহলে গিরিডি পৌছেই মামীকে একটা টেলিগ্রাম করে জানিয়ে দিই, এ বিয়ে হবে না।

হিমু—জানিয়ে দাও।

যুধিকা—কি বা নরেনকেই একটা চিঠি দিয়ে জানিয়ে দিতে পারি, কেন এ বিয়ে হতে পারে না।

হিমু—জানিয়ে দিতে পার।

যুধিকা—হিমাজি?

হিমু—বলো।

যুধিকা—বড়ো ঘুম পাচ্ছে হিমাঙ্গি ।

হিমু—ঘুমোও ।

ট্রেনের কামরা নয় । উদাসীনের দোতলার একটি ঘর । উদাসীনের চারদিকে উঁচু পাঁচিল ; সেই পাঁচিলের উপর আবার সারি সারি লোহার সূচীমুখ স্পাইক । একটি পাখিও সে পাঁচিলের উপর উড়ে এসে বসবার মতো ঠাই পায় না । বসতে এলেই ডানাতে স্পাইকের খোঁচা খেয়ে ছটকট করে সেই মুহূর্তে উড়ে পালিয়ে যায় ।

উদাসীনের দোতলার ঘরের ভিতরে মোকা চেয়ার আর পালকের উপর গড়াগড়ি দিয়েও যুধিকা ঘোষের মন থেকে ট্রেনযাত্রার ক্লান্তির ঘোর সহজে কেটে যায়নি । কিন্তু কেটে যেতে বেশি সময়ও লাগেনি । সারা সকাল ছুপুর আর বিকেল বেলাটা ; বাস, তারপরেই যেন হঠাৎ চোখ মেলে জেগে উঠলো যুধিকা । উশ্রীর বালুতে বিকালের আলো লুটিয়ে রয়েছে এবং মনেও পড়ে যুধিকার, পৃথিবীর একজনের কাছে একটা প্রতিজ্ঞা ঘোষণা করে এসেছে যুধিকা, পাটনার মামীকে আজই টেলিগ্রাম করে জানিয়ে দিতে হবে, এ বিয়ে হবে না ।

টেলিগ্রামের ফরম নিয়ে কথাগুলি লিখতে গিয়ে বার বার হাত কাঁপে, বার বার রুমাল দিয়ে কপালের ঘাম মোছে যুধিকা ! তারপরেই নিচের তলায় নেমে গিয়ে কুমুম ঘোষের কাছে এসে বলে—এখন একটা টেলিগ্রাম করতে চাই, মা ।

কুমুম ঘোষ—কেন ?

উত্তর দিতে গিয়ে বিড়বিড় করে যুধিকা । তারপরেই যেন একটা ভয়ের চমক লেগে কেঁপে ওঠে । এবং তার পরেই কে জানে কার উপর রাগ করে আর প্রায় দৌড় দিয়ে আবার উপর তলায় চলে যায় ।

সত্যিই একটা রাগ, সে রাগে গজগজ করে বুকটা, আর ঘেমে ওঠে কপালটা । টেলিগ্রাম করা হলো না ! কিন্তু মনে পড়ে যুধিকার, নরেনের কাছে অনায়াসে একটা চিঠি লিখে সত্য কথা জানিয়ে দিতে পারা যায় । পৃথিবীর একজনের কাছে এইরকম একটা প্রতিজ্ঞার কথা বলে রেখেছে যুধিকা ।

চিঠি লিখতে দেবি করে না যুধিকা। আনায়াসে অনেক কথা লেখে এবং তারপরেই হঠাৎ ভয়ের চমক লেগে ছটফট করে ওঠে ; এবং সেই মুহূর্তে আনায়াসে চিঠিটাকে কুটি কুটি করে ছিঁড়ে ফেলে।

ট্রেনের কামরার ভিতরে যেন স্বপ্নের ঘোরে মিথ্যে কথা বলে একটা অদ্ভুত অসম্ভব ও ভয়ানক অঙ্গীকার করে হিমাদ্রির মনের ভিতরে একটা আশার স্বপ্ন ছড়িয়ে দিয়েছে যুধিকা ; মনে পড়ে সবই। এবং মনে পড়তেই বুকটা কেঁপে ওঠে, লজ্জাও পায় যুধিকা, একটা অন্যর হৃৎসাহসের লজ্জা। হিমাদ্রির সঙ্গে যুধিকা ঘোষের কোনোদিন বিয়ে হতে পারে, একথা হিমাদ্রি কি সত্যিই বিশ্বাস করেছে ?

বিশ্বাস করতে তো চায়নি মানুষটা। কি বোঁকের মাথায় কি-ভয়ানক ভুল করে ফেললো যুধিকারই একটা অবুঝ বেদনা। বেচারাকে জোর করে বিশ্বাস করানো হলো। রাজি হয়ে গেল হিমাদ্রি।

কে জানে এই শহরের কোন্ গলির কোন্ ঘরের নিভূতে কেমন অন্ধকারের মধ্যে বসে এখন চারু ঘোষের মেয়ের অঙ্গীকারের কথা-গুলিকে জীবনের এক নতুন সঙ্গীতের মতো মনে মনে সাধছে হিমাদ্রি ? ছি ছি, কী ভয়ানক বোকা হিমাদ্রি বেচারার মন ! সন্দেহ করেও শেষ পর্যন্ত নিজেই অদ্ভুত এক আশার হাসি হেসে সেই সন্দেহের জোর ভেঙে দিল। উদাসীনের মতো বাড়ির মেয়ের ট্রেনযাত্রার সাথী হতে পারে হিমাদ্রি ; মনের কথা বলাবলি করবার বন্ধু হতে পারে হিমাদ্রি ; আর একই ডিসে সাজানো খাবার খাওয়ার সঙ্গী হতে পারে হিমাদ্রি ; কিন্তু উদাসীনের মেয়ে যুধিকা ঘোষের স্বামী হতে পারে না হিমাদ্রি। তাই যদি সম্ভব হতো, তবে যুধিকা ঘোষ সত্যি যুধিকা ঘোষ হবে কেন, আর হিমাদ্রিই বা হিমাদ্রি হবে কেন ?

ছি ছি, শুধু কয়েকটা কথার ভুলে কি অদ্ভুত এক কাণ্ড বাধিয়ে একটা মানুষের সাদা মনের উপর মিচিমিচি রং ছিটিয়ে দিয়ে এখন ভয় করে লজ্জা পেয়ে লুকিয়ে থাকতে হচ্ছে। হিমাদ্রি এখন কোনো হৃৎস্বপ্নেও এমন সন্দেহ করতে পারছে না, যে পয়লা অভ্রান নরেনকে

নিয়ে হাসতে হাসতে আর উৎসবের বাঁশি বাজাতে বাজাতে এই উদাসীনের মেয়ের জীবনের কাছে হু হু করে ছুটে আসছে। টেলিগ্রাম করে কিংবা চিঠি লিখে পয়লা অজ্ঞানের ইচ্ছাটাকে কোনোই বাধা দেবার ক্ষমতা হরনি যুধিকার। যুধিকা ঘোষ যে সত্যিই পয়লা অজ্ঞানের উৎসবে সাজবার জন্য এরই মধ্যে তৈরি হয়ে গিয়েছে। শর্মা ব্রাদার্সের স্টোর থেকে নানা ডিজাইনের ও নানা রং-এর একশো শাড়ি এসেছে। তার ভিতর থেকে দশটা শাড়ি এখনই পছন্দ ক'রে ফেলতে হবে!

একটি চিঠি লিখে এখনি হিমাদ্রির বিশ্বাসের ভুল ভেঙে দিতে পারা যায়। সত্যি তোমার কোনো অপরাধ নয় হিমাদ্রি, অপরাধ আমার, আমিই মনের একটা মুখর খেয়ালের ঝোঁকে, একটা স্বপ্নের ঘোরে কয়েকটা অদ্ভুত কথা বলে ফেলেছি। বড়ো কষ্ট হচ্ছিল হিমাদ্রি, তাই প্রলাপ বকেছিলাম। কিন্তু তুমি বিশ্বাস করলে কেন? সত্যিই বিশ্বাস করেছ কি?

হিমুর ঠিকানা জানা নেই, তাই চিঠি লেখা সম্ভব হবে না। কিন্তু ঠিকানাটা জানা থাকলেই বা কি হ'তো? অস্বীকার করে না যুধিকা, হিমাদ্রির মতো মানুষের সঙ্গে এক ট্রেনের এক কামরায় একই সীটের উপর পাশাপাশি বসে গল্প করতে গিয়ে যা মন চায় তাই অনায়াসে বলে দিতে পারে উদাসীনের মতো বাড়ির মেয়ে, কিন্তু উদাসীনের দোতলায় এই ঘরে বসে কাগজ কলম নিয়ে হিমাদ্রিকে একটা চিঠি লেখাও যে নিতান্তই অসম্ভব।

হিমাদ্রি যদি হঠাৎ এই ঘরের দরজার কাছে এসে দাঁড়ায় আর প্রশ্ন করে, সব কথা মনে আছে তো যুধিকা? কল্পনা করতেও ভয় পেয়ে ধরধর ক'রে, ওঠে যুধিকা ঘোষের নিঃশ্বাস। হিমাদ্রি যদি ঝোঁকের মাধ্যমে এরকম একটা কাণ্ড ক'রে বসে, তবে কি উপায় হবে? বাবা ছুটে আসবে, মা ছুটে আসবে। হিমাদ্রির মুখের দিকে কটমট করে তাকিয়ে তার পর যুধিকার মুখের দিকে তাকিয়ে আশ্চর্য হয়ে প্রশ্ন করবে, এ লোকটা কোন্ সাহসে এসব কথা বলছে যুধিকা? এ লোকটার সঙ্গে তোমার সম্পর্ক কি?

না, কোনো সম্পর্ক নেই। জ্ঞানি না, লোকটা কোন্ সাহসে এমন কথা বলে। ভয় পেয়ে, কেঁদে আর চোঁচিয়ে একটা কাণ্ড করতে পারবে যুধিকা, কিন্তু বলতে পারবে না যে, আমিই শুকে একথা বলবার সাহস দিয়েছি। হয়তো পুলিশ ডাকবে উদাসীন, এবং উদাসীনের মেয়ের মিথ্যা কথা প্রমাণ করবার সাধ্য হবে না হিমাদ্রির। কোনোও প্রমাণ নেই, কেউ সাক্ষী নেই।

এমন অপমানের মধ্যে এগিয়ে আসবার মতো সাহস হবে কি হিমাদ্রির? ভয়ানক ভুল করবে, যদি সাহস করে। দু'হাতে মাথাটাকে শক্ত করে টিপে ধরে মনে মনে যেন প্রার্থনা করে যুধিকা—এমন সাহস যেন না করে হিমাদ্রি। যেন চুপ করে নিজের ঘরের ভিতরে বসে দিন আর রাতগুলিকে পার করে দেয়; এবং একদিন হঠাৎ চমকে উঠে যেন বুঝতে পারে হিমাদ্রি, পয়লা অজ্ঞান পার হয়ে গিয়েছে, বোম্বাই চলে গিয়েছে যুধিকা।

বড়ো বেশি আশ্চর্য হবে, হতভম্ব হয়ে যাবে, আর কষ্ট পাবে বেচারী। যুধিকা ঘোষের একটা কথা বিশ্বাস করে যে এত শাস্তি পেতে হবে, কল্পনাও করতে পারছে না হিমাদ্রি। তার চেয়ে ভালো, আর এক মুহূর্ত দেরি না করে গিরিডি ছেড়েই চলে যাক না, পালিয়ে যাক না হিমাদ্রি; তাহলে তো আর এই শাস্তি পাওয়ার দুর্ভাগ্য সহ্য করতে হবে না। কিন্তু সেটুকু বুদ্ধি আছে কি হিমাদ্রির? মানুষটা যে বোকা হবার ভুলেই জীবনে শুধু মানুষের যত তুচ্ছতা আর তাড়া খেয়ে বেড়াচ্ছে। শুকে হিমাদ্রি বলেও কেউ ডাকে না। চলে যাক, চলে যাক হিমাদ্রি।

ফুঁপিয়ে উঠলেও, আর বার বার রমাল দিয়ে চোখ মুছলেও, যুধিকা ঘোষের মনের প্রার্থনাটা যেন হিমাদ্রি নামে একটা মানুষকে এই মুহূর্তে গিরিডি থেকে তাড়িয়ে দেবার জন্য নির্ভর চাবুকের মতো ছটকট করতে থাকে। পয়লা অজ্ঞানের উৎসব বন্ধ করবার সাধ্য নেই যার, যুধিকা ঘোষকে ভয় পাইয়ে দেবার কিংবা জব্দ করবার মতো।

একটা জুকুটি করবারও শক্তি নেই যার, সে-মানুষ মানে মানে এখনও
মরে পড়ে না কেন ?

পয়লা অম্বানের আগের দিনেই হঠাৎ গিরিভিতে এসে পড়লেন
পাটনার মামী। কুসুম ঘোষ আশ্চর্য হন—এ কি কণিকা ? রওনা
হবার কথা, একটা টেলিগ্রাম ক'রে জানিয়ে দিতে হয় !

মামী বলেন—টেলিগ্রাম করবারও সময় ছিল না কুসুমদি।

কুসুম ঘোষ—নরেন আর বরবাতীদের সঙ্গে নিয়ে আসবে কে ?

মামী—অরুণের বাবাই আসবেন। উনিই সব ব্যবস্থা করেছেন।
আমি একটা ছুশ্চিন্তা নিয়ে, বাধ্য হয়ে আগেই চলে এলাম।

—ছুশ্চিন্তা ? আতঙ্কিত হয়ে ভীকু চোখে তাকিয়ে থাকেন কুসুম
ঘোষ।

—হ্যাঁ, যুদ্ধিকা কোথায় ?

—মেয়ে তো গিরিডি পৌছবার পর থেকে ওপরতলার স্বরটিতে
সেই যে ঢুকছে, আর নড়তে চায় না।

—কি বলে যুদ্ধিকা ?

—কিছু না।

—একেবারে কিছু না ?

—মাঝে একবার তোমাকে একটা টেলিগ্রাম করবার জন্তু বাস্ত
হয়ে উঠেছিল।

—কিসের জন্তু ?

—তা জানি না। কিছুক্ষণ এঘর-ওঘর ক'রে, আর গজ গজ
ক'রে, তারপর নিজেই চুপ হয়ে গেল।

—আর কোনো কাণ্ড করেনি ?

—কাণ্ড ? না, কাণ্ড আর কি করবে বলো ? হ্যাঁ, অনেকক্ষণ ধরে
একটা চিঠি লিখেছিল, বোধহয় নরেনের কাছে। কিন্তু হঠাৎ নিজেই
আবার চিঠিটা কুটি কুটি করে ছিঁড়ে কেলে দিয়ে সন্ধ্যা পর্যন্ত একটা
লম্বা ঘুম দিলো। কাণ্ড বলতে এই তো কাণ্ড।

—বিয়ে করতে কোনো আপত্তির কথা বলেছে কি ?

—কোনো আপত্তির কথা বলেনি, বরং নিজেই তো বেশ দেখে-
শুনে দশটা শাড়ি বাছাই করেছে, শর্মা ব্রাদার্সের দোকান থেকে
একশ'টা শাড়ি এসেছিল। বিয়ের নিমন্ত্রণের ব্যাপার নিয়েও নিজের
থেকে বেচে ছ'চারটে ভালো ভালো কথা বলেছে।

—কি কথা ?

—যুধিকার ইচ্ছে, বিয়েতে যেন হিমু-টিমুর মতো লোককে
নিমন্ত্রণ না করা হয়।

মামী খুশি হয়ে হেসে ফেলেন—যাক, নিশ্চিত হলাম। এইবার
মেয়ের কাণ্ডজ্ঞান হয়েছে। কিন্তু ওদিকে একটা কাণ্ড হয়ে গিয়েছে।

আঁা ?

—নরেন আমাকে তিনবার জিজ্ঞাসা করেছে, হিমাড্রি নামে
লোকটার সঙ্গে আমাদের কি সম্পর্ক ?

চৌচিয়ে ওঠেন কুমুম ঘোষ—কোনো সম্পর্ক নেই। হিমাড্রি
একটা চাকর গোছের লোক। মাথায় ছিট আছে। লোকটাকে
কোনো কাজ ক'রে দিতে বললেই তেড়েমেড়ে এসে কাজ ক'রে দিয়ে
চলে যায়।

—কিন্তু হিমাড্রির সঙ্গে যুধিকার সম্পর্কটা কি দাঁড়িয়েছে ?

—ছি ছি, তুমি কি বিস্তী বাজে কথা বলছো কণিকা ?

—একটুও বাজে কথা নয় কুমুমদি।

—খুব বাজে কথা।

—না, নরেনও নিজের চোখে কিছু কিছু দেখেছে। আমি অনেক
কিছুই দেখেছি।

—কি দেখছো তুমি ?

—হিমাড্রির সঙ্গে বিস্তী রকমের বন্ধুত্ব করেছে যুধিকা।

—কি আশ্চর্য, এমন অসম্ভব কেমন করে সম্ভব হয় ?

—সম্ভব তো হলো, আশ্চর্য হয়ে লাভ নেই।

—দৃষ্টিস্তা করেও লাভ নেই। চৌচিয়ে ওঠেন কুমুম ঘোষ।

—কেন ? একটু আশ্চর্য হন কণিকা ।

কুমুম ঘোষ—ভয়টা কিসের ? চুলোয় বাক্ হিমাঙ্গি ।

কণিকা—কিন্তু নরেনকে তো আর চুলোয় ঠেলে দিতে পারেন না কুমুমদি ?

—কথখনো না । কিন্তু নরেনের কথা তুলছো কেন ?

—নরেনের মন বড়ো অহঙ্কারী মন । এসব ব্যাপারের সামান্য আভাসও জানতে পেরেছে কি বেঁকে বসবে । ষড়্ধিকাকে বিয়ে করতে কোনোমতেই রাজি হবে না ।

কিন্তু—নরেন জানবে কি ক'রে ?

—জানিয়ে দেবে হিমাঙ্গি ।

—সে ছোটোলোকের এত সাহস হবে ?

—আপনাদের মেয়ে যদি ছোটোলোককে সাহস দিয়ে থাকে তবে...?

সুন্দর হয়ে তাকিয়ে রইলেন কুমুম ঘোষ । চারু ঘোষও সব স্তনলেন । সিরসির ক'রে কাঁপতে থাকেন চারু ঘোষ । চারু ঘোষের জীবনের নিরেট অহঙ্কারটাই যেন ভয়ে সির-সির ক'রে উঠেছে । হিমু দত্ত নামে একটা লোক, যে লোকটা বলতে গেলে একটা মানুষই নয়, তারই অহঙ্কারের কাছে যেন মাথা হেঁট ক'রে ভেঙে গুঁড়ো হয়ে আর ধুলো হয়ে লুটিয়ে পড়েছে তিনতলা উদাসীন !

কণিকা বলেন—নরেন বলেছে, গিরিডিতে এসেই প্রথমে হিমাঙ্গি নামে লোকটার সঙ্গে আলাপ করতে হবে ।

চারু ঘোষ হতভম্বের মতো তাকিয়ে বলেন—এটা তো নরেনের মনের একটা ভয়ানক সন্দেহের কথা হলো ।

কণিকা বলেন—সেই জগ্গেই তো আমি আগে-ভাগে চলে এলাম । একটা ব্যবস্থা করতেই হয় । হিমাঙ্গিকে সরিয়ে না দিতে পারলে নিশ্চিত হতে পারা যাবে না ।

চারু ঘোষ—কি ক'রে সরানো যায় ? ওকে টাকা সাধলেও সরে যেতে রাজি হবে বলে মনে হয় না ।

চুপ ক'রে দাঁড়িয়ে অনেকক্ষণ ধরে চিন্তা করেন কণিকা । তাঁরও চারু

বহুরের চেষ্টার ইতিহাস এমন করে ভুলো হয়ে যাবে, এ হুঃখ যে কণিকারও এতদিনের জেদের একটা ভয়ানক পরাজয়ের হুঃখ। শীতাংশু ডাক্তার যে হেসে হেসে আটখানা হয়ে, যাবে নরেনের মা অভিশাপ দেবেন, এবং গর্দানিবাগে কোনো ভদ্রলোকের বাড়িতে মুখ দেখাতে পারবেন না কণিকা, যদি এই বিয়ে ভেঙে যায়।

আস্তে আস্তে সিঁড়ি ধরে উপরতলায় উঠে যুধিকার ঘরের দিকে এগিয়ে যান এবং দরজার কাছে এসেই হেসে ওঠেন কণিকা মামী।—
চুপাটি করে বসে কি করছে যুধিকা ?

চমকে উঠে যুধিকা—কিছু না। তুমি কখন এলে ?

মামী—এই তো সকাল নটার গাড়িতে পৌঁছেছি। শুনলাম, তুমি নাকি আমাকে টেলিগ্রাম করতে চেয়েছিলে ?

যুধিকা—হ্যাঁ। কিন্তু করিনি তো ? এত ভয় পাচ্ছ কেন ?

মামী—নরেনের কাছে কি একটা চিঠি লিখতে চেয়েছিলে ?

—হ্যাঁ।

—তবে লিখলে না কেন ?

—লেখবার দরকার আর হলো না।

—ওরা সবাই কাল সকাল নটার গাড়িতে এখানে পৌঁছে যাবে।

যুধিকা হাসে—তুমিও বরষাত্রীনি হয়ে ওদের সঙ্গেই এলে পারতে ;
একদিন আগে এসে লাভটা কি হলো ?

মামী হঠাৎ গম্ভীর হয়ে যান।—আমতে বাধ্য হয়েছি।

—কেন ?

—বিয়ে ভেঙে যাবার ভয় আছে।

ভয় পেয়ে শিউরে ওঠে যুধিকা। মুখ কালো ক'রে আস্তে আস্তে বলে—কেন মামী ? কি ব্যাপার হলো ?

—হিমাদ্রীকে বিশ্বাস নেই।

যুধিকার হৃৎপিণ্ডের সাড়া বোধহয় এই মুহূর্তে স্তব্ধ হয়ে যাবে।
হাঁপিয়ে হাঁপিয়ে জোরে শ্বাস টানতে চেষ্টা ক'রে যুধিকা। প্রশ্ন করে—কি করেছে হিমাদ্রি ?

—কিছু করেনি এখনো, কিন্তু কিছু একটা করবে বলে বুঝতে পেরেছি।

—কি ?

—নরেনের কাছে ভয়ানক কোনো কথা বলে দেবে।

—বলুক না, নরেন বিশ্বাস করবে কেন সে কথা ?

—নরেন বিশ্বাস ক'রে ফেলবে বলে ভয় হচ্ছে।

—কেন ?

—নরেনের মনে একটা খট্কা আছে বলে মনে হচ্ছে।

—অকারণে একটা খট্কা। বেশ মজার খট্কা তো !

—অকারণে নয়। পাটনাতে ট্রেনে উঠবার সময় তুমিই নরেনের চোখের সামনে হিমাদ্রি হিমাদ্রি ক'রে চৌঁচিয়ে আর উতলা হয়ে যে কাণ্ড করেছিলে, তাতে নরেনের মনে কোনো খট্কা লাগলে সেটা কি দোষের হবে ?

—এ সবই তো তোমার অনুমান। নরেনকে ছোটো ক'রে ভাবতে তোমার ইচ্ছে করছে।

—নরেন নিজেই সন্দেহের কথা বলে আমাকে ভাবিয়ে দিয়েছে।

—কি বলেছে নরেন ?

—গিরিডিতে এলেই প্রথমে হিমাদ্রির সঙ্গে আলাপ করবে।

ছ'চোখ অপলক ক'রে তাকিয়ে থাকে আর বিড়বিড় করে যুধিকা।—নরেনের মতো মানুষ হিমাদ্রির মতো একটা লোকের সঙ্গে আলাপ করবে কেন ?

—সেটা বুঝতে চেষ্টা করো।

—কি জানতে চায় নরেন ?

—সেটা বুঝে দেখ।

—হিমাদ্রিই বা কি এমন অদ্ভুত কথা বলে দেবে ?

—তুমি জান।

যুধিকা ঘোষের মাথাটা এবার অলস হয়ে ঝুঁকে পড়ে। যুধিকা ঘোষের জীবনের পয়লা অজ্ঞানের উৎসবকে জেঙে গুঁড়ো ক'রে দেবার

শক্তি আছে হিমাদ্রির। নরেনের মনের এই খট্কা যে হিমাদ্রির জীবনে একটা সৌভাগ্য। চারু ঘোষের মেয়ের ছলনার জ্বালায় শুধু চুপ করে পুড়ে মরে যাবে না হিমাদ্রি। বিনা দোষের শাস্তি অপমান মাথা পেতে সহ্য করবে না, যতই মাটির মানুষ হোক না কেন হিমাদ্রি। নরেনকে অনায়াসে বলে দিতে পারবে হিমাদ্রি ; হ্যাঁ, চারু ঘোষের মেয়ে আমারই হাত ধরে আমাকে বলেছিল, বোম্বাই যেতে চাই না।

মামী বলেন—ছোটোলোকের রাগের কোনো বিশ্বাস নেই যুধিকা। যুধিকা ঘোষের মাথাটা আরও বুকে পড়ে। বিশ্বাস করা যায় না ঠিকই কিন্তু ছোটোলোকের মতো রাগ করেছে কে? হিমাদ্রির মনের প্রতি-হিংসাটা, না নরেনের এই খট্কাটা?

মামী বলেন—এখনই সাবধান হয়ে একটা ব্যবস্থা করে ফেলা উচিত যুধিকা।

বুকে পড়া মাথাটাকে আরও নামিয়ে দিয়ে আর হাত তুলে যেন লুকিয়ে চোখ ঘষে যুধিকা। হ্যাঁ, সাবধান হওয়া উচিত, একটা ব্যবস্থা করে ফেলা উচিত, নইলে পয়লা অজ্ঞানের সন্ধ্যায় উৎসবহীন উদাসীনের অন্ধকারে ঢাকা চেহারার দিকে তাকিয়ে হাততালি দেবে গণেশবাবুর বাড়ির লোকগুলি। হো হো করে হেসে উঠবে হিমাদ্রি। ছি ছি, হিমাদ্রিও স্বপ্নের ঘোরে একটা মিথ্যে কথা বলেছিল। সত্যি ভালবেসে থাকলে কি এরকম ভয়ানক প্রতিশোধ কেউ নিতে পারে?

এক গাদা টাকা ওর হাতে তুলে দিয়ে বলা যায়, চলে যাও হিমাদ্রি। কিন্তু তাতে কোনো ফল হবে কি?

ক্রকুটি করে বলা যায়, কিন্তু তাতেও কোনো ফল হবে না মনে হয়। ক্রকুটিকে ভয় করবে কেন হিমাদ্রি?

ক্ষমা চেয়ে বলা যায়, চলে যাও, হিমাদ্রি। কিন্তু তাতে কি চলে যেতে রাজি হবে? ক্ষমা করবে কেন?

যদি একটা সুন্দর নকল হাসি হেসে ওর কানের কাছে একটা সুন্দর কথা ঘুষ দেওয়া যায়, আমি তো মনে মনে তোমারই চিরকালের জিনিস; তাতেও কি কোনো ফল হবে?

চলে যেতে রাজি হবে না, চারু ঘোষের মেয়ের কথা বিশ্বাসই করবে না হিমাদ্রি।

—যদি ভালবেসে থাক, তবে চলে যাও হিমাদ্রি। যুদ্ধিকা ঘোষের নীরব ঠোঁট ছুঁতে যেন হঠাৎ মনে পড়া একটা মস্তকে ধরতে পেরে ফিসফিস করে ওঠে। যুদ্ধিকার বন্ধ চোখ, ভেজা চোখ ছুঁতেও যেন দেখতে পায়, যুদ্ধিকার কথা শোনা মাত্র গিরিডি ছেড়ে ছুঁতে চলে গেল হিমাদ্রি। আর একবারও ফিরে তাকালো না। যুদ্ধিকাকে বিশ্বাস না করুক, নিজেকে যে বিশ্বাস করে হিমাদ্রি। এইবার এই কথা শোনবার পর না চলে গিয়ে পারবে কেন?

ব্যস্তভাবে উঠে দাঁড়িয়ে যুদ্ধিকা বলে—আমি একবার বাইরে ঘুরে আসছি মামী; তোমরা ভয়-টয় পেও না।

মামী উদ্বিগ্নভাবে বলেন—বেশ তো, আমিও না হব তোমার সঙ্গে যাচ্ছি।

যুদ্ধিকা হাসে—চলো।

লোহার পুল পার হয়েই বাঁ দিকের সরু সড়ক। পথের দু'পাশের সরু ড্রেনের শেওলা খুঁটে খায় পোষা হাঁসের দল। মাঝে মাঝে ছাই-এর গাদা। তারই পাশে ছড়ানো এঁটো কাঁটা নিয়ে কাকে কুকুরে ঝগড়া করে।

বড়ো রাস্তার উপর গাড়ি ধামিয়ে এই সরু সড়কের দিকে হাত তুলে দেখিয়ে দেয় ড্রাইভায় গিরিধার—ওই যে দিয়ালকে উপর লকড়িকা ছোট্ট সাইন বোর্ড দেখাচ্ছে, বাস, ওহি আছে হিমুকা ঘর।

এগিয়ে গিয়ে খমকে দাঁড়ায় যুদ্ধিকা। মামীও যুদ্ধিকার পাশে খমকে দাঁড়িয়ে থাকেন। হ্যাঁ, এই তো হিমাদ্রির ঘর। দরজার পাশে দেওয়ালের গায়ে এক টুকরো কাঠের উপর বড়ো বড়ো হরকে লেখা, ডাক্তার হিমাদ্রি শেখর দত্ত, হোমিও।

—কাকে চাই?

হিমুর ঘরের মাথার উপরে একটা ছোটো ঘরের ঘুলঘুলির কাছে একজোড়া চোখ ভাসিয়ে প্রশ্ন করে একটা লোক ।

যুধিকা—হিমাজি বাবুকে চাই ।

—সে ইখানে নাই । গিরিডি ছোড়নে চলিয়ে গিয়েছে ।

টেঁচিয়ে হেসে ওঠে যুধিকা ।—হিমাজি নিজেই চলে গিয়েছে মামী ।

একটা ঢৌক গিলে নিয়ে ছটকট করে আরো উৎফুল্ল হয়ে, চোখের তারা দুটো আরও ঝিকমিকিয়ে, আরও জোরে টেঁচিয়ে হেসে ওঠে যুধিকা—হিমাজি আমাকেই বিশ্বাস করে পালিয়ে গিয়েছে মামী ।

হাসি থামাতে গিয়ে যুধিকার শরীরটা কাঁপতে থাকে ; শরীরের কাঁপুনিটা থামাতে গিয়ে আশ্বে হাত তুলে দেওয়ালটাকে ধরতে চেষ্টা করে যুধিকা । আর দেওয়ালটা ধরতে গিয়ে সেই ছোটো কাঠের ফলকটা ছুঁয়ে ফেলে । এবং কাঠের ফলকটাকে ছুঁতে গিয়ে বড়ো বড়ো হরকে লেখা সেই নামটাকেই যেন আঁকড়ে ধরে যুধিকা ।

একটা নাম মাত্র । কে জানে কবে কাঠের ঘুণে এই নামটাকেও কুরে কুরে খেয়ে প্রায় মুছে ফেলবে । দেখলেও বুঝতে পারা যাবে না, কার নাম আর কি নাম ?

মামী বলেন—চল যুধিকা

For More Books Visit www.murchona.com

Murchona Forum : <http://www.murchona.com/forum/index.php>

Created with an unregistered version of SCP PDF Builder

You can order SCP PDF Builder for only \$19.95USD from <http://www.scp-solutions.com/order.html>